

Si₂ carta a₂ ca₂ jmo₃ San Pablo ne₄ dsa₂ ROMANOS

Jmo₅ Pa₄ si₂ a₂chein₃ ne₄ Guá'₅ i₂chan₂ Roma

¹ Jniá₂ Pa₄, líng₅ dsa₂ i₂jme₂ti₃ ne₄ Jesucristo; Diú₄ ca₂të₃ jniá₂, jaun₂ ca₂chei'₃ a₂lén₂ dsa₂ i₂chen₄ quiáin₅ ia₁jaun₂ qui₁'ë₄ jág₁ dse₃ quió'₅.

² Ca₂'ë₂ Diú₄ jág₁ dse₃ nē₅ ca₂tó'₂ ne₄ Si₂ jnió'₅ quió'₅ ma₂líg'₂, ca₂cuë₃ të₂le₃ quian'₅₄ dsa₂ i₂jme₁'ë₂ jág₁ quiáin₅, ³ a₂'iin₂₃ ja₁ñi'₅₄, i₂jme₁lín₄ tsí₁jon₂ David lia'₂ con'₂ lín₅ dsa₂ mi₂güí₃; ⁴ lia'₂ con'₂ lē₅ Jme₂dsí₂ Jnió'₅ nē₃ ca₂jme₃jnia₅ a₂lín₅ 'éi₂ Ja₁ñi'₅₄ Diú₄ jme₁ca₂jein'₅₄ táng₃ jin₄ 'lag₄, quian'₅₄ jui₅bí₂ quió'₅, a₂'uain'₂. Jesucristo Te₁gui'₅₄ quián₂ jniog₄ bá₄ 'éi₂. ⁵ Të₂le₃ quian'₅₄ Jesucristo, ton'₂ o₄quió'₄ 'éi₂ bá₄, ma₂jmo₃ Diú₄ dse₃ dsí₅ ja₁con₂ jnia'₅₄, jaun₂ ca₂chei₃ jin₄ dsí₂nau₂ ia₁jaun₂ le₃chan₂ dsa₂ ca₂le₂con₂ juig₂ i₂jme₂ti₃ jág₁ quió'₅, ia₁ a₂'éin₂. ⁶ Jin₄ dsa₂ 'éi₂ tián'₅ 'nia'₂ i₂ma₂të'₃ Diú₄ ján₃, a₂lén'₂ 'nia'₂ i₂quián₅ Jesucristo.

⁷ Jaun₂ tsíng₂ si₂ la₂ ne'₅₄ ca₂le₃jin'₃ 'nia'₂ i₂tián'₅ jë₄ juig₂ Roma, i₂lín₅ i₂'nio₃ Diú₄, jaun₂ ma₂të₂₃ a₂le₃chan'₂ 'nia'₂ líng'₅ dsa₂ i₂lë₅ 'í₁ i₂ma₂quiáin₅. Ju₁i₂jme₂gu'₅₄ bá₄ Diú₄ ju₁le₂chan'₂ bá₄ 'nia'₂ dse₃, ju₁'ag₅₄ bá₄ tei₄ o₄quió'₄ Diú₄ Jme₂ jniog₄, o₄quió'₄ Te₁gui'₅₄ Jesucristo nē₃.

'Nio₃ Pa₄ dsí₃jág₂ juig₂ Roma

8 Jë₁le₂'uig₅₄, tē₂le₃ quian'₅₄ Jesucristo cuē₅ ti₁'mag'₄ Diú₄ quiáng₃ o₄quián'₂ 'nia'₂ ca₂le₃jíng'₃, ia₁ ca₂le₂con₂ bá₄ 'ei₅ jág₁ dsia₅ dsa₂ 'a₂ lia'₂ 'én'₂ 'nia'₂.
 9 Jaun₂ Diú₄, i₂jme₂tí₁ jniá₂ ne₄ ca₂le₃jě₃ jme₂dsí₂ quió₃, a₂qui₂'ě₅ jág₁ dse₃ quió'₅ Ja₁ñi'₅₄, 'éi₂ bá₄ i₂lín₅ i₂jáng'₅ jág₁ dsau₅ 'a₂ lia'₂ dsau'₂ dsí₃ 'nia'₂ ca₂le₃jě₃ jě₁chi₂lén'₂ jniá₂ Diú₄. 10 Co₂tan₅₄ bá₄ mi₅ jniá₂ ne₄ Diú₄ jui₁le₅₄ bá₄ 'a₂ lia'₂ 'ñio₂ dsí₅, 'a₂ lia'₂ lé₂ a₂cuin₃ jmig₄, ca₂lia'₂ ca₂lě₃ a₂nei₅₄ i₁jíng₁₂ 'nia'₂. 11 Ia₁ 'ín₅ dsí₃ i₁jíng₁₂ 'nia'₂, ton'₂ 'nio₃ jme₁'ong₁₂ 'e₂ caun₂ 'nió'₅ jme₁'ong₁₂ 'nia'₂ tē₂le₃ quió'₅ jme₂dsí₂, ia₁jaun₂ le₃náu'₁ guě₄ 'nia'₂ tiá₂; 12 co₂'nió'₄ le₃jua'₅₄, ia₁jaun₂ lé₂ le₃cuē₅₄ lián'₂ rín'₅₄ le₂jau₂ le₂jau₂ quian'₅₄ a₂'éin₂ jui₁lia'₂ 'én'₂ 'nia'₂ jui₁lia'₂ 'én₂ jniá₂ ján₃.

13 Rín'₅₄ jniog₄, 'nio₃ le₃ñi'₅₄ 'nia'₂ 'lióng₂ ráun₂ bá₄ ma₂lě₅ dsí₃ a₂'nio₃ nei₅₄ i₁jíng₁₂ 'nia'₂, la₁ ca₂lia'₂ jñia'₅₄ rě₂ně₃ tsá₃ ma₂lě₅, ia₁ ma₂rě₂jñi₅ juí₅. 'Nio₃ nei₅₄ ia₁jaun₂ chi₁lo'₂ a₂ma₂rau₂ quió'₅ Jme₂dsí₂ jě₄ quián'₂ 'nia'₂, jui₁lia'₂ ma₂cag'₄ jniá₂ ján₃ juig₂ siá'₂, go₄ dsí₂nau₂ sián'₂ ján₃. 14 Ia₁ jniá₂ bá₄ niog₅ ne₃ ca₂tíng₂ quian'₅₄ ca₂le₃jín₃, jui₁lín₄ dsa₂ 'e₂ lín₅, dsa₂ griego, o₃ dsí₂nau₂ 'e₂, dsa₂ i₂ñí'₂ dsí₅, o₃ dsa₂ co₄ 'e₂; 15 jaun₂ le₂ně₅ bá₄ 'ín₅ dsí₃ a₂qui₂i₁'ě₃ jág₁ dse₃ ja₁con₂ dsa₂ juig₂ go'₄ 'nia'₂ i₂chan₂ Roma ján₃.

Bí₂ a₂'io₅ jág₁ dse₃

16 Ia₁ tsá₃ 'e₂ o₂guí'₃ jéin₅ jniá₂ quian'₅₄ jág₁ dse₃, ia₁ jui₅bí₂ quió'₅ Diú₄ bá₄ ně₅ a₂lión₂ ca₂le₃jín₃ i₂'én₂: quió'₅ dsa₂ judíos de'₂ le₂'uig₅₄, ján₃ bá₄ le₂jaun₂ quió'₅ dsí₂nau₂. 17 Ia₁ jág₁ dse₃ la₂ jáng'₅ jág₁ dsau₅ 'a₂ lia'₂ chei'₂ Diú₄ jui₅ co₂rě₂, jui₅ ja₁ma₂dsan₃ dsáu₁ dsa₂, jui₅ a₂jme₂lióg₃ a₂'én₂ dsa₂, ton'₂ a₂'én₂ dsa₂

ca₂lia'₂ jë₁ca₂tó'₂. Le₂në₅ juá'₂ ne₄ Si₂: “Dsa₂ i₂ŋi₅ jui₅ co₂rë₂ ia₁ a₂'éin₂, 'éi₂ bá₄ le₃chan₂.”*

A₂ma₂rë₂cán'₄ dsa₂ mi₂güig₃ guioin₅₄

18 A₂juá'₅ jniá₂ le₂në₅, ia₁ a₂ne₄ bá₄ jniog₄ jaun₂, caun₂jme₂jnia₅ Diú₄ a₂'nei₂ tē₂ja₁guá₄ guei'₅₄ i₂juíG₃ ja₁con₂ dsa₂ i₂tsá₃ Diú₄ cuin₅, ja₁con₂ dsa₂ i₂tsá₃ tion'₅₄ jui₅ co₂dsau₅, dsa₂ i₂jné₅ jui₅ quió'₅ jág₁ dsau₅ tē₂le₃ quian'₅₄ jui₅ 'lig'₅₄ ja₁i₂nioi₅₄. 19 Ia₁ rē₂jniá₂ rē₂ bá₄ ca₂le₃jě₃ a₂ŋi₅ dsa₂ 'a₂ lia'₂ lín₅ Diú₄, ia₁ a₂ma₂ca₂jme₃jniai₂₃ tē₂le₃ quian'₅₄ a₂ma₂jmo₃, 20 ia₁ ca₂le₃jě₃ a₂tsá₃ rē₂jniá₂ quió'₅ Diú₄, lé₂ le₃cuí'₅ dsa₂ tē₂le₃ quian'₅₄ ca₂le₃jě₃ a₂ma₂jmo₃; ma₂ca₂rē₃jniá₂ dse₃ lín₃ bá₄, ca₂le₃ ca₂jmo₃ Diú₄ mi₂güig₃ a₂lín₅ dsón'₂ Diú₄, ton'₂ a₂'io₂₃ jui₅bí₂ co₂tan₅₄ bá₄; jaun₂ le₂në₅ bá₄ tsá₃ ma₂'e₂ lé₂ le₃juá'₂ dsa₂ jua'₅₄ a₂tsá₃ ŋi₅. 21 Ia₁ o₁jŋia'₅₄ ŋi₅ le₂në₅ a₂chan₂ Diú₄, la₁ tsá₃ ma₂ca₂jme₃juag'₂ lia'₂ con'₂ lě₅ ca₂tín₂ Diú₄ le₃juin'₂, on₃ guë'₂ ma₂cuë'₃ Diú₄ ti₁'mag'₄. Jë₂ bá₄ ma₂ja₂lén₂ qui₂'no'₂ dsí₅ a₂tsá₃ ta₁ tí₄; tsá₃ tē₂tsi'₅₄ dsí₅, jaun₂ ma₂tē₁'ŋiá₄ jë₄ qui₁'né'₃. 22 Jui₁'a₂ guë₃ la₂ juá'₂ a₂lín₅ dsa₂ i₂cuí'₅, a₂tiin₂ a₂ŋi₅, la₁ dsa₂ co₄ bá₄ ca₂lín₃ jë₁ca₂tó'₂. 23 Jaun₂ nē₃, 'nió'₄ a₂jme₁jme₃juin'₂ Diú₄ i₂tsá₃ ton₄ jmig₄ jón₂, ma₂ca₂jme₃tsiin₃ bá₄ a₂co₂tág₅ co₂'né'₅ quió'₄ Diú₄ quian'₅₄ nió'₄ quió'₅ dsa₂ mi₂güig₃ i₂dsan₂, jui₁lia'₂ nió'₄ quió'₅ já'₂ i₂'in₅, já'₂ i₂tsě'₅ quió'₅, já'₂ i₂lě₂ quén₂ mi₂tag₄ nē₃.

24 'Uig₅₄ nē₅ nē₃ co₂dsia₅ ma₂jáng'₄ Diú₄ jui₅ 'lig'₅₄ a₂'in₅ dsí₅ a₂tsá₃ le₁jě₃, ia₁jaun₂ caun₂ i₃nioi₅₄

* 1:17 Habacuc 2:4.

jmo₂₃-dsáu₅ cosa a₂o₂guí'₃ a₂jmaí'₅ ni₁ŋi₁₂ quiaín'₅₄
 riin'₅₄ le₂jain₂ le₂jain₂, ²⁵ ia₁ ca₂jme₃tsíin₃† jág₁
 dsau₅ quió'₅ Diú₄ quian'₅₄ jág₁ tē₂jág₁; jaun₂
 ma₂ja₂léin₂ jme₂gó'₃ jme₂juin'₂ cosas a₂ca₂jmo₃
 Diú₄, 'nió'₄ a₂jme₁jme₃juin'₂ Diú₄ 'ŋiog₅, i₂ca₂tín₂
 dsón'₂ a₂jme₃juag'₂ dsa₂ co₂tan₅₄. ¡Le₂nē₅ dsón'₂ bá₄!
 A₂méi₃.

²⁶ Uig₅₄ nē₅ co₂dsia₅ ma₂jáng'₂ juí₅ ja₁cuě'₅ o₂'ŋió₃
 o₂ŋia₃ dsí₅ a₂lē₅ o₂guí'₃, ia₁ ca₂le₂jio₅ dsa₂ mí₂
 quiaín₅ bá₄ ca₂jme₃tsíin₃ 'a₂ lia'₂ i₂nioi₅₄, a₂tsá₃
 ma₂l₂nioi₅₄ lia'₂ con'₂ dsi₂ten₅₄ 'i₄ 'éi'₃ i₃nio₄ lia'₂ dsa₂
 mí₂ dsa₂ ŋe'₂. ²⁷ Ján₃ bá₄ guē'₂ le₂jaun₂ dsa₂ ŋe'₂
 ma₂ca₂tí₂ bá₄ 'a₂ lia'₂ 'i₄ 'éi'₃ le₃chain₂ tiain'₃ quiaín'₅₄
 dsa₂ mí₂; ma₂ja₂léin₂ chóg'₅ dséi₂ quiaín'₅₄ dsa₂ ŋe'₂
 riin'₅₄, jmo₂₃-dsáu₅ a₂o₂guí'₃ le₂jain₂ le₂jain₂, jaun₂
 gue₂₃ uig₅ guioin₅₄ a₂ca₂tíin₂ o₄quió'₄ juí₅ ja₁ca₂quiá₂
 cau₅.

²⁸ Jaun₂, 'uig₅₄ ia₁ a₂lín₂ a₂tsá₃ 'e₂ quen₅ Diú₄,
 tsá₃ toin'₂ juí₅ 'éi₂, jaun₂ co₂dsia₅ ma₂jáng'₂ Diú₄ juí₅
 ja₁dsi₂qui₂dsi₃jio₅ dsí₅ a₂'lig'₅₄, a₂dsi₂qui₂dsi₃cóin'₅
 a₂'liain'₂, a₂jmo₃ a₂tsá₃ dsi₂ten₅₄. ²⁹ Ca₂lia'₂
 qui₂rē₂rin₅ ca₂le₃jē₃ ne₅₄ cosa 'lig'₅₄ jme₂dsí₂
 quió'₅, qui₂'no₂₃ dso₄, jmá'₃ guioin₅₄ bá₄ 'nio₃
 jme₁'ŋi₁₀'₃, a₂qui₂'no'₂ dsí₅ 'a₂ lia'₂ 'ě'₃ uig₅ riin'₅₄.
 Rē₂can'₂ dsí₅ a₂uig₅ dsí₅ jín₂ riin'₅₄, a₂jme₂dsiain₂₃
 riin'₅₄, a₂lē₁qui₂dsia₂₃ mí₅₄, a₂qui₂jme₂gain₂₃
 riin'₅₄, tsá₃ dsau₅ jág₁ quian₅, 'ŋio₅ 'ŋio₄ dsa₂,
 a₂co₂jmo₅ dsa₂ jág₁ tē₂jág₁ jē₄ tē₃co'₅₄. ³⁰ Ján₃
 bá₄ le₂jaun₂ a₂lē₁chi₂'ag₅ dsa₂, 'ŋiai₅₄ bá₄ Diú₄,
 a₂lē₁co₂jmaí'₂ riin'₅₄, a₂jme₂rón₂ guioin₅₄, dsia₂₃

† 1:25 'Nio'₂ ja₁ton₅ Jeremías 2.11.

jág₁ tá'₅, a₂qui₂'no'₂ dsí'₅ 'a₂ lia'₂ jmo₃ a₂'lig'₅₄, on₃ guë'₂ jmá'₃ jme₂gain₃ chog₅₄-jmei₂; ³¹ tsá₃ tē₂tsi'₅₄ dsí'₅ ně₃, on₃ guë'₂ jua'₅₄ jme₃ti₃ 'e₂ caun₂ jág₁ cuë₂₃ a₂jmo₃; tsá₃ 'ein₂ 'iin₂₃ 'i₁jan₂, tsá₃ tin₂ dsí'₅ 'éin₂ dso₄ quió'₅ riin'₅₄, on₃ guë'₂ n₁éi₂ dsí'₅. ³² I₂n₁i₅ rē₂ bá₄ dsa₂ 'éi₂ 'a₂ lia'₂ lē₅ 'éi'₃ ma₂quí'₃ Diú₄, ia₁ ca₂le₃jín₃ i₂jmo₅ le₂nē₅ ca₂tín₂ dsiáin₃ bá₄; la₁ jui'₁e₂ guë₃ n₁i₅ a₂jaun₂, on₃jua'₅₄ jmá'₃ guioin₅₄ caun₂ qui₂jmo₂₃, tē₂le₃ tē₅ dsí'₅ bá₄ a₂jmo₅ i₂sián'₂ ján₃.

2

Diú₄ bá₄ con₂ 'í₁ co₂rē₂ 'a₂ lia'₂ con₂ lē₅ dsón'₂

¹ Jaun₂ ně₃, tsá₃ 'e₂ lé₂ le₃jua'₅₄ 'ne₂ jua'₅₄ a₂tsá₃ 'e₂ dso₄ ring'₂, 'ne₂ guë'₂ i₂con₂ 'í₁ ja₁con₂ i₂sián'₂, tsá₃ a₂nag₅₄ jui'₁ein₂ guë₃ líng'₅. Ia₁ nē₁jua'₂ cáun'₂ 'í₁ ja₁con₂ ring'₂, jaun₂ co₂'nió'₄ ma₂qui₂dsí'₁ 'éi'₃ ja₁con₂ 'n₁iag'₂, ton'₂ ján₃ bá₄ le₂jaun₂ jmo'₂ 'ne₂ 'n₁iag'₂ a₂cáun'₂ 'í₁ jaun₂. ² Ia₁ ne₄ bá₄ jniog₄ jaun₂, Diú₄ bá₄ i₂con₂ 'í₁ rē₂ 'a₂ lia'₂ con₂ lē₅ dsón'₂, ja₁con₂ dsa₂ i₂jmo₅ le₂nē₅. ³ Jaun₂ 'ne₂ ně₃ i₂cáun'₂ 'í₁ ja₁con₂ i₂sián'₂ ton'₂ a₂le₂jaun₂ bá₄ guë'₂ jmo'₂ 'n₁iag'₂, ¿'e₂ líng'₂? ¿A₂lióng'₂ jē₁ma₂tē₂ rē₁con₂ Diú₄ 'í₁ ja₁cong'₂? ⁴ ¿O₃ bá₄ tsá₃ dsáu₅ 'au'₂ ia₁ a₂n₁i₄ lē₃ dse₃ 'ua₁ dsí'₅ Diú₄, a₂jmo₂₃ tió'₃ dsí'₅, a₂jme₂juiin'₂ dsí'₅ ně₃? ¿Tsa₁ len'₅₄ 'ne₂, ta₁ a₂quí'₅ a₂dse₃ dsí'₅ Diú₄ a₂jaun₂ bá₄ jiog₂₃ a₂dsi₃quén'₅ 'au'₂? ⁵ La₁ 'n₁io₅ 'ua'₂ 'au'₂ tsá₃ 'n₁iog'₂ jme₁tsíng'₄ 'au'₂; 'uig₅₄ jaun₂ ně₃ caun₂ jme₁juí'₁ bá₄ a₂jme₂'ne₅₄ Diú₄ ne₄ quiáng'₂ 'n₁iag'₂ a₂tíng'₃ jmig₄ jaun₂ jē₁ma₂tē₂ rē₁jme₃jniai₂₃ a₂'nei₂, jē₁qui₃dsi₂₃ 'éi'₃ co₂rē₂. ⁶ Ia₁ jma₃quén₅

qui₃ bá₄ Diú₄ 'lian'₅₄ le₂jan₂ le₂jan₂ 'a₂ lia'₂ con'₂ lě₅
a₂ma₂ca₂jmo₃. * ⁷ Jui₁lia'₂ dsa₂ i₂jmo₅ tió'₃ dsí₅ jmo₂₃
a₂dse₃, a₂qui₂'no'₂ a₂co₂tág₅ co₂'né'₅, ton'₂ 'no'₂ jui₅
'a₂ lia'₂ jme₃gu'₅₄ Diú₄ quian'₅₄ caun₂ a₂dse₃, ton'₂
'no'₂ jui₅ a₂tsá₃ dsiáin₃, 'éi'₂ bá₄ cué'₃ Diú₄ a₂le₃chain₂
co₂tan₅₄. ⁸ La₁ quian'₅₄ a₂'nei₂ cué'₃ uig₅ ca₂le₃jín₃
i₂dsia₅ mi'₅₄, i₂tsá₃ 'nio₃ cán₂ caun₂ jui₅ a₂nag₃ gau₂
jág₁ tí₅, i₂jmá'₃ jui₅ 'lig'₅₄ bá₄ 'nio₃ cán₂. ⁹ Le₃cha₂ uig₅
o₂i₁ dsi₅ quió'₅ ca₂le₃jín₃ i₂jmo₅ a₂'lig'₅₄, jě₁le₂'uig₅₄
tě₂le₃ quió'₅ dsa₂ judíos, ján₃ guě'₂ le₂jaun₂ le₃ja₁con₂
dsi₂nau₂. ¹⁰ La₁ ja₁con₂ le₂jan₂ le₂jan₂ i₂jmo₅ a₂dse₃,
cuě₃ Diú₄ a₂co₂tág₅ co₂'né'₅, ton'₂ cuě₃ caun₂ a₂dse₃,
jmo₃ 'ei₅ tei₄, jě₁le₂'uig₅₄ quió'₅ dsa₂ judíos, ján₃ guě'₂
le₂jaun₂ le₃ja₁con₂ dsi₂nau₂.

¹¹ Ia₁ tsá₃ jma₃quén₅ jín₂ Diú₄ dsa₂ lia'₂ ca₂ton₂
ca₂ton₂; ¹² ia₁ ca₂le₃jín₃ i₂'no₅ dso₄ i₂tsá₃ ca₂tín₂; 'Éi'₃
quió'₅ Moisés, dsiáin₃ tě₃ tsá₃ 'Éi'₃ jaun₂ ca₂tín₂; la₁
ján₃ guě'₂ le₂jaun₂ dsa₂ i₂'no₅ dso₄ ně₁jua'₂ ron₅ bá₄
'Éi'₃ quió'₅ Moisés ně₃, tě₃dsi₅₄ bá₄ 'éi'₃ quió'₅, jióg'₂
'í₁ lia'₂ con'₂ lě₅ 'Éi'₃ jaun₂. ¹³ Ia₁ on₃jua'₅₄ dsa₂ i₂nag₅
'Éi'₃ i₂jín₂ Diú₄ a₂lín₅ dsa₂ i₂jme₂ti₃; dsa₂ i₂jmo₅ lia'₂
con'₂ lě₅ 'Éi'₃ bá₄, i₂'éi₂ bá₄ i₂jín₂ Diú₄ a₂lín₅ dsa₂
i₂jme₂ti₃. ¹⁴ Ia₁ jui₁lia'₂ dsi₂nau₂ ně₃, i₂tsá₃ 'Éi'₃ cha₂
ja₁coin₂, la₁ ně₁jua'₂ chain₂ jui₅ a₂jme₂ti₃ con'₂ jaun₂
ma₂tín₂ dsí₅, guion₅₄ bá₄ dsa₂ 'éi₂ ŋi₅ tě₂dsí₅ 'a₂ lia'₂
lě₅ 'Éi'₃ quió'₅ Diú₄, o₁ŋia'₅₄ tsá₃ a₂jaun₂ ron₅ quió'₅.
¹⁵ Ia₁ cuě₂₃ léi₄ 'a₂ lia'₂ lě₅ chain₂, a₂rě₂ton₅ tě₂dsí₅
ta₁ a₂quí'₅ 'Éi'₃. Jaun₂ tě₂dsí₅ guoin₅₄ bá₄ jáng'₅
jág₁ dsau₅ o₄quió'₄, jaun₂ tsá₃ quin₅ 'a₂ lia'₂ dsi₂jiog₅

* **2:6** 'Nio'₂ ja₁ton₅ Salmo 62:12; Proverbios 24:12.

dsí₅ guoin₅₄; a₂lín₅₄ jáng'₂, a₂lín₅₄ guè'₂ tē₂le₃ lió₂.
 16 Le₂nē₅ bá₄ lé₂ jē₁ma₂tē₂ jmīg₄ jaun₂ a₂con₂ Diú₄
 'í₁ ca₂le₃jě₃ a₂'ma₄ jlě₅ quió'₅ ca₂le₃jín₃ dsa₂, tē₂le₃
 quian'₅₄ Jesucristo, lia'₂ con'₂ lě₅ jág₁ dse₃ a₂qui₂'ě₅
 jniá₂.

Dsa₂judíos, quian'₅₄ 'Éi'₃ quió'₅ Moisés

17 La₁ chi₂jua'₂ lín'₅ 'ne₂ dsa₂ judío jaun₂ dsia'₂
 a₂chéng'₅ tiá₂ quian'₅₄ 'Éi'₃ quió'₅ Moisés, jaun₂ jmo'₂
 táng'₅ ia₁ a₂cuing'₂ Diú₄; 18 chi₂jua'₂ ma₂ca₂jme₃tín₅
 dsa₂ 'ne₂ 'a₂ lia'₂ lě₅ 'Éi'₃, jaun₂ ŋi'₅₄ 'a₂ lia'₂ 'nio₃
 Diú₄, ton'₂ tǐng'₂ caun'₅₄ 'í₁ 'a₂ lia'₂ lě₅ a₂dse₃; 19 jaun₂
 chi₂jua'₂ tē₃dsón'₂ líng'₂ a₂tǐng'₂ jang'₅₄ dsa₂ ten₄,
 chi₂jua'₂ ŋi'₅₄ 'a₂ lia'₂ téi'₄ si₂ ja₁con₂ dsa₂ i₂i₂nió₄
 jě₄ qui₁né'₃, 20 chi₂jua'₂ ŋi'₅₄ 'a₂ lia'₂ jme₁rě'₂ jui₅
 a₂quian'₅₄ dsa₂ co₄, chi₂jua'₂ ŋi'₅₄ 'a₂ lia'₂ cuē'₅₄ jág₁
 i₂'nió'₄ i₂lín₅ chi'₂, ia₁ a₂ron₅ 'Éi'₃ ja₁cong'₂, a₂tén₅
 ne₄ 'Éi'₃ 'a₂ lia'₂ 'nió'₅ le₃ŋi₅ dsa₂, 'a₂ lia'₂ lě₅ jág₁
 dsau₅; 21 'ne₂ guè'₂ i₂jme₂tǐng'₂ i₂sián'₂, ħ'e₂ guè'₂
 'uig₅₄ tsá₃ jme₂tǐng'₁ guè'₂ 'ŋiag'₂? Chi₂jua'₂ 'ne₂
 guè'₂ 'ě₅ jág₁ a₂tsá₃ ca₂tín₂ dsa₂ 'ang₃, ħtsa₁ 'ang'₂
 'ŋiag'₂? 22 Chi₂jua'₂ 'ne₂ juá'₂ tsá₃ ca₂tín₂ dsa₂ nió'₃
 jág₁ quian'₅₄ i₂tsá₃ lě₅ dsi₂i₂gu₂, ħtsa₁ nióg'₅ guè'₂
 'ne₂ jág₁ jaun₂ 'ŋiag'₂? Chi₂jua'₂ 'ne₂ 'ŋio₅ lín₃ 'ŋiag'₅₄
 diú₄ lag₄, ħtsa₁ 'ang'₂ 'ne₂ a₂quen₅ a₂te₁'i₁ dsi₂néi₂ 'né₅
 quió'₅? 23 'Ne₂ guè'₂ i₂jmo'₂ táng'₅ ja₁con₂ 'Éi'₃, ħtsa₁
 'lig'₅₄ tsǐng'₂ Diú₄ ia₁ tsá₃ jme₂tí'₁ 'Éi'₃ jaun₂? 24 Ia₁
 ju₁lia'₂ juá'₂ ne₄ Si₂:

'Ag₅ dsi₂nau₂ 'in₂₃ 'lig'₅₄ Diú₄

'uig₅₄ quián'₂ 'nia'₂.†

† 2:24 Isaías 52:5; Ezequiel 36:22.

25 Dsón'₂ bá₄ dsau₅ quen₅ a₂ti₃ dsa₂ lo₅₄ nē₁jua'₂ jme₂ti₃ 'Éi'₃ quió'₅ Moisés, la₁ nē₁jua'₂ tsá₃ jme₂ti₃ dsa₂ ně₃, tsá₃ 'e₂ ta₁ jmo₃, nē₂jag₄ bá₄ a₂tsá₃ 'e₂ rē₂uĩng₄ bá₄ quió'₅. 26 Jui₁lia'₂ dsa₂ i₂tsá₃ 'e₂ ma₂rē₂uĩng₄ quió'₅, la₁ nē₁jua'₂ jme₂ti₃ 'e₂ ta₁ qui'₅ 'Éi'₃, co₂jaun₂ bá₄ jín₂ Diú₄ dsa₂ 'éi₂ nē₂jag₄ bá₄ i₂ma₂rē₂uĩng₄ quió'₅ o₁ñia'₅₄ tsá₃ ma₂rē₂uĩng₄. 27 Dsa₂ i₂tsá₃ 'e₂ rē₂uĩng₄ lo₄, la₁ nē₁jua'₂ jme₂ti₃ 'a₂ lia'₂ juá'₂ 'Éi'₃, i₂'éi₂ bá₄ chen'₅ Diú₄ ne₄ jui₅ a₂con₂ 'í₁ ja₁con'₂ 'ne₂, ia₁ tsá₃ jme₂tí'₁, jui₁'e₂ guě₃ ron₅ Si₂ tio'₅₄ 'Éi'₃ quiáng'₂, jui₁'e₂ guě₃ rē₂uĩng₄ quiáng'₂ ně₃. 28 Ia₁ jui₁lia'₂ jan₂ dsa₂ i₂lín₅ judío dsón'₂, on₃jua'₅₄ rē'₂ jnia'₅₄ lín₅ dsa₂ léi₄ jmá'₃ le₃co'₅₄, on₃ guě'₂ le₂jaun₂ jui₁lia'₂ ta₁ dsón'₂ a₂quí'₅ a₂qui₂rē₂uĩng₄ lo₄ dsa₂, on₃jua'₅₄ jnia'₅₄ rē₂uĩng₄ lín₅ léi₄ jmá'₃ le₃co'₅₄ ni₁ñí₅. 29 Tē₂le₃ a₂ca₂tín₂ bá₄ dsa₂ jmo₃, a₂lín₅ tē₃dsón'₂ dsa₂ judío, a₂lín₅ ca₂tē₂ dsí₅; ján₃ guě'₂ le₂jaun₂ jui₁lia'₂ a₂lín₅ dsa₂ léi₄ a₂rē₂uĩng₄ quió'₅, a₂lě₅ ca₂tē₂ dsí₅ bá₄ dsa₂; ton'₂ a₂gu₂dsí₂ bá₄ a₂jaun₂, on₃jua'₅₄ jmá'₃ lia'₂ con'₂ le₁ton₅ ne₄ Si₂ 'Éi'₃. Dsa₂ i₂lín₅ le₂ně₅ chéin'₅ rē₂ quian'₅₄ Diú₄, on₃jua'₅₄ rē'₂ quian'₅₄ dsa₂ mi₂gü₃g₃.

3

1 Jaun₂ ně₃, ħ'e₂ ta₁ jmo₅ a₂quen₅ guě₄ a₂lín₅ dsa₂ dsa₂ judío? ħO₃ 'e₂ ta₁ jmo₅ a₂lín₅ dsa₂ léi₄ a₂rē₂uĩng₄ ni₁lo₁₂? 2 'Lióng₂ bá₄ 'uig₅₄ cha₂. Jē₁le₂'uig₅₄, ca₂dsia₃ Diú₄ jág₁ dse₃ quió'₅ o₄gú₃ dsa₂ judíos. 3 ħLa₁ 'e₂ bá₄ lé₂ ně₃ nē₁jua'₂ chan₂ i₂lín₅₄ i₂tsá₃ ca₂rě₃ti'₅₄?* ħO₃ bá₄ lín'₂ 'nia'₂ ján₃ a₂tsá₃ le₃ti'₅₄ Diú₄ jág₁ quió'₅ ia₁

* 3:3 o₃, "i₂tsá₃ ca₂rě₃'én₂."

a₂tsá₃ ca₂rē₃ti'₅₄ dsa₂ 'éi₂? ⁴ ¡Dsón'₂ bá₄ tsá₃ le₂jaun₂!
 Jui₁le₂lei₅₄ bá₄ jniog₄, Diú₄ ně₃ jmo₃ bá₄ ca₂le₃jě₃ lia'₂
 con'₂ lě₅ jág₁ tí₅ quió'₅, jui₁'e₂ guě₃ ca₂le₃jín₃ dsa₂ tsá₃
 tí₅ jág₁ quió'₅; ia₁ ne₄ Si₂ juá'₂:

ia₁jaun₂ le₃lí'₄ dsa₂ a₂lín'₅ i₂dsen₃

jui₁lia'₂ jě₁dsia'₂ jág₁,

ia₁jaun₂ bá₄ léng'₂

jě₁ma₂tě₂ rē₁con₂ dsa₂ 'í₁ ja₁cong'₂.†

⁵ La₁ ně₁juá'₂ tí₅ ta₁ dsáu₁ jniog₄ a₂rē₂jniá'₂ Diú₄
 a₂lín₅ i₂dsen₃, ¿'e₂ le₃juá'₅₄ jniog₄ ně₃? ¿'An₁ tsá₃ rē₂
 qui₃dsi₅ Diú₄ 'éi'₃ ně₁juá'₂ ca₂rē₃'néi₃ 'ě₂ uig₅ ja₁con₂
 jniog₄? (A₂lě₁juá'₅ jniá'₂ lia'₂ jě₁juá'₂ dsa₂ mi₂güí'₃
 bá₄.) ⁶ ¡Dsón'₂ bá₄ on₃juá'₅₄ le₂ně₅! Ia₁ juá'₅₄ mei'₂
 guě₃ tsá₃ rē₂ qui₂dsi₅ Diú₄ 'éi'₃, ¿'a₂ bá₄ lia'₂ le₃con₂
 'í₁ ja₁con₂ dsa₂ mi₂güí'₃?

⁷ La₁ ně₁juá'₂ jág₁ tě₂jág₁ quió'₃ tí₅ ta₁ ia₁jaun₂ lě₅
 a₂rē₂jniá'₂ guě₄ jág₁ dsau₅ quió'₅ Diú₄ ia₁jaun₂ tě₂le₃
 dse₃ guě₄ chéin'₅, ¿'e₂ lě₃ qui₂dsi₅ Diú₄ 'éi'₃ a₂rín₂ jniá'₂
 dso₄? ⁸ ¿Ja₁lín₃ guě₄ dse₃ juá'₅₄ caun₂ a₂jmo₅₄ a₂'lig'₅₄,
 ia₁jaun₂ jiá'₃ a₂dse₃? A₂le₂ně₅ bá₄ chi₂'ag₅ i₂lín₅₄ 'ag₂₃
 jnia'₅₄ a₂jme₂tín₂ jnia'₅₄ dsa₂. La₁ gue₃ bá₄ uig₅ dsa₂
 i₂dsi₂jio₅ dsí₅ le₂ně₅ 'a₂ con'₂ ca₂tín₂.

Ca₂le₃jág₃ bá₄ jniog₄ rě₂cáu'₄ dso₄

⁹ ¿'E₂ jaun₂ ně₃? ¿A₂dse₃ guě₄ tióng₂ jnia'₅₄ dsa₂
 judíos? ¡Dsau₅ bá₄ on₃juá'₅₄ le₂jaun₂! Ia₁ ma₂tě₂tsi'₅₄
 jág₁, co₂jaun₂ bá₄ dsa₂ judíos con'₂ dsi₂nau₂, caun₂
 bá₄ jui₅ tioin'₅₄ 'uig₅₄ dsáu₁. ¹⁰ Lě₅ jui₁lia'₂ juá'₂ ne₄
 Si₂:

Ca₂lia'₂ 'i₁jan₂ dsa₂ tsá₃ chan₂

i₂jme₂ti₃ 'Éi'₃ quió'₅ Diú₄,

† 3:4 Salmo 51:4.

- ca₂lia'₂ 'i₁jan₂ tsá₃ chan₂;
- 11 tsá₃ i₂chan₂ jua'₅₄ i₂ŋí'₂ dsí'₅,
'i₁jan₂ tsá₃ chan₂ jua'₅₄ i₂'nio₃ 'na'₂ Diú₄.
- 12 Ca₂le₃jín₃ bá₄ ma₂i₂nio₄ cau₅ juí₅ ma₂i₂cóin'₅,
co₂dsia₅ bá₄ ma₂i₃léin₂ juí₅ ja₁tsá₃ ta₁ tí₄.
Tsá₃ 'ein₂ chan₂ ca₂lia'₂ 'i₁jan₂
jua'₅₄ i₂qui₂jmo₅ a₂dse₃,
ca₂lia'₂ 'i₁jan₂ tsá₃ chan₂.†
- 13 'Uě'₅ jág₁ 'lig'₅₄ le₂'o₅₄
juí₁lia'₂ ja₂ dsí₂ 'lig'₅₄ a₂'uě'₅ tau₂ 'ŋio₅ a₂rě₂na₄;
quian'₅₄ le₁tsí'₂ jmo₂₃ a₂juí₁gain₂.§
Ně₂jag₄ bá₄ náu₁ dsi₂mi'₂ 'a₄ mi₂'o₅₄.*
- 14 Jmá'₃ caun₂ a₂jaun₂ bá₄ juá'₂ dsa₂,
a₂uig₅ dsí'₅, a₂jme₃dsi'₃ ja₁con₂ riin'₅₄;†
- 15 Ma₂ně₃ bá₄ i₂ŋi₂₃ cán₂ tag₅₄
a₂dsi₃jme₁dsiain₂₃ riin'₅₄.
- 16 Léi₄ jě₁ca₂ŋi₅ ca₂quiog₂ caun₂ juí₅ a₂o₂i₁ dsi₅,
ja₁i₃'én₂ 'a₂ lia'₂ chan₂ dsa₂;
- 17 ia₁ tsá₃ cuí'₅ dsa₂ 'éi₂ juí₅ 'ei₅ tei₄;†
- 18 Tsá₃ a₂jaun₂ dsi₂jiog₅ dsí'₅
jua'₅₄ a₂gain₃ Diú₄.§
- 19 A₂ne₄ bá₄ jniog₄, ca₂le₃jě₃ jág₁ a₂tio'₅₄ ne₄ Si₂
'Éi'₃ quió'₅ Diú₄, a₂juá'₂ tsí'₅ ca₂le₃jín₃ i₂ca₂tín₂ 'Éi'₃
jaun₂, ia₁jaun₂ jmo₃ tei₄ mi₂'o₄ ca₂le₃jín₃, ia₁jaun₂
ca₂le₃jín₃ dsa₂ mi₂güí₃g₃ tē₃tsin'₅₄ rě₂cáin'₄ ne₄ Diú₄.
- 20 Ia₁ ca₂lia'₂ 'i₁jan₂ tsá₃ 'ein₂ jín₂ Diú₄ a₂tsá₃ dso₄

† 3:12 Salmo 14:1-3; 53:1-3; Eclesiastés 7:20. § 3:13 Salmo 5:9.

* 3:13 Salmo 140:3. † 3:14 Salmo 10:7. † 3:17 Isaías 59:7-8.

§ 3:18 Salmo 36:1.

rë₂cáin'₄ jua'₅₄ a₂jme₃ti₃ a₂juá'₂ 'Éi'₃, ia₁ 'ñiog₅ bá₄ 'Éi'₃ quí'₅ ta₁ a₂le₃ne₄ jniog₄ a₂lág₅ dsa₂ cha₂ dsáu₁.

A₂lión₂ dsa₂ të₂le₃ a₂jñia'₅₄ quian'₅₄ a₂'éin₂ bá₄

²¹ La₁ në₃ në₃, ma₂ca₂jme₃jnia₅ bá₄ Diú₄ jui₅ a₂tsá₃ ma₃dso₄ rë₂cáu'₄ jniog₄, on₃jua'₅₄ të₂le₃ quian'₅₄ Si₂ 'Éi'₃, ju₁'e₂ guë₃ jáng'₅ jág₁ dsau₅ jui₅ jaun₂ a₂juá'₂ ne₄ Si₂ tio'₅₄ 'Éi'₃, quian'₅₄ Si₂ a₂qui₂ca₂jmo₃ dsa₂ i₂jme₁'ë₂ jág₁ quián₅ Diú₄ në₃. ²² Jáng'₅ jág₁ dsau₅ jui₅ dse₃ quió'₅ Diú₄ a₂tsá₃ dso₄ rë₂cán'₄ dsa₂, jñia'₅₄ lia'₂ të₂le₃ quian'₅₄ a₂'éin₂ të₂le₃ quió'₅ Jesucristo; tsá₃ jma₃quén₅ jmo₂₃ ja₁con₂ ju₁'ein₂ guë₃; ²³ ia₁ ca₂le₃jín₃ bá₄ ma₂qui₂ma₂'náu₂ dso₄, jaun₂ uíng₂ lín₃ bá₄ tíoin₂ ja₁qui₂tág₅ co₂'né'₅ quió'₅ Diú₄. ²⁴ La₁ Diú₄ në₃, ia₁ a₂'ua₁ dsí₅ bá₄ 'ë₂ jág₁ a₂tsá₃ dso₄ rë₂cáin'₄, on₃jua'₅₄ a₂'nió'₅ quí'₃ 'lia'₅₄. A₂lë₁lió₂ bá₄ të₂le₃ quian'₅₄ Cristo Jesús i₂ca₂quí₃ o₄quió'₄ dsáu₁ dsa₂. ²⁵ Ca₂chen'₃ Diú₄ ja₁ñi'₅₄ ia₁jaun₂ dsian₅ dsáu₁ dsa₂ mi₂güí₃ quian'₅₄ jmi₂ 'ain₅₄ a₂ca₂tein₃. A₂lë₁gue₅ bá₄ dsa₂ a₂jaun₂ jmá'₃ të₂le₃ quian'₅₄ a₂'éin₂. Le₂në₅ ca₂rë₃jniá₂ Diú₄ i₂lín₅ i₂qui₃dsí₅ 'éi'₃ rë₂, ia₁ a₂ma₂ca₂jme₃juin'₂ dsí₅ a₂ma₂ca₂ñág₃ bá₄ dsáu₁ dsa₂ a₂jme₁'no₂₃ ma₂líg'₂. ²⁶ Le₂në₅ ca₂jmo₃ Diú₄ a₂ca₂jme₃jñiai₂₃ a₂rë₂ qui₃dsí₂₃ 'éi'₃, a₂ca₂jme₃jñiai₂₃ a₂jín₂ dsa₂ i₂'én₂ të₂le₃ quió'₅ Jesús në₂jag₄ bá₄ a₂ca₂jme₃ti₃.

²⁷ ¿'E₂ bá₄ ca₂lë₃ jaun₂ në₃ quian'₅₄ a₂jmo₅ dsa₂ táin'₅? Co₂dsia₅ të₂tsi'₅₄ cau₅ bá₄ a₂jaun₂. ¿'E₂ 'uig₅₄? ¿'An₁ 'uig₅₄ a₂jme₃ti₃ dsa₂ 'Éi'₃? Jan₂'ón₄. 'Uig₅₄ ia₁ a₂'én₂ bá₄ dsa₂. ²⁸ Ma₂në₂quiong₅₄ bá₄ jniog₄ 'í₁ jaun₂ në₃, a₂jín₂ Diú₄ dsa₂ në₂jag₄ bá₄ a₂ca₂jme₃ti₃,

'uig₅₄ ia₁ a₂'éin₂, jaun₂ tsá₃ 'e₂ 'í₁ con₂ guě₄ jua'₅₄
a₂ca₂jme₃ti₃ o₃ tsá₃ ca₂jme₃ti₃ 'e₂, con'₂ lě₅ 'Éi'₃.

29 ¿O₃ bá₄ lín₅ Diú₄ ca₂ne₅₄ jmá'₃ i₂quián₅ dsa₂
judíos? ¿On₁jua'₅₄ i₂quián₅ dsi₂nau₂ ján₃? Ján₅.
I₂quián₅ 'éi₂ bá₄ ján₃, 30 ia₁ jan₂ tan₅₄ bá₄ Diú₄
chan₂; jaun₂ 'éi₂ bá₄ jág₃ jín₂ dsa₂ i₂rě₂uīng₄ ni₁lo₁
ně₂jag₄ bá₄ a₂ca₂jme₂ti₃, 'uig₅₄ ia₁ a₂'éin₂; ján₃ bá₄
le₂jaun₂ jág₃ jín₂ dsa₂ i₂tsá₃ rě₂uīng₄ ni₁lo₁ ně₂jag₄
bá₄ a₂ca₂jme₃ti₃, o₄quió'₄ a₂'éin₂. 31 ¿'E₂ jua'₂ jniog₄
jaun₂ ně₃? ¿A₂tsá₃ ta₁ tí₄ 'Éi'₃ ia₁ a₂'éin₂ jniog₄?
¿Dsón'₂ tsá₃ le₂jaun₂! 'Nió'₄ tē₂le₃ cuē₂ bá₄ jniog₄ bí₂
a₂quen₅ 'Éi'₃.

4

'A₂ lia'₂ tē₂tsin'₅₄ Abraham ne₄ Diú₄

1 ¿'E₂ lé₂ le₃jua'₅₄ jniog₄ jaun₂ ně₃? ¿'E₂ ca₂dsó'₂
Abraham dsa₂ juin'₂ quián₂ jnia'₅₄ ma₂líg'₂, lia'₂
jme₁lín₄ dsa₂ mi₂güig₃? 2 Jua'₅₄ mei'₂ guě₃ Diú₄
ca₂chi'₃ jág₁ jua'₅₄ a₂dsen₃ 'éi₂ tē₂le₃ quian'₅₄ 'e₂
a₂ca₂jmo₃, jua'₅₄ a₂ca₂jme₃ti₃ 'Éi'₃, jaun₂ jme₁cha₂
jui₅ a₂jme₁jmo₃ rói₂. La₁ on₃jua'₅₄ ne₄ Diú₄. 3 Jaun₂,
¿'e₂ juá'₂ ne₄ Si₂? “Ca₂rě₃'én₂ bá₄ Abraham jág₁
ca₂cuē₃ Diú₄; jaun₂ 'uig₅₄ ia₁ a₂ca₂rě₃'éin₂ jaun₂ ně₃,
ca₂guéi'₂ Diú₄ ně₂jag₄ bá₄ a₂ca₂jme₃ti₃.”* 4 Jaun₂
ně₃, ju₁lia'₂ jan₂ dsa₂ i₂jme₂ti₃ ta₁ quió'₅ jan₂ juig₅₄,
cu₄ a₂lí'₂ jaun₂ quió'₅, on₃jua'₅₄ a₂lě₁cuē₃ juig₅₄, ia₁
a₂ma₂rīn₂₃ quió'₅ 'éi₂ 'lia'₅₄ ta₁ quió'₅. 5 La₁ ně₁jua'₂
'ein₂ tē₃tsá₃ 'e₂ jmo₂₃, 'éin₂ a₂guén'₅ Diú₄ dsa₂ i₂cha₂
dsáu₁, Diú₄ guéi'₂ quió'₅ ně₂jag₄ bá₄ dsa₂ dsen₃,

* 4:3 Génesis 15:6. Ján₃ bá₄ le₂ně₅

o₄quió'₄ a₂'éin₂. ⁶ 'Njio₅ bá₄ David juá'₂ a₂dsen₃ ju₁lia'₂ dsa₂ i₂guéi'₂ Diú₄ nē₂jag₄ bá₄ a₂tsá₃ ma₂'e₂ dsáu₁ cha₂, tsá₃ 'e₂ 'í₁ con₂ Diú₄ 'a₂ lia'₂ ca₂jme₃ti₃.

⁷ Ca₂juá'₂ David:

'E₂ gué₄ dsen₃ ju₁lia'₂ dsa₂ i₂ca₂'én₂ Diú₄ dsáu₁,
i₂ca₂jlě₂ Diú₄ dso₄ a₂ca₂'náu₂.

⁸ 'E₂ gué₄ dsen₃ dsa₂ i₂ca₂jmo₃ Te₁gui'₅₄ dsí₅
a₂tsá₃ dso₄ riin₂.†

⁹ A₂dse₃ nē₅ ně₃, ħ₁dse₃ jmá'₃ lia'₂ ca₂ne₅₄ quió'₅ dsa₂ i₂rē₂uing₄ ni₁lo₁, o₃ bá₄ le₂jiog₅ a₂dse₃ quió'₅ i₂tsá₃ 'e₂ rē₂uing₄ quió'₅ bá₄ ján₃? Ma₂nē₂jua'₅₄ jnia'₅₄ a₂ca₂guén'₂ Diú₄ Abraham nē₂jag₄ bá₄ a₂ca₂jme₃ti₃ 'éi'₃, 'uig₅₄ ia₁ a₂'éin₂. ¹⁰ ħ₁A₂ lia'₂ jme₁lín₄ Abraham lia'₂ con'₂ ca₂guéi'₂ jaun₂? ħ₁Ca₂guéi'₂ cang₂ lia'₂ con'₂ jme₁ma₂ti₃ Abraham quió'₅, o₃ le₂jnia'₅ 'e₂? Le₂jnia'₅ bá₄, on₃jua'₅₄ cang₂. ¹¹ Cang₂ jaun₂ bá₄ ca₂gue₃ Abraham 'éi'₃ jaun₂ a₂ti₃ ni₁lo₁₂, a₂lín₅ léi₄ co₂'nió'₄ caun₂ sello quió'₅ Diú₄ a₂ma₂guéi'₂, nē₂jag₄ bá₄ dsa₂ i₂ca₂jme₃ti₃, 'uig₅₄ ia₁ a₂'éin₂. Le₂nē₅ bá₄ ca₂dsióg₃ Abraham a₂ca₂lín₃ cho'₅₄ ca₂le₃jín₃ i₂'én₂ ján₃, o₁jnia'₅₄ tsá₃ ma₂gue₃ 'éi'₃ jaun₂ a₂úing₃ quió'₅. Jaun₂ le₂nē₅ bá₄ guén'₂ Diú₄ ján₃ dsa₂ tsi₁jon₂ 'éi₂ nē₂jag₄ bá₄ a₂lín₅ dsa₂ i₂ca₂jme₃ti₃. ¹² Dsau₅ bá₄ a₂lín₅ Abraham cho'₅₄ ca₂le₃jín₃ i₂ma₂gue₃ 'éi'₃ jaun₂ a₂úing₃ quió'₅, la₁ on₃jua'₅₄ jmá'₃ 'uig₅₄ ia₁ a₂rē₂uing₄ quió'₅; ján₃ bá₄ 'uig₅₄ ia₁ a₂quian₅ ju₁5 a₂'éin₂ jaun₂, ju₁lia'₂ ca₂can₃ Abraham jme₁2 jnia'₅₄ lia'₂ con'₂ tsá₃ ma₂úing₂ quió'₅.

*Tě₂le₃ quian'₅₄ a₂'én₂ bá₄ dsa₂jme₃ti₃ Diú₄ jág₁ quió'₅
a₂ma₃cuě₃*

† 4:8 Salmo 32:1-2.

13 Jaun₂ ca₂cuë₃ Diú₄ jág₁ quió'₅ ca₂cuë'₃ Abraham quiain'₅₄ chi'₂-guein₂ quiáin₅, a₂gue₃ gua'₅₄ 'uë₃ a₂cuë₃ Diú₄; la₁ on₃jua'₅₄ ia₁ a₂ca₂jme₃ti₃ Abraham 'Éi'₃, tē₂le₃ ia₁ a₂caun₂ 'éin₂ jág₁ a₂cuë₅ Diú₄, ton'₂ ca₂guéi'₂ Diú₄ nē₂jag₄ bá₄ a₂ca₂jme₃ti₃ 'Éi'₃. 14 Jua'₅₄ mei'₂ guē₃ jmá'₃ i₂jme₂ti₃ 'Éi'₃ bá₄ gue₅ a₂dse₃ a₂cuë₅ Diú₄ cuē'₅ chi'₂-guein₂ quiáin₅, jaun₂ tsá₃ ma₃'e₂ ta₁ tí₄ a₂'én₂ dsa₂, ton'₂ ján₃ guē'₂ le₂jaun₂ jág₁ a₂cuē'₄ quió'₅ Diú₄ tsá₃ ma₃quen₅. 15 Ia₁ juí₅ a₂'ne₂ Diú₄ bá₄ jiog₅ 'Éi'₃, la₁ ja₁tsá₃ 'Éi'₃ ca₂tín₂, tsá₃ 'ein₂ dsi₂juin₅₄ ja₁jaun₂.

16 'Uig₅₄ jaun₂, o₄quió'₄ a₂'én₂ dsa₂ cuē₅ Diú₄ a₂dse₃ cuē'₅ chi'₂-guein₂ quiáin₅, ia₁jaun₂ chi'₃ tiá₂ jág₁ a₂cuē'₄ ne₄ a₂'ua₁ dsí₅, ia₁jaun₂ dsón'₂ jaun₂ bá₄ jág₁ a₂gue₃ ca₂le₃jín₃ tsi₁jon₂ Abraham, on₃jua'₅₄ jmá'₃ quió'₅ dsa₂ i₂qui₂rē₂ti'₅₄ 'Éi'₃; quió'₅ ca₂le₃jín₃ i₂'én₂ bá₄ ján₃ juí₁lia'₂ jme₁'én₂ Abraham. Jaun₂ 'éi₂ bá₄ já₅ co₂'nió'₄ lín₅ jmei₂ jniog₄ ca₂le₃jág₃. 17 Juí₁lia'₂ juá'₂ ne₄ Si₂: “Ne₂ ma₂tsín'₂ jniá₂ a₂lín'₅ cho'₅₄ dsa₂ chan₂ 'lióng₂ juig₂ nación.” † Jaun₂ 'éi₂ bá₄ i₂lín₅ jmei₂ jniog₄ ne₄ Diú₄, ton'₂ ca₂'éin₃ jág₁ quió'₅ Diú₄ 'éi₂ i₂ton'₂ jme₂dsí₂ dsa₂ i₂ma₂dsan₃, ján₃ guē'₂ tē'₂ a₂tsá₃ ma₂cha₂ nē₂jag₄ bá₄ a₂ma₂cha₂.

18 Juí₁'e₂ guē₃ tsá₃ ma₃'e₂ jmig₄ jme₁ma₃cha₂ ja₁con₂ Abraham lia'₂ con'₂ lē₅ lín₂ dsa₂ mi₂güig₃, tē₂le₃ ia₁ a₂ca₂rē₃'éin₂ jág₁ quió'₅ Diú₄, ca₂dsióg₃ “a₂lín₅ jmei₂ dsa₂ chan₂ 'lióng₂ juig₂”, lia'₂ con'₂ lē₅ ca₂juá'₂ Diú₄: “co₂nē₅ tén₅ chi'₂-guein₂ dsió'₂ lé₂.” §

† 4:17 Génesis 17:5. § 4:18 Génesis 15:5.

19 Jui'e₂ guě₃ jme₁ma₂'en₅₄ Abraham con'₂ 'ŋiá₂₋
 láu₂ ŋi₂, lí'₄ bá₄ 'ŋiog₅ a₂ma₂guen'₂ ni₁ŋi₁₂, ján₃ guě'₂
 le₂jaun₂ Sara quiáin₅ ně₃ co₂ně₅ a₂ma₂chain₂ dsiáin₃
 bá₄, tsá₃ ma₃'ein₂ guein₂ lé₂ le₃cáin₂, la₁ tsá₃ ca₂'uáin₂
 quian'₅₄ jág₁ a₂ma₂chan'₂. 20 Tsá₃ ca₂'ág₂ caun₂₋
 tin₃ dsí₅ jua'₅₄ a₂tsá₃ 'éin₂ jág₁ a₂ca₂cuě₃ Diú₄, tē₂le₃
 ca₂i₃tsón₂ bá₄ bí₂ a₂'éin₂, ton'₂ ca₂jme₃juin'₂ Diú₄,
 21 caun₂ bá₄ 'ei₅ dsí₅ a₂'io₅ Diú₄ jui₅bí₂ a₂jme₃ti₃
 jág₁ quió'₅ a₂ca₂cuě₃. 22 'Uig₅₄ jaun₂ ca₂guéi'₂ Diú₄
 ně₂jag₄ dsa₂ i₂ca₂jme₃ti₃.

23 Jág₁ ně₅, “a₂ca₂guéi'₂ Diú₄”, ca₂i₃to'₅₄ ne₄ si₂,
 on₃jua'₅₄ a₂'in₂₃ jmá'₃ Abraham; 24 a₂'ag₂₃ jniog₄
 bá₄ ján₃. 'Uig₅₄ ia₁ a₂'éin₂ jniog₄, guéi'₂ Diú₄ a₂lág₅
 jniog₄ ně₂jag₄ bá₄ dsa₂ dsen₃ i₂ca₂jme₃ti₃ con'₂ i₂'én₂
 tē₂le₃ quió'₅ Diú₄ i₂ca₂jme₃jen'₅₄ Jesús jin₄ 'lag₄. Jesús
 bá₄ i₂lín₅ Te₁gui'₅₄ quián₂ jniog₄, 25 i₂ca₂jín'₂ dsa₂
 a₂jóin₂ ne₄ 'uig₅₄ dsáu₁ jniog₄, con'₂ siá'₂ ca₂jein'₅₄
 táng₃ ia₁jaun₂ guéi'₂ Diú₄ jniog₄ ně₂jag₄ dsa₂ dsen₃
 i₂ca₂jme₃ti₃.

5

Lé₂ le₃chong₂ jniog₄ 'ei₅ tei₄ quian'₅₄ Diú₄

1 Le₂ně₅ jaun₂, ia₁ a₂ma₂'ě₂ Diú₄ jág₁ a₂tsá₃ 'e₂ dso₄
 rē₂cáu'₄ jniog₄, 'uig₅₄ ia₁ a₂'éin₂, ma₂chong₂ jniog₄
 'ei₅ tei₄ quian'₅₄, tē₂le₃ quian'₅₄ Te₁gui'₅₄ Jesucristo
 quián₂. 2 Ia₁ tē₂le₃ quian'₅₄ Cristo 'éi₂ bá₄ ma₂i₃to'₅₄
 jniog₄ ja₁jme₂gu'₅₄ Diú₄ ia₁ a₂'ua₁ dsí₅, tē₂le₃ ia₁
 a₂'éin₂. Ja₁dse₃ ně₅ ně₃, tíong₂ jniog₄ tiá₂ 'io'₂ jein₂,
 ia₁ 'ín₂ dsí₅ jniog₄ a₂dsón'₂ jme₁quian'₅₄ Diú₄ jē₄
 co₂tág₅ co₂'né'₅ quió'₅. 3 On₃ rē'₂ jua'₅₄ jmá'₃ a₂ně₅;
 jmo₂ jniog₄ 'io'₂ ne₄ o₂i₁ dsí₅ a₂qui₂dsi₂ŋág₂; ia₁ ne₄

jniog₄, quian'₅₄ o₂i₁ dsi₅ bá₄ qui₂rë₂juin'₂ dsi₅ jniog₄.
 4 A₂juin'₂ dsi₅ jniog₄ jaun₂, jmo₅ a₂chei'₂ rë₂ jniog₄
 'a₂ lia'₂ lág₅; a₂tióng₂ jniog₄ rë₂ jaun₂ ně₃, jmo₅ a₂'ín₂
 dsi₅ jniog₄ jmig₄ a₂le₃ti₃. 5 Jm_{ig}₄ a₂'ín₂ dsi₅ jniog₄
 jaun₂, tsá₃ lé₂ le₃jmo₃ jua'₅₄ jéin₂ jniog₄ o₂gui'₃, ia₁
 'ñiog₅ Diú₄ ma₂ca₂jme₃cain'₂ jme₂dsí₂ quián₂ jniog₄
 ia₁ a₂ñí₄ lë₃ 'nio₃ jniog₄, tē₂le₃ quian'₅₄ Jme₂dsí₂ Jñió₅
 i₂ma₂cuin₃.

6 Ia₁ lia'₂ con'₂ jme₁lág₄ jniog₄ dsa₂ mi₂güig₃ 'uan₅₄
 i₂tsá₃ cha₂ jui₅ 'a₂ lia'₂ lion₄ guio₅₄, la₁ jme₁ca₂tē₂
 jmig₄ a₂ca₂tióng₃ Diú₄, jaun₂ ca₂jon₃ bá₄ I₂rë₂'ín₁
 quián₅ o₄quió'₄ dsa₂ i₂tsá₃ Diú₄ cuin₅. 7 A₂quian₅
 ta₁ lin₃ bá₄ jua'₅₄ mei'₂ guë₃ jan₂ dsa₂ lé₂ le₃guein₃
 'mú₃ o₄quió'₄ jan₂ dsa₂ mi₂güig₃ riin'₅₄, ca₂lia'₂
 jñia'₅₄ o₄quió'₄ jan₂ dsa₂ i₂jmo₅ rë₂; 'an₁ mei'₂ tsá₃
 chan₂ jan₂ i₂lé₂ le₃tiá₂ dsi₅ guen₃ 'mú₃ o₄quió'₄ jan₂
 dsa₂ i₂dse₃ dsi₅ dsón'₂. 8 La₁ ma₂ca₂cuë₃, bá₄ Diú₄
 léi₄ a₂dsón'₂ 'nio₃ jniog₄, ia₁ a₂ca₂jon₃ Cristo 'uig₅₄
 quián₂, lia'₂ con'₂ jme₁lág₄ guë₄ dsa₂ cha₂ dsáu₁.
 9 A₂jaun₂ ně₃, 'uig₅₄ ia₁ a₂ma₂'ë₂ Diú₄ jág₁ tē₂le₃
 quian'₅₄ jmi₄ Cristo a₂ca₂tang₂, a₂tsá₃ ma₂dso₄ rag₂,
 jaun₂ tē₂le₃ i₂jui'₂ guë₄ lió₂ jniog₄ tē₂le₃ quian'₅₄ 'éi₂
 a₂gau₂ a₂'ne₂ Diú₄ a₂jjiá₃ jë₁ca₂tó'₂. 10 Ia₁ chi₂jua'₂
 ma₂ca₂'ág₂ Diú₄ caun₂ jág₁ quian'₅₄ jniog₄ tē₂le₃
 quian'₅₄ 'mú₃ a₂ca₂l₃ñí₂ Ja₁ñi'₅₄ lia'₂ con'₂ jme₁lág₄
 guë₄ jniog₄ dsa₂ i₂'ñia₅₄ 'éi₂, ján₃ bá₄ le₂jaun₂ tē₂le₃
 i₂jui'₂ guë₄ lió₂ jniog₄ 'uig₅₄ ia₁ a₂chain₂, ně₃ lia'₂
 ma₂'ei₅ caun₂ jág₁ quian'₅₄. 11 Ia₁ on₃ guë'₂ jua'₅₄
 jmá'₃ a₂në₅, ia₁ chong₂ jniog₄ jme₁'ñió₄ dsi₅ ján₃
 le₃quió'₅ Diú₄ tē₂le₃ quian'₅₄ Te₁gui'₅₄ Jesucristo,
 ia₁ tē₂le₃ quian'₅₄ Cristo bá₄ ca₂dsi₃náu₅ jniog₄ 'ei₅

caun₂ jág₁ quian'₅₄ Diú₄.

Adán quian'₅₄ Cristo

¹² Le₂ně₅ jaun₂, ju₁lia'₂ tē₂le₃ quian'₅₄ jan₂ dsa₂ ca₂rě₃chá₃ dsáu₁ dsa₂ mi₂güí₃, 'uig₅₄ ně₅ bá₄ ca₂já₃ 'mú₃, le₂ně₅ bá₄ já₃n₃ ca₂ŋag₅ 'mú₃ ja₁con₂ ca₂le₃jín₃ dsa₂ mi₂güí₃, ia₁ ca₂le₃jín₃ bá₄ ca₂'náu₂ dso₄. ¹³ Le₂ŋjá₅, lia'₂ con'₂ tsá₃ 'Éi'₃ jme₁ma₂ron₅, ma₂qui₂'no₅ bá₄ dsa₂ dso₄ mi₂güí₃, la₁ tsá₃ lé₂ le₃jíó₂ 'í₁ 'e₂ a₂rin₂ dsa₂ ja₁tsá₃ 'éi'₃ cha₂. ¹⁴ La₁ ca₂le₃ jme₁chan₂ Adán, ca₂lia'₂ ca₂tě₂ jmí₃g₄ a₂jme₁chan₂ Moisés, ca₂'io₃ 'mú₃ ju₁bí₂ ne₄ quió'₅ dsa₂ i₂qui₂ca₂'náu₂ dso₄, o₁ŋjá₅ dsáu₁ dsa₂ jaun₂ on₃jua'₅₄ a₂ca₂i₃juin₅₄ dsa₂ caun₂ 'éi'₃ ju₁lia'₂ ca₂jmo₃ Adán; jme₁lín₄ Adán co₂'nió'₄ caun₂ nió'₄ quió'₅ i₂jiá₃ chi₁quín₃.

¹⁵ La₁ dsáu₁ Adán ně₃, tsá₃ lé₂ le₃quin₃ quian'₅₄ a₂lě₁cuě₅ Diú₄ jniog₄. Ia₁ ju₁lia'₂ o₄quió'₄ dsáu₁ jan₂ dsa₂, juin₅ i₂ca₂dsan₃, já₃n₃ bá₄ le₂jaun₂ tē₂le₃ lě₅ guě₄ a₂'ua₁ dsí₅ Diú₄ a₂lió₂ a₂lě₁ma₂cuě'₃ co₂ŋí₂ dsa₂ juin₅ tē₂le₃ quian'₅₄ jan₂ tan₅₄ dsa₂ i₂'ua₁ dsí₅. Dsa₂ 'éi₂ lín₅ Jesucristo. ¹⁶ Dso₄ a₂ca₂'náu₂ jan₂ dsa₂ tsá₃ lé₂ le₃quin₃ quian'₅₄ a₂lió₂ Diú₄ a₂cuě₂₃ jniog₄; ia₁ jme₁ca₂cáun₂ Diú₄ 'í₁ dso₄ a₂ca₂rě₃cán'₂ jan₂ dsa₂, jaun₂ ca₂já₃ ju₁ a₂ca₂qui₃dsi₅ Diú₄ 'éi'₃ ja₁con₂ dsa₂ mi₂güí₃; la₁ ju₁lia'₂ a₂lión₂ dsa₂ ně₃, a₂lě₁'ě₂ Diú₄ co₂ŋí₂ bá₄ jág₁ a₂tsá₃ 'e₂ dso₄ rin₂ dsa₂, ju₁'a₂ guě₃ la₂ qui₂ma₂'náu₂ 'lióng₂ dso₄. ¹⁷ Chi₂jua'₂ ca₂'io₃ bí₂ 'mú₃ ne₄ ca₂le₃jín₃ dsa₂ o₄quió'₄ dsáu₁ jan₂ dsa₂, tē₂le₃ i₂ju₁'₂ guě₄ 'ŋio₅ tson₂ a₂'ua₁ dsí₅ Diú₄ ja₁con₂ dsa₂ i₂guéin'₂ ně₂jag₄ bá₄ a₂tsá₃ 'e₂ dso₄ rin₂, a₂'io₂₃

bí₂ a₂le₃chain₂ dse₃ të₂le₃ quian'₅₄ jan₂ dsa₂, i₂lín₅ Jesucristo.

18 Jaun₂ lë₃, jui₁lia'₂ dsáu₁ Adán ca₂chein'₃ ca₂le₃jín₃ dsa₂ jui₅ ja₁'ë₃ Diú₄ uig₅, le₂në₅ bá₄ ján₃, ta₁ a₂quí'₅ a₂dse₃ a₂ca₂jmo₃ Jesucristo ca₂cain₃ ca₂le₃jín₃ dsa₂ jui₅ ja₁lé₂ le₃chain₂ dse₃, ja₁guéi'₂ Diú₄ në₂jag₄ bá₄ a₂tsá₃ 'e₂ dso₄ riin₂. 19 Co₂'nió'₄ le₃jua'₅₄, ia₁ jui₁lia'₂ tsá₃ gau₂ ca₂nág₂ jan₂ dsa₂ 'éi₂, jaun₂ juin₅ i₂ca₂rë₃chá₃ dsáu₁, ján₃ bá₄ le₂në₅, 'uig₅₄ ia₁ a₂ca₂nág₂ gau₂ jan₂ tan₅₄ dsa₂, jaun₂ juin₅ i₂guén'₂ Diú₄ në₂jag₄ bá₄ i₂ca₂jme₃ti₃.

20 Ca₂të₁ron₅₄ 'Éi'₃ ia₁jaun₂ dsi₃juin₅₄ gué₄ dso₄; la₁ ja₁'ñio₅ lín₃ gué₄ ca₂i₁juin₅₄ dso₄, jaun₂ 'ñio₅ lín₃ gué₄ ca₂jmo₃ Diú₄ ca₂i₃tsón₂ a₂'ua₁ dsí₅. 21 Jaun₂ le₂në₅ bá₄ jui₁lia'₂ ca₂tín₂ bí₂ dso₄ jui₅ a₂quian₅ 'mú₃, le₂në₅ bá₄ ján₃ ca₂'io₃ bí₂ a₂'ua₁ dsí₅ Diú₄ a₂jág₂ jniog₄ në₂jag₄ bá₄ dsa₂ i₂ca₂jme₃ti₃, a₂cuë₃ a₂le₃chong₂ jniog₄ dse₃ co₂tan₅₄ të₂le₃ quian'₅₄ Te₁gui'₅₄ Jesucristo quián₂ jniog₄.

6

Ma₂dsau₃ të₂le₃ quió'₅ dsáu₁, la₁ chong₂ le₃quió'₅ Cristo

1 ¿'E₂ jua'₅₄ jniog₄ jaun₂ në₃? ¿A₁caun₂ dse₃ 'nióg₁ bá₄ jniog₄ dso₄ ia₁jaun₂ caun₂ dsi₃tsón₃ a₂'ua₁ dsí₅ Diú₄ quian'₅₄ jniog₄? 2 ¡Dsón'₂ bá₄ on₃jua'₅₄ le₂në₅! Ia₁ ma₂ca₂dsau₃ bá₄ jniog₄ le₃quió'₅ dsáu₁; ¿'a₂ bá₄ lia'₂ lé₂ jaun₂ në₃ jua'₅₄ a₂caun₂ chong₂ jniog₄ le₃quió'₅ dsáu₁? 3 ¿Tsa₁ ñi'₅₄ 'nia'₂, lia'₂ con'₂ jme₁ca₂tió'₄ jniog₄ jmig₂ le₃quió'₅ Cristo Jesús, ca₂tió'₄ jniog₄ 'mú₃ quió'₅? 4 Ia₁ jme₁ca₂tió'₄ jniog₄

jmig₂, co₂'nió₄ bá₄ ja₁jaun₂ ca₂'o₃ jniog₄ colë₅
 quian'₅₄ Cristo në₂jag₄ bá₄ a₂ca₂dsau₃, ia₁jaun₂
 jein'₅₄ táng₃ a₂le₃chong₂ caun₂ jme₂dsí₂ 'mí₂, ju₁lia'₂
 ca₂jen'₅₄ Cristo a₂jme₁rë₂join₅₄, të₂le₃ quian'₅₄ ju₁bí₂
 jlá'₁ quió'₅ Jmei₂.

⁵ Ia₁ chi₂jua'₂ ca₂jme₁quian'₅₄ jniog₄ ne₄ 'mú₃
 quió'₅, ján₃ bá₄ le₂jaun₂ tion₅₄ bá₄ jme₁quian'₅₄
 jë₁ma₂ca₂jein'₅₄ jniog₄ ju₁lia'₂ ca₂jen'₅₄ 'éi₂. ⁶ Ne₄
 bá₄ jniog₄, lia'₂ con'₂ lë₅ jme₁lág₄ le₂jníá₅, ne₄
 cróg₄ bá₄ ca₂ñó₃ a₂jaun₂ co₂lë₅ quian'₅₄ Cristo,
 ia₁jaun₂ dsí₃'ën₂ ju₁bí₂ a₂'io₅ dsáu₁ ne₄ ni₁ñi₁ jniog₄,
 ia₁jaun₂ tsá₃ ma₃lë₅ jua'₅₄ a₂qui₂rë₂'ñei'₅₄ guë₄
 a₂chong₂ qui₂jme₂tí₁ ta₁ ne₄ dsáu₁, në₂jag₄ bá₄
 ne₄ jan₂ juig₅₄ jniog₄. ⁷ Ia₁ ju₁lia'₂ i₂ma₂jon₅, tsá₃
 ma₂'e₂ rë₂'ñei'₅₄, ma₂lón₂ bá₄ ne₄ dsáu₁. ⁸ Chi₂jua'₂
 ma₂ca₂dsau₃ jniog₄ quian'₅₄ Cristo, ján₃ bá₄ le₂jaun₂
 'éin₂ a₂le₃chong₂ quian'₅₄ 'éi₂, ⁹ ia₁ ne₄ bá₄ jniog₄,
 con'₂ jme₁ca₂jen'₅₄ Cristo ne₄ 'mú₃, o₁líg'₂ jmig₄ tsá₃
 ma₃lë₂ le₃join₂; tsá₃ ma₂'e₂ ju₁bí₂ 'io₅ 'mú₃ ne₄ quió'₅
 'éi₂. ¹⁰ Ia₁ jme₁ca₂jon₃ Cristo, co₂ráun₂ bá₄ ca₂join₃
 'uig₅₄ dsáu₁ dsa₂; la₁ në₃ lia'₂ ma₂chain₂, chain₂
 le₃quió'₅ Diú₄. ¹¹ Le₂në₅ bá₄ 'nia'₂ ján₃, jmo₄ bá₄
 'nia'₂ 'au'₂ a₂ma₂dsang'₃ të₂le₃ quió'₅ dso₄, la₁ chan'₂
 bá₄ 'nia'₂ le₃quió'₅ Diú₄ të₂le₃ quian'₅₄ Cristo Jesús.

¹² A₂jaun₂ në₃, 'a₃ cuë₂ 'nia'₂ jmig₄ jua'₅₄
 a₂'io₃ guë₄ ju₁bí₂ dsáu₁ ne₄ ni₁ñi₁ 'nia'₂ a₂siá'₃,
 a₂qui₂chi₃quióng₂ jmig₄ a₂jme₁tí₄ 'nia'₂ a₂mi₅ ni₁ñi₅.
¹³ 'A₃ qui₁jin'₅₄ 'nia'₂ a₂tén₅ ni₁ñi₁ jua'₅₄ a₂'no₃ guë₄
 dso₄, co₂'nió₄ a₂jmó'₂ ta₁ a₂jmo₃ a₂'lig'₅₄. Të₂le₃
 ne₄ Diú₄ bá₄ jin'₅₄ 'nia'₂ a₂lín'₅ co₂'nió₄ dsa₂
 i₂ma₂dsan₃, i₂ma₂jen'₅₄ táng₃. Jang'₅₄ 'nia'₂ a₂tén₅
 ni₁ñi₁ le₃ja₁con₂ Diú₄, co₂'nió₄ a₂jmó'₂ ta₁ a₂jmo₃

jmá'₃ a₂dse₃, 14 Ia₁ tsá₃ 'io₃ guě₄ bí₂ dsáu₁ ne₄ quián'₂
'nia'₂ ně₂jag₄ bá₄ jan₂ juig₅₄ 'nia'₂, ia₁ tsá₃ o₄gú₃ 'Éi'₃
tion'₅₄ 'nia'₂; tē₂le₃ o₄gú₃ a₂'ua₁ dsí₅ Diú₄ bá₄ tion'₅₄
'nia'₂.

15 ħ'E₂ bá₄ jaun₂ ně₃? ħA₁caun₂ 'nióg₁ dso₄
bá₄ ia₁ tsá₃ o₄gú₃ 'Éi'₃ tio'₅₄ jniog₄, ia₁ ja'ua₁
dsí₅ Diú₄ bá₄ tíong₂? ħDsón'₂ bá₄ on₃jua'₅₄ le₂ně₅!

16 ħTsa₁ ŋi'₅₄ 'nia'₂, ně₁jua'₂ ca₂jĭn'₅₄ 'nia'₂ guiong'₅₄
o₄gú₃ jan₂ juig₅₄ a₂jme₁ti'₄ ta₁ ne₅₄, ma₂lín'₅ jan₂
i₂ma₂chi'₁ŋe'₅₄ i₂quián₅ dsa₂ 'éi₂? Ján₃ bá₄ le₂jaun₂,
ně₁jua'₂ ca₂jĭn'₅₄ 'nia'₂ guiong'₅₄ ne₄ dsáu₁, dsáu₁
jaun₂ i₂ma₂lín₅ juig₅₄ 'nia'₂, jiog₅ juí₅ 'mú₃; o₃
ně₁jua'₂ ca₂jĭn'₅₄ 'nia'₂ ne₄ a₂nág'₁ gau₂ jág₁ quió'₅
Diú₄, a₂jaun₂ bá₄ i₂ma₂lín₅ juig₅₄ 'nia'₂, jiog₅ juí₅
co₂dsau₅. 17 Juí₁'e₂ guě₃ jme₁rē₂qui'rē₂'ŋe'₂ 'nia'₂
le₂jĭniá₅ ne₄ dsáu₁, la₁ rē₂ně₃ ně₃, ti₁'mag'₄ Diú₄,
ma₂nei'₂ bá₄ 'nia'₂ gau₂ ca₂le₃jě₃ jme₂dsí₂ quiáng'₂
jág₁ quen₅ a₂ma₂rē₂jĭn'₅₄ 'nia'₂, a₂jme₂tíng'₂. 18 Jaun₂
ně₃ ma₂lón'₂ 'nia'₂ o₄gú₃ dsáu₁, ma₂tion'₅₄ bá₄ 'nia'₂
o₄gú₃ juí₅ co₂dsau₅. 19 (Juá'₅ jniá₂ juíg₂ 'nia'₂ lia'₂
con'₂ lě₅ jág₁ dsia₅ dsa₂ mi₂güí₃, ia₁ dsón'₂ bá₄
quian₅ ta₁ le₃ŋí'₂ 'au'₂ 'nia'₂ dse₃ ia₁ tē₂le₃ a₂lín'₅
'nia'₂ dsa₂ mi₂güí₃.) Ia₁ le₂jaun₂ bá₄ ján₃ juí₁lia'₂
qui₂ca₂jĭn'₅₄ 'nia'₂ le₂jĭniá₅ a₂tén₅ ni₁ŋi'₁ juí₅ ja₁tsá₃
nág'₂ gau₂, ja₁ca₂jme₁ti'₄ 'nia'₂ ta₁ ne₄ ca₂le₃jě₃ ne₅₄
a₂'lig'₅₄, le₂ně₅ bá₄ guě'₂ jang'₅₄ táng₃ 'nia'₂ a₂tén₅
ni₁ŋi'₁ ja₁jme₁ti'₄ ta₁ ne₄ juí₅ jĭnió₅ ja₁caun₂ le₃dsen'₃
'nia'₂.

20 Lia'₂ con'₂ jme₁lín'₄ guě₄ dsa₂ i₂qui'rē₂'ŋe'₅₄
le₃quió'₅ dsáu₁, tsá₃ jme₁rē₂'ŋeg'₅₄ jua'₅₄ a₂jme₂ti'₄
guě₄ 'nia'₂ ta₁ ne₄ juí₅ co₂dsau₅. 21 La₁ ħ'e₂ bá₄ a₂dse₃

ca₂lín₃ 'nia'₂ ca₂le₃jě₃ a₂jaun₂, a₂caun₂ lë₁₀o₂guí'₃
 quián'₂ 'nia'₂ rë₂ně₃? Ia₁ jmá'₃ lia'₂ ca₂ne₅₄ a₂dsióg₄
 ne₄ jui₅ 'mú₃ bá₄ a₂jaun₂. ²² La₁ rë₂ně₃ ně₃,
 ma₂lón'₂ 'nia'₂ jui₅ ja₁jme₁qui₂rë₂'ņe'₅₄ 'nia'₂ 'nau'₂
 dso₄, ma₂i₂ton'₅₄ 'nia'₂ jui₅ ja₁jme₁ti'₄ ta₁ ne₄ Diú₄,
 jaun₂ lén'₂ 'nia'₂ jui₅ jñi₅ ja₁caun₂ le₃dsen'₃ 'nia'₂,
 jui₅ ja₁dsióg₄ a₂le₃chan'₂ 'nia'₂ dse₃ co₂tan₅₄. ²³ Ia₁
 jñia'₅₄ lia'₂ 'mú₃ bá₄ lí'₂ dsa₂ co₂'nió'₄ 'lia'₅₄ dsáu₁, la₁
 a₂lë₁cuë₅ bá₄ Diú₄ a₂le₃chan₂ dsa₂ dse₃ co₂tan₅₄ të₂le₃
 quian'₅₄ Cristo Jesús i₂lín₅ Te₁gui'₅₄ quián₂ jñiog₄.

7

*Caun₂ jág₁ a₂jáng₅ léi₄ a₂jau'₂ ju₁lia'₂ ja₁con₂ dsa₂
 i₂rë₂jen'₂ gu₂*

¹ Rin'₅₄ jñiog₄, 'nia'₂ dsa₂ i₂cuí'₅ 'a₂ lia'₂ juá'₂ ne₄ Si₂
 'Éi'₃, ħtsa₁ ñi'₅₄ 'nia'₂ a₂'io₅ bí₂ 'Éi'₃ ja₁con₂ jan₂ dsa₂
 jmá'₃ tē₁lia'₂ chain₂? ² Ju₁lia'₂ jan₂ dsa₂ mí₂ i₂chan₂
 dsi₂i₂gu₂, co₂'nió'₄ a₂chi₁'ņei'₅₄ bá₄ quian'₅₄ dsi₂i₂gu₂
 lia'₂ con'₂ lě₅ ne₄ Si₂ 'Éi'₃, tē₁lia'₂ chan₂ dsa₂ ñe'₂. La₁
 nē₁juá'₂ ca₂jon₃ dsi₂i₂gu₂ ně₃, ca₂tsin'₂ bá₄ dsa₂ mí₂
 'éi₂ tē₂le₃ quió'₅ 'éi'₃ a₂jme₁le₁quian₅ quió'₅ quian'₅₄
 dsi₂i₂gu₂. ³ Nē₁juá'₂ ca₂guá'₂ 'io₅₄ quian'₅₄ dsa₂ ñe'₂
 sián'₂ tē₃ chan₂ dsi₂i₂gu₂, dso₄ bá₄ 'no₂₃; la₁ nē₁juá'₂
 ca₂jon₃ dsi₂i₂gu₂ ně₃, ca₂tsin'₂ bá₄ 'io₅₄ tē₂le₃ quió'₅
 'éi'₃, ma₂lé₂ bá₄ jéin'₂ táng₃ gu₂ quian'₅₄ dsa₂ ñe'₂
 sián'₂, tsá₃ ma₃dso₄ 'no₂₃.

⁴ Le₂ně₅ bá₄ ján₃, 'nia'₂ rin'₅₄ jñiog₄, ma₂dsan'₃
 'nia'₂ le₃quió'₅ 'Éi'₃ tē₂le₃ quian'₅₄ ñi₄ Cristo, ia₁jaun₂
 téng'₄ ja₁con₂ i₂sián'₂: ja₁con₂ 'éi₂ i₂ca₂jen'₅₄ táng₃
 ne₄ 'mú₃. Le₂ně₅ ca₂lě₃ ia₁jaun₂ le₃chong₂ jñiog₄
 téi₅ ta₁ ne₄ Diú₄. ⁵ Ia₁ lia'₂ con'₂ jme₁chong₂

jniog₄ lia'₂ jme₁jio₅ ni₁ŋi₁ jniog₄, ta₁ jaun₂ ca₂quí'₃ 'Éi'₃ a₂ca₂ŋei₃ jui₅ ni₁ŋi₁ jniog₄ a₂ca₂lě₃ ds_{i5} jmó₁ a₂'lig'₅₄, ca₂quí'₃ ta₁ a₂ca₂i₁jo₅₄ ne₄ 'mú₃. ⁶ La₁ rě₂ně₃ ně₃, ma₂dsau₃ le₃quíó'₅ Si₂ 'Éi'₃ a₂jme₁jio₅ jme₁le₁'ŋei'₅₄, a₂jme₁ti₁ ne₄ Diú₄ ju_{i5} 'm_{i2} quió'₅ Jme₂ds_{i2} quiáin₅, Jaun₂ tsá₃ ma₃tio'₅₄ jniog₄ le₁'ŋei'₅₄ ne₄ 'Éi'₃ a₂chi₁ton₅ ne₄ si₂.

Dso₄ a₂'i₄ ja₁ con₂ jniá₂

⁷ ¿'E₂ jua'₅₄ jniog₄ jaun₂ ně₃? ¿A₂lě₅ dso₄ bá₄ 'Éi'₃ jaun₂? ¡Dsón'₂ bá₄ on₃jua'₅₄ le₂jaun₂! La₁ jniá₂ ně₃ tsá₃ ca₂rě₃guion₅₄ 'e₂ jaun₂ dsáu₅, jua'₅₄ mei'₂ guě₃ tsá₃ 'Éi'₃ ron₅. Co₂'nió'₄ le₃jua'₅₄, tsá₃ 'e₂ ca₂rě₃guion₅₄, ju_{i1}lia'₂ a₂'ín₅ ds_{i3} a₂cha₂ quió'₅ i₂sián'₂, jua'₅₄ mei'₂ guě₃ tsá₃ a₂juá'₂ 'Éi'₃ ne₄ Si₂: “Tsá₃ lě₃jmo₂ 'ín₅ 'au'₂ a₂quíó'₅ dsa₂ sián'₂.”*

⁸ La₁ dsáu₁ ně₃ ca₂jme₃'ŋi₁ó'₃ bá₄ jág₁ ně₅; 'ŋiog₅ bá₄ 'Éi'₃ ca₂cuě₃ jmig₄ ca₂ŋei₃ tě₂ds_{i3} ca₂le₃jě₃ ne₅₄ a₂'ín₅ ds_{i3} a₂cha₂ quió'₅ i₂sián'₂. Ia₁ ju_{i1}lia'₂ ja₁tsá₃ 'Éi'₃ ron₅, tsá₃ léi₄ jniá₂ a₂cha₂ dsáu₅. ⁹ Já_{n3} bá₄ jme₁chang₂ caun₂ jmig₄ lia'₂ con'₂ tsá₃ 'Éi'₃ quió'₅ Moisés ma₂ca₂tíng₂. La₁ jme₁ca₂já₃ 'Éi'₃, co₂'nió'₄ a₂ca₂jen'₅₄ bá₄ táng₃ dsáu₁; jniá₂ guě'₂, co₂'nió'₄ a₂ca₂jong₃. ¹⁰ Le₂ně₅ bá₄ ca₂lě₃ quian'₅₄ 'ŋiog₅ 'Éi'₃ jaun₂; 'nió'₄ a₂jme₁cuě₃ bí₂ a₂le₃chan₂ jniá₂, tě₂le₃ ca₂jio₃ jui₅ 'mú₃ bá₄ a₂jaun₂. ¹¹ Ia₁ dsáu₁ ně₃, ca₂jme₃'ŋi₁ó'₃ bá₄ ne₄ 'Éi'₃ ja₁con₂ jniá₂, ca₂jme₃gau₂₃. Jaun₂ quian'₅₄ 'ŋiog₅ bá₄ 'Éi'₃, ca₂cuě₃ 'mú₃.

* **7:7** Éxodo 20:17; Deuteronomio 5:21.

12 Jaun₂ ně₃, a₂jñi₅ó₅ bá₄ Si₂ 'Éi'₃; ján₃ guë'₂ le₂jaun₂ ca₂le₃jě₃ 'éi'₃ tio'₅₄, a₂jñi₅ó₅, con₂ 'í₁ con'₂ dsi₂ten₅₄, a₂dse₃ lin₃ bá₄ a₂jaun₂. 13 ¿E₂ bá₄ jaun₂ ně₃? ¿Jui₁lia'₂ a₂dse₃ jaun₂ ca₂lě₃ 'mú₃ ja₁con₂ jniá₂? ¿Dsón'₂ on₃jua'₅₄ jaun₂! 'Uig₅₄ dsáu₅ bá₄ jniá₂ jaun₂, ca₂jio₃ jui₅ 'mú₃, le₂ně₅ ca₂cuë₃ léi₄ a₂lě₅ dso₄ a₂jaun₂ a₂jme₁jmo₅ jniá₂; ca₂jmo₃ tē₂le₃ quian'₅₄ a₂dse₃, jaun₂ le₂ně₅ ca₂jme₃jnia₅ 'Éi'₃ 'e₂ a₂lě₅ a₂jui₁si 'lig'₅₄ a₂lě₅ dsáu₁.

14 Ne₄ bá₄ jniog₄ jaun₂ a₂lě₅ a₂gu₂dsí₂ bá₄ 'Éi'₃, la₁ dsa₂ ni₁ñí₅ bá₄ jniá₂; co₂'nió'₄ a₂rē₂'ni₅₄ bá₄ jniá₂ ne₄ dso₄. 15 Ia₁ tsá₃ ñí'₂ dsi₃ 'e₂ lě₃ jmo₂₃ 'e₂ jmo₂₃, ia₁ tsá₃ lé₂ jmo₅₄ a₂'ín₅ dsi₃ jmo₅₄, ia₁ ca₂le₃jě₃ a₂'io₄ jniá₂ a₂tsá₃ 'nio₃ jmo₅₄, a₂jaun₂ dé₄ dsón'₂ jmo₂₃. 16 Ia₁ chi₂jua'₂ jmo₅ jniá₂ a₂tsá₃ tē₅ dsi₃ jmo₅₄, jaun₂ jmo₅ jniá₂ dsi₃ a₂dse₃ bá₄ 'Éi'₃. 17 Le₂ně₅ bá₄ jaun₂, on₃jua'₅₄ jniá₂ 'ñi₃ó₃ 'no₂₃ dso₄; dsáu₅ jniá₂ a₂'i₄ tē₂dsi₃ bá₄, a₂jaun₂ bá₄ jmo₅. 18 Ia₁ guion₄ jniá₂, 'i₁caun₂ a₂dse₃ tsá₃ cha₂ tē₂dsi₃ jniá₂, co₂'nió'₄ le₃jua'₅₄ lia'₂ con'₂ líng₅ dsa₂ ni₁ñí₅, ia₁ 'ín₅ bá₄ dsi₃ jmo₅₄ a₂dse₃, la₁ tsá₃ qui'₅₄ jmig₄ jmo₅₄. 19 Tsá₃ qui₂jmo₅ jniá₂ a₂dse₃ a₂'nio₃ jmo₅₄; caun₂ jmo₅ bá₄ jniá₂ a₂'lig'₅₄ a₂tsá₃ 'nio₃ jmo₅₄. 20 Jaun₂ ně₃, chi₂jua'₂ jmo₅ jniá₂ a₂tsá₃ tē₅ dsi₃ jmo₅₄, on₃jua'₅₄ jniá₂ 'ñi₃ó₃ jmo₂₃ a₂jaun₂; dsáu₅ jniá₂ a₂'i₄ tē₂dsi₃ bá₄, a₂jaun₂ bá₄ jmo₅.

21 Jaun₂ ma₂ca₂rē₃léi₄, cha₂ caun₂ 'éi'₃: jē₁ma₂tē₂ rē₁'nio₃ jmo₅₄ a₂dse₃, jñia'₅₄ lia'₂ a₂'lig'₅₄ bá₄ cha₂ ja₁cong₂. 22 Né'₃ jme₂dsí₂ qui₃ó₃, tē₅ bá₄ dsi₃ 'Éi'₃ qui₃ó₅ Diú₄; 23 la₁ jág₅ jniá₂ ja₁con₂ a₂tén₅ ni₁ñí₃, cha₂ caun₂ 'éi'₃ siá'₂ a₂jmo₅ 'nei₂ quian'₅₄ 'éi'₃ 'a₂ lia'₂ dsi₂jio₃g₅ dsi₃, a₂tē₂ chi₁'ñeg'₁ ne₄ 'éi'₃ qui₃ó₅ dso₄

a₂jmo₅ ta₁ ja₁con₂ a₂tén₅ ni₁ŋi₃.

24 i'E₂ guě₄ juí₂ jniá₂! ¿'Ein₂ bá₄ jiá₃ lió₂ ne₄ ni₁ŋi₃ a₂jio₅ 'mú₃ la₂? 25 Ti₁'mag'₄ Diú₄, cha₂ bá₄ jui₅ 'a₂ lia'₂ lé₂ tē₂le₃ quian'₅₄ Te₁gui'₅₄ Jesucristo quián₂ jniog₄.

Jaun₂ ně₃, 'ŋi₃ó₃ bá₄ jniá₂ quian'₅₄ 'a₂ lia'₂ dsi₂jio₅ dsi₃, jme₂tí₁ ta₁ ne₄ 'Éi'₃ quió'₅ Diú₄, la₁ lia'₂ con'₂ líng₅ dsa₂ ni₁ŋi₅, jme₁tí₁ jniá₂ ne₄ 'éi'₃ quió'₅ dso₄.

8

'A₂ lia'₂ chan₂ dsa₂ con'₂ lě₅ jio₅ Jme₂dsí₂ quián₅ Diú₄

1 Ně₃, ně₃ jaun₂, tsá₃ ma₂'e₂ uig₅ 'ě₂ Diú₄ ne₄ quió'₅ dsa₂ i₂ma₂'ei₅ caun₂ jág₁ quian'₅₄ Cristo Jesús.* 2 Ia₁ bí₂ a₂'io₅ 'éi'₃ quió'₅ Jme₂dsí₂ ma₂cuě₅ jmig₄ a₂chan₂ jniá₂ tē₂le₃ quian'₅₄ Cristo Jesús, ia₁ ma₂ca₂lió₂ jniá₂ ne₄ 'éi'₃ quió'₅ dso₄, quió'₅ 'mú₃ ně₃. 3 Ia₁ ma₂ca₂jmo₃ Diú₄ a₂tsá₃ ca₂qui'₅₄ jmig₄ Si₂ 'Éi'₃ jmo₃ ia₁ ca₂'uán₂ bá₄ 'Éi'₃ 'uig₅₄ dsáu₁ dsa₂ ni₁ŋi₅: ca₂chein₃ ja₁ŋi'₅₄ 'ŋiog₅ o₄quió'₄ dsáu₁ dsa₂; ca₂jmo₃ a₂lín₅ 'éi₂ dsa₂ chi₁dsáin₃ lia'₂ lín₅ dsa₂ mi₂güig₃ i₂'no₅ dso₄, jaun₂ le₂ně₅ bá₄ ca₂'ě₂ uig₅ ne₄ dso₄, ia₁ a₂lín₅ dsa₂ chi₁dsáin₃. 4 Le₂ně₅ ca₂jmo₃ ia₁jaun₂ le₃ti₃ 'Éi'₃ a₂con₂ 'í₁ con'₂ dsi₂ten₅₄, ja₁con₂ jniog₄, i₂i₂nio₄, on₃jua'₅₄ lia'₂ con'₂ lě₅ jio₅ ni₁ŋi₁₂, i₂i₂nio₄ lia'₂ con'₂ lě₅ jio₅ Jme₂dsí₂ bá₄.

5 Ia₁ dsa₂ i₂chan₂ lia'₂ con'₂ lě₅ jio₅ ni₁ŋi₁ qui₂dsi₂jio₅ dsí₅ jui₅ quió'₅ ni₁ŋi₅, la₁ jui₁lia'₂ dsa₂

* 8:1 A₂lín₅₄ chog₅₄ si₂ a₂ca₂lě₃ cang₂ guě₄, juá'₂ le₂la₂ ján₃: “i₂i₂nio₄, on₃jua'₅₄ lia'₂ con'₂ lě₅ jio₅ ni₁ŋi₁₂, i₂i₂nio₄ lia'₂ con'₂ lě₅ jio₅ Jme₂dsí₂ bá₄.”

i₂ma₂chan₂ lia'₂ con'₂ lě₅ jiog₅ Jme₂dsí₂ quián₅ Diú₄, qui₂dsi₂jio₅ dsí₅ a₂quió'₅ jme₂dsí₂ bá₄. ⁶ Ia₁ ju₁lia'₂ a₂qui₂dsi₂jio₅ dsí₅ dsa₂ ju₁ quió'₅ ni₁ñí₅, a₂lě₅ 'mú₃ bá₄ jaun₂; la₁ ju₁lia'₂ a₂qui₂dsi₂jio₅ dsí₅ dsa₂ le₃quió'₅ Jme₂dsí₂ quián₅ Diú₄, a₂jaun₂ bá₄ jmo₅ a₂le₃chan₂ dsa₂ dse₃, a₂'ag₃ tei₄ dsí₅ dsa₂ ně₃. ⁷ Ia₁ ju₁lia'₂ i₂qui₂dsi₂jio₅ dsí₅ ju₁ quió'₅ ni₁ñí₅, i₂ñia₅₄ Diú₄ bá₄ i₂le₂'éi₂, ia₁ tsá₃ 'nio₃, on₃ guë'₂ lé₂ jme₃ti₃ 'Éi'₃ quió'₅ Diú₄. ⁸ 'Uig₅₄ jaun₂ bá₄, ju₁lia'₂ i₂i₂nio₄ lia'₂ con'₂ jio₅ ni₁ñí₁₂, tsá₃ lé₂ le₃jmo₃ a₂tě₅ dsí₅ Diú₄.

⁹ La₁ ju₁lia'₂ 'nia'₂ ně₃, tsá₃ ma₃i₂nio'₅₄ 'nia'₂ lia'₂ con'₂ jio₅ ni₁ñí₅, ia₁ ma₂quian'₅₄ bá₄ 'nia'₂ Jme₂dsí₂, ně₃jua'₂ guá₅ Jme₂dsí₂ quián₅ Diú₄ tē₂'au'₂ 'nia'₂. Ia₁ ju₁lia'₂ dsa₂ i₂tsá₃ 'en₅₄ Jme₂dsí₂ quián₅ Cristo tē₂dsí₅, tsá₃ lín₅ i₂quián₅ 'éi₂. ¹⁰ La₁ ně₃jua'₂ 'en₅₄ Cristo tē₂'au'₂ 'nia'₂, jaun₂ chan₂ bá₄ jme₂dsí₂ quián'₂ 'nia'₂ 'uig₅₄ ia₁ a₂ma₂jín₂ Diú₄ 'nia'₂ ně₂jag₄ bá₄ a₂ma₂jme₂tí'₂ 'nia'₂, o₁ñia'₅₄ 'io₅ 'mú₃ ni₁ñí'₁ 'nia'₂ o₄quió'₄ dso₄. ¹¹ Chi₂jua'₂ chan₂ ja₁con'₂ 'nia'₂ Jme₂dsí₂ quián₅ i₂ca₂jme₃jen'₅₄ Cristo Jesús ne₄ 'mú₃, 'ñiog₅ bá₄ 'éi₂ cuë₃ jme₂dsí₂ 'mí₂ ne₄ ni₁ñí'₁ 'nia'₂ a₂ca₂tín₂ 'mú₃, tē₂le₃ quian'₅₄ Jme₂dsí₂ quián₅ Diú₄ i₂guá₅ tē₂'au'₂ 'nia'₂.

¹² Le₂ně₅ bá₄ jaun₂, 'nia'₂ rin'₅₄ jniog₄, cha₂ a₂ca₂tág₂ jniog₄ jmó₁, la₁ on₃jua'₅₄ rē'₂ ne₄ ni₁ñí₅ jua'₅₄ a₂'nió'₅ le₃chong₂ jniog₄ 'io₄ táng₃ lia'₂ con'₂ lě₅ mī₅ ni₁ñí₁. ¹³ Ia₁ ně₃jua'₂ chan'₂ 'nia'₂ lia'₂ con'₂ mī₅ ni₁ñí'₁, dsían'₃ bá₄ 'nia'₂; la₁ ně₃jua'₂ tē₂le₃ quian'₅₄ Jme₂dsí₂, jñí'₅ 'nia'₂ a₂jmo₅ ni₁ñí'₁, jaun₂ le₃chan'₂ bá₄ 'nia'₂.

14 Ia₁ ca₂le₃jín₃ dsa₂ i₂i₂nio₄ lia'₂ con'₂ lě₅ jiog₅
Jme₂dsí₂ quián₅ Diú₄, lín₅ chi'₂-guein₂ quián₅ Diú₄.

15 Ia₁ Jme₂dsí₂ i₂ma₂guen'₅₄ 'nia'₂ on₃jua'₅₄ i₂lín₅
jme₂dsí₂ i₂qui₃'nei'₂ táng₃ jua'₅₄ a₂jmo₃ a₂le₃gan'₃
táng₃ 'nia'₂. Jme₂dsí₂ 'éi'₂ bá₄ i₂ma₂guen'₅₄ 'nia'₂
i₂jmo₃ a₂lén'₂ 'nia'₂ chi'₂-guein₂ quián₅ Diú₄.
Jme₁jua'₂ jniog₄ tē₂le₃ quian'₅₄ 'éi'₂: “¡Abba!†
¡Tia₅₄ quiáng₃!””, 16 jaun₂ 'ñiog₅ bá₄ Jme₂dsí₂ nē₅
jme₂quiain'₅₄ jme₂dsí₂ quián₂ jniog₄, jáng'₅ jág₁
dsau₅ juá'₂ a₂ma₂lág₅ jniog₄ chi'₂-guein₂ quián₅
Diú₄. 17 Jaun₂ chi₂jua'₂ lág₅ jniog₄ ja₁ñi'₅₄, ján₃ bá₄
ca₂tág₂ jniog₄ guéi'₁ a₂dse₃ a₂ma₂lě₅ jág₁ cuē₃ Diú₄
a₂cuē'₃ chi'₂-guein₂ quián₅; guéi'₁ jniog₄ a₂nē₅ co₂lě₅
quian'₅₄ Cristo, chi₂jua'₂ quein'₅₄ jniog₄ quian'₅₄
jmi₁uig₅ quió'₅ ia₁jaun₂ quein'₅₄ jniog₄ cang₂ jē₄
co₂tág₅ co₂'né'₅ quió'₅.

18 Ia₁ lín₂ jniá₂ on₃jua'₅₄ cha₂ 'e₂ uig₅ a₂ñag₄
jniog₄ rē₂ně₃ on₃jua'₅₄ a₂quin₃ quian'₅₄ a₂co₂tág₅
co₂'né'₅ a₂jíá₃ a₂le₃jniá₂ ja₁con₂ jniog₄. 19 Ia₁
ma₂chi₁jñia₅ chi₁quian'₅₄ jmig₄ ca₂le₃jě₃ a₂ca₂jmo₃
Diú₄, a₂'ín₅ dsí₅ jmig₄ jē₁ma₂tě₂ rē₁le₃jniá₂ chi'₂-
guein₂ quián₅ Diú₄. 20 Ia₁ ca₂le₃jě₃ a₂ca₂jmo₃
Diú₄ nē₃ ma₂qui₂le₁'ñei'₅₄ ne₄ ju₁tsá₃ ta₁ tí₄,

on₃jua'₅₄ ia₁ a₂ca₂rē₃'ñió₃ dsí₅ guioin'₅₄, ia₁ le₂jaun₂
'éi'₃ ca₂jmo₃ Diú₄ 'ñiog₅ bá₄. A₂'ín₂ dsí₅ ca₂le₃jě₃ a₂nē₅,

21 jmig₄ a₂lió₂ Diú₄ a₂qui₂chi₁'ñei'₅₄ ne₄ ju₁tsá₃ a₂siá'₃
quió'₅, ia₁jaun₂ jme₃quiain'₅₄ chi'₂-guein₂ quián₅
Diú₄ jē₄ co₂tág₅ co₂'né'₅ ju₁lia'₂ i₂ma₂qui₂ca₂lón₂.

22 Ia₁ ne₄ bá₄ jniog₄, ca₂lia'₂ jñió₄ jmig₄ nē₃, ca₂le₃jě₃
a₂ca₂jmo₃ Diú₄, qui₂'ñióg₂ qui₂'ñia₂₃ co₂lě₅ chain₂

† 8:15 Abba: co₂'nió'₄ le₃jua'₅₄: “Tia₅₄” quian'₅₄ jág₁, jmei₅ arameo.

uig₅. 23 On₃jua'₅₄ jmá'₃ a₂jaun₂; ján₃ bá₄ le₂jaun₂ jniog₄ ně₃, i₂'io₅ a₂le₂'uig₅₄ a₂ca₂ráu₃ quió'₅ Jme₂dsí₂, qui₂'ñiog₅ qui₂'ñia₂ tē₂dsí₅ jniog₄ tē₁lia'₂ chi₁ñia₁ a₂'ín₅ dsí₅ jmig₄ jaun₂, a₂jme₃ñia₅ a₂lág₅ jniog₄ chi'₂-guein₂ quián₅ Diú₄, jmig₄ a₂lióin₂ ni₁ñi₁ jniog₄ la₂. 24 Ia₁ tē₂le₃ quian'₅₄ jmig₄ a₂'ín₂ dsí₅ jniog₄ ně₅ bá₄ ca₂lió₂; la₁ ně₁jua'₂ ma₂jág₅ dsa₂ a₂'ín₂ dsí₅, on₃jua'₅₄ ma₂le₃'ín₂ dsí₅ dsa₂jui₁lia'₂ a₂ma₂jág₅, tsá₃ ma₃tion₅₄ 'nió'₅ 'ín₂ dsí₅. 25 La₁ ně₁jua'₂ 'ín₂ dsí₅ jniog₄ caun₂ a₂tsá₃ ma₂ne₅₄, juin'₂ bá₄ dsí₅ ñia₄ a₂'ín₂ dsí₅.

26 Já₃n bá₄ le₂ně₅ jme₂'o₅₄ Jme₂dsí₂ quián₅ Diú₄ a₂'uan₅₄ dsí₅ jniog₄. Ia₁ tsá₃ tag₂ chi₂len'₄ Diú₄ 'a₂ con'₂ dsí₂ten₅₄, la₁ 'ñiog₅ bá₄ Jme₂dsí₂ Jñió₅ ně₃ m₁i₂₃ ne₄ Diú₄ o₄quián₂ jniog₄, ca₂le₃jě₃ qui₂'ñiog₂ qui₂'ñia₃ on₃jua'₅₄ a₂lé₂ le₃'ñiog₃ jniog₄ quian'₅₄ jág₁. 27 La₁ Diú₄ ně₃ i₂tē₂li₅ tē₂dsí₅ dsa₂ m₁i₂gü₃g₃, 'éi₂ bá₄ ñi₅ 'e₂ 'nio₃ Jme₂dsí₂ 'éi₂ juá'₂; ia₁ m₁i₅ Jme₂dsí₂ Jñió₅ lia'₂ con'₂ lě₅ 'ñio₂ dsí₅ Diú₄, o₄quió'₄ dsa₂ jñió₅ quián₅.

Tē₂le₃ ñag₅₄ guě₄ léi₂ jniog₄

28 Ne₄ bá₄ jniog₄, Diú₄ bá₄ i₂jmo₅ ne₄ ca₂le₃jě₃, a₂dse₃ quió'₅ dsa₂ i₂'nio₃ Diú₄, quió'₅ dsa₂ i₂ma₂tě'₃ Diú₄ lia'₂ con'₂ lě₅ ma₂i₂jniog₅ dsí₅ jmo₃. 29 Ia₁ i₂ma₂cuig₅ Diú₄ ca₂le₂ñiá₅, já₃n bá₄ ca₂chei'₃ ca₂'in₃ 'éi₂ a₂lén₂ jui₁lia'₂ lín₅ Ja₁ñi'₅₄, ia₁jaun₂ lén₂ Ja₁ñi'₅₄ i₂le₂ne₁ jě₄ quió'₅ rñin'₅₄ i₂juin₅. 30 Dsa₂ i₂con'₂ ma₂ca₂chen'₃ Diú₄ lia'₂ ca₂le₂ñiá₅, ca₂tě'₃ 'éi₂ já₃n; dsa₂ i₂con'₂ ca₂tě'₃ 'éi₂ ně₃, já₃n bá₄ ca₂jág₂ ně₂jag₄ a₂tsá₃ 'e₂ dso₄ rñin₂; dsa₂ i₂con'₂ ca₂jág₂ Diú₄ a₂tsá₃ 'e₂ dso₄ rñin₂ ně₃, já₃n bá₄ ca₂jme₃jláin'₁.

31 ¿'E₂ le₃ jua'₅₄ jniog₄ ně₃, quian'₅₄ a₂ ně₅? Chi₂ jua'₂ chén'₅ Diú₄ ne₄ jág₁ quián₂ jniog₄, ¿'ein₂ bá₄ qui'₅₄ jmig₄ jmóg'₂ jniog₄? 32 Tsá₃ ca₂ jmo₃ Diú₄ jua'₅₄ tsá₃ jme₁ cui_n 23 Ja₁ ŋi'₅₄ 'ŋiog₅, tē₂ le₃ ca₂ jáng'₂ bá₄, ca₂ ŋó₃ 'éi₂ ne₄ 'mú₃ o₄ quián₂ jniog₄; ¿'a₂ bá₄ lia'₂ jua'₅₄ a₂ tsá₃ cuē₃ jniog₄ ján₃ co₂ dsia₅ quian'₅₄ 'éi₂ ca₂ le₃ jě₃? 33 ¿'Ein₂ bá₄ lé₂ le₃ 'ni₃ dsa₂ i₂ ma₂ quión'₂ Diú₄? Ton'₂ 'ŋiog₅ bá₄ Diú₄ juá'₂ a₂ tsá₃ 'e₂ ri_n 2. 34 ¿'Ein₂ i₂ lé₂ le₃ 'ě₂ uig₅? Ia₁ Cristo Jesús bá₄ i₂ ca₂ jon₃; tē₂ le₃ lě₅ bá₄ guě₄, a₂ ca₂ jein'₅₄ táng₃, ton'₂ ma₂ guá₅ le₃ gu₂ ne₁ quió'₅ Diú₄, mi₂₃ o₄ quián₂ jniog₄. 35 ¿'Ein₂ bá₄ i₂ lé₂ 'liog'₃ jniog₄ cau₅ ne₄ a₂ 'nio₃ Cristo? ¿O₃ bá₄ qui'₅₄ jmig₄ ju_i lia'₂ caun₂ jm_i uig₅, o₃ ju_i lia'₂ caun₂ o_{2i} 1 dsi₅, o₃ jmig₄ ju_i lia'₂ a₂ co₂ 'ein₅ dsa₂, o₃ jmig₄ ju_i lia'₂ jme₁ 'in₂ a₂ que₅₄, o₃ ia₁ a₂ tsá₃ cha₂ a₂ qui'₅₄ 'e₂ jniog₄, o₃ 'e₂ caun₂ a₂ gau₂ cha₂, o₃ a₂ go₃ jniog₄ a₂ jme₃ dsio_g 5 dsa₂ quian'₅₄ ŋi₁ tág₂? 36 Ju_i lia'₂ rē₂ ton₅ ne₄ Si₂: O₄ quián'₂ 'ne₂ bá₄ guei₂ jnia'₅₄ 'mú₃ co₂ tan₅₄.

Jmo₅ dsa₂ ds_i 5 a₂ lág₅ jnia'₅₄

nē₂ jag₄ bá₄ já'₂ cha'₂

i₂ ma₂ le₁ te₂ dsa₂ a₂ jme₃ dsio_g 23. †

37 La₁ jē₄ ca₂ le₃ jě₃ a₂ ně₅, tson₂ guě₄ léi₂ tián₂ jniog₄ tē₂ le₃ quian'₅₄ 'éi₂ i₂ ma₂ ca₂ rē₃ 'nio₃ quián₂ jniog₄. 38 Ia₁ caun₂ bá₄ 'ei₅ dsi₃, 'i₁ caun₂ tsá₃ 'e₂ lé₂ le₃ 'liog'₃ cau₅ ne₄ a₂ 'nio₃ Diú₄ jniog₄. Tsá₃ qui'₅₄ jmig₄ 'mú₃, on₃ guē'₂ a₂ chong₂, on₃ guē'₂ ángeles, on₃ guē'₂ ds_i 2 tan₅₄ quián₅ jme₂ dsí₂, on₃ guē'₂ a₂ cha₂ rē₂ ně₃, on₃ guē'₂ a₂ cha₂ jmig₄ ne₄ ju_i 5 ně₃, on₃ guě₄ ju_i 5 bí₂, 39 on₃ guē'₂ i₂ tion'₅₄ ja₁ ŋei₅ lin₃, on₃ guē'₂ i₂ tion'₅₄ ja₁ 'uin₃ lin₃, on₃ guē'₂ ju_i 'e₂ guě₃ a₂ siá'₂ a₂ ca₂ jmo₃ Diú₄, jua'₅₄ le₃ qui'₅₄ jmig₄ jmo₃ jua'₅₄ a₂ tsá₃

† 8:36 Salmo 44:22.

ma₃jme₃'nio₃ Diú₄ jniog₄, tē₂le₃ quian'₅₄ Cristo Jesús
Te₁gui'₅₄ quián₂ jniog₄.

9

Ma₂quión'₂ Diú₄ dsa₂ juig₂ Israel

¹ Jág₁ tí₅ dsón'₂ bá₄ juá'₅ jniá'₂ le₃quió'₅ Cristo
la₂, tsá₃ jme₂gau₅₄ jniá'₂; tē₂dsi₃ jniá'₂ jiog₅ Jme₂dsí₂
Jnió₅ juá'₂ tság₅ jniá'₂ a₂dsón'₂ bá₄ dsau₅; ² 'ŋio₅ lín₃
chang₂ go₂ 'i₃ qui'₂ dsi₃ co₂tan₅₄, ³ ia₁ ca₂tē₂ 'ŋió₃ jniá'₂
jme₁'nio₃ jua'₅₄ dsi₃'éng₁, rē₂'na₄ jág₁ ja₁con₂ Cristo
jua'₅₄ mei'₂ guě₃ le₂jaun₂, o₄quió'₄ ríng'₃ dsa₂ go₃
jniá'₂ le₃quió'₅ ni₁ŋí₅. ⁴ 'Éi₂ bá₄ i₂lín₅ dsa₂ tsi₁jon₂ Is-
rael; * 'éi₂ bá₄ i₂lín₅ dsa₂ i₂ca₂guéi'₂ Diú₄ a₂lín₅ chi'₂-
guein₂ quián₅; 'éi₂ bá₄ i₂ca₂tē₂ ne₄ a₂tág₅ co₂'né'₅
quió'₅ Diú₄; 'éi₂ bá₄ i₂ca₂lí'₃ jág₁ quian'₅₄ Diú₄; 'éi₂
bá₄ i₂ca₂gue₃ Si₂ 'Éi'₃ ca₂cuě₃ Diú₄; 'éi₂ bá₄ i₂ca₂tín₂
jme₃ti₃ a₂qui₂jén'₃ ne₄ Diú₄; 'éi₂ bá₄ i₂ca₂cuě₃ Diú₄
jág₁ quió'₅ ně₃. ⁵ 'Éi₂ bá₄ i₂lín₅ tsi₁jon₂ dsa₂ can'₅₄
quián₂ jnia'₅₄ ma₂líg'₂. Jaun₂ tē₂le₃ quian'₅₄ tsi₁jon₂
'éi₂ ně₃, ca₂guan₃ I₂rē₂'ín₁ quián₅ Diú₄ chi₁dsáin₃,
i₂lín₅ Diú₄ ne₄ quió'₅ ca₂le₃jě₃, i₂jme₃juin'₂ dsa₂
co₂tan₅₄, a₂méi₃.

⁶ On₃jua'₅₄ rē₂' a₂tsá₃ ca₂rě₃ti₃ jág₁ a₂rě₂cuě₄ quió'₅
Diú₄, ia₁ tsá₃ ca₂le₃jín₃ dsa₂ tsi₁jon₂ Israel lín₅
tē₃dsón'₂ dsa₂ i₂tén₅ juig₂ Israel. ⁷ On₃ guě'₂ lín₅
ca₂le₃jín₃ dsa₂ tsi₁jon₂ Abraham tē₃dsón'₂ chi'₂-
guein₂ quián₅ 'éi₂; ia₁ jme₁ca₂juá'₂ Diú₄ ca₂tsí'₃
Abraham: “Tē₂le₃ quian'₅₄ Isaac bá₄ ja₃lén₂

* **9:4** Israel: co₂'nió'₄ le₃jua'₅₄, Jacob. Génesis 35:10.

tsi₁jong'₂".† 8 Jág₁ nē₅, jein₅ jág₁, on₃jua'₅₄ chi'₂
 dsio₄ le₃quió'₅ ni₁ñí₅ i₂lín₅ chi'₂-guein₂ quián₅ Diú₄;
 ton'₂ con'₂ i₂lín₅ guein₂ i₂ca₂rē₃chán₃ lia'₂ con'₂
 lě₅ jág₁ quió'₅ Diú₄ a₂jme₁ma₂cuē₃, jmá'₃ i₂'éi₂ bá₄
 i₂jín₂ Diú₄ i₂lín₅ tē₃dsón'₂ tsi₁jon₂ Abraham. 9 Ia₁
 jág₁ quió'₅ Diú₄ a₂ca₂cuē'₃ Abraham, a₂la₂ bá₄
 jaun₂: "Jein₂ rē₂ně₃ ŋi₂ caun₂, guio₅₄ jniá₂, jaun₂
 le₃chan₂ jan₂ guein₂ quián₅ Sara."‡ 10 On₃jua'₅₄
 jmá'₃ a₂jaun₂. Qui₂ca₂can₃ Rebeca guein₂ quian'₅₄
 jan₂ dsa₂ ŋe'₂ i₂lín₅ Isaac jmei₂ jnia'₅₄. 11 La₁ tsá₃
 jme₁ma₂ca₂rē₃chán₃ guein₂ quián₅ i₁Bé'₄, on₃ guē'₂
 a₂'lig'₅₄ a₂dse₃ jme₁ma₂tīn₂ jmo₃, jme₁ca₂jmo₃ Diú₄
 jág₁, ia₁jaun₂ tē₃'ñiá₄ a₂ca₂tín₂ Diú₄ qui₃quió'₂ lia'₂
 con'₂ lě₅ niog₅ dsí₅; 12 on₃jua'₅₄ 'uig₅₄ ia₁ a₂jme₂tí₃
 dsa₂, tē₂le₃ 'uig₅₄ ia₁ a₂tē₂ Diú₄; ca₂juá'₂ Diú₄ ca₂tsí'₃
 i₁Bé'₄: "I₂lín₅ i₂juin'₂ jme₃tí₃ ne₄ i₂me'₂."§ 13 Ju₁lia'₂
 chi₁ton₅ ne₄ Si₂: "Ca₂quio'₄ jniá₂ ca₂jme₁gu'₅₄ quió'₅
 Jacob, lě₅ guē'₄ con'₂ guē'₄ Esaú."*

14 ¿'E₂ bá₄ le₃jua'₅₄ ně₃? ¿On₃ bá₄ tsá₃ rē₂ qui₂dsi₅
 Diú₄ 'éi'₃? ¡Dson'₂ on₃jua'₅₄ le₂jaun₂! 15 Ia₁ ca₂tsí'₃
 Moisés:

Dsia₅₄ jniá₂ ŋéi₂ dsí₃

ja₁con₂ i₂'nio₃ jniá₂ dsia₅₄ ŋéi₂ dsí₃ quiain'₅₄;

ján₃ bá₄ jmo₅₄ jniá₂ 'ua₁ dsí₃

ja₁con₂ i₂'nio₃ jniá₂ jmo₅₄ 'ua₁ dsí₃ quiain'₅₄.†

16 Le₂ně₅ bá₄ jaun₂, on₃jua'₅₄ rē'₂ ia₁ 'nio₃ jan₂ dsa₂,
 o₃ a₂quín'₃ bí₂ 'e₂; ton'₂ ia₁ a₂ŋéi₂ dsí₅ Diú₄ bá₄. 17 Ia₁

† 9:7 Génesis 21:12. ‡ 9:9 Génesis 18:10,14. § 9:12 Génesis
 25:23. * 9:13 Malaquías 1:2-3; lit. "Ca₂jme₁'nió₄ jniá₂ Jacob, Esaú
 guē'₂ ca₂jme₁'ñiai₅₄." † 9:15 Éxodo 33:19.

chi₁ton₅ ne₄ Si₂ 'a₂ lia₂ 'ca₂juá'₂ Diú₄ ca₂tsí'₃ Faraón:†
 “Ta₁ jaun₂ tē₃dsón'₂ bá₄ ca₂tság'₂ jniá₂ a₂leng'₂ rag₅₄,
 ia₁jaun₂ jme₁jnia₅ jniá₂ ju₁₅bí₂ quió₃ tē₂le₃ quian'₅₄
 'ne₂, ia₁jaun₂ guē₄ le₃ŋi₅ dsa₂ ta₁caun₂ gua'₅₄ 'uē₃ 'a₂
 lia'₂ lín₅ jniá₂.” § 18 Jaun₂ lē₃, ca₂tín₂ Diú₄ dsa₃ ŋéi₂
 dsí₅ ja₁con₂ chi₂'ein₂ 'nio₃, ton'₂ ján₃ guē'₂ jme₃'ua'₂
 dsí₅ chi₂'ein₂ 'nio₃ jme₃'ua'₂ dsí₅. 19 La₁ jaun₂, lé₂
 jua'₅₄ juig'₅₄ jniá₂: “Chi₂jua'₂ le₂nē₅, ¿'e₂ lē₃ cué'₅ Diú₄
 dso₄ dsa₂, jaun₂ ně₃? Ia₁, ¿'ein₂ bá₄ qui'₅₄ jmig₄ jné₃
 a₂niog₅ dsí₅ Diú₄ jmo₃?” 20 ¡La₁ 'ne₂ ně₃! ¿I₂'ein₂ bá₄
 lín'₅ 'ne₂ dsa₂ mi₂güí₃, jua'₅₄ a₂tsíng'₄ quian'₅₄ Diú₄?
 ¿O₃ bá₄ lé₂ le₃juá'₂ ju₁lia'₂ ni₁tí'₂ gua'₅₄, tsí'₃ i₂ca₂jmo₃:
 “¿'E₂ lē₃ ca₂jmog'₅₄ jniá₂ le₂la₂?”* 21 Ju₁lia'₂ jan₂ tē₅
 i₂jmo₅ tí'₂: ¿Tsa₁ ca₂tíin₂ 'uē'₃ quian'₅₄ ca₂bē'₅₄ ti₁jein₂
 caun₂ ni₁tí'₂ a₂j mó'₂ dsa₂ ta₁ jmá'₃ lia'₂ a₂jlá'₁, caun₂
 guē'₂ a₂j mó'₂ dsa₂ ta₁ lia'₂ 'ei₅ ne₅₄ cosa?†
 22 ¿'E₂ guē'₂ lé₂ le₃jua'₅₄ 'ne₂ chi₂jua'₂ 'nio₃ Diú₄
 jme₃jnia₅ a₂'nei₂, jme₃jnia₅ ju₁₅bí₂ quió'₅ ně₃, la₁
 ca₂jmo₃ tió'₃ ca₂jme₃juin'₃ dsí₅ 'ŋio₅ lín₃ quian'₅₄
 dsa₂ i₂jme₁ca₂tín₂ gue₃ uig₅ i₂jme₁'i₄ 'éi'₃ dsí₃'én₂?
 23 ¿'E₂ guē'₂ chi₂jua'₂ ca₂jmo₃ Diú₄ le₂jaun₂, ia₁jaun₂
 qui₃le₃ŋi₅ dsa₂ a₂jláin'₁ a₂'uain'₂, a₂jme₂jnia₂₃
 a₂ŋéi₂ dsí₅ ja₁con₂ dsa₂ i₂ca₂j mói'₂ co₂jnia₅₄ tē₃jnia₅,
 ia₁jaun₂ tīn₅₄ jē₁tág₅ co₂'né'₅ quió'₅? 24 Jniog₄ bá₄ 'éi₂
 i₂ca₂tē'₃ Diú₄, on₃jua'₅₄ jmá'₃ jē₄ quió'₅ dsa₂ judíos;
 ján₃ bá₄ ca₂tē'₃ dsa₂ jē₄ quió'₅ dsí₂nau₂. 25 Ju₁lia'₂
 juá'₂ ne₄ si₂ quió'₅ Oseas:
 Dsa₂ i₂tsá₃ jme₁lín₄ dsa₂ juig₂ quiáng₃,

† 9:17 Faraón: co₂'nió'₄ le₃jua'₅₄, rag₅₄ quián₅ 'uē₃ Egipto. § 9:17

Éxodo 9:16. * 9:20 Isaías 29:16; 45:9. † 9:21 'Nio'₂ ja₁ton₅ 2 Timoteo 2:20.

ca₂tě₃ dsa₂ juig₂ quiáng₃;
 ján₃ guë'₂ co₂'nió'₄ 'io₅₄ i₂tsá₃ jme₁'nióg₃,
 ca₂tě₃ bá₄ jniá'₂ a₂nió₃ guě'₄ lín₃. †

26 Já_n₃ bá₄ juá'₂:

Co₂dsau₅ jaun₂ ja₁jme₁juá'₂ dsa₂
 a₂tsá₃ lín'₅ 'nia'₂ dsa₂ quiáng₃,
 ja₁jaun₂ nág'₁ 'nia'₂ a₂tě₂ dsa₂
 a₂lín'₅ chi'₂-guein₂ quián₅ Diú₄ jén'₃. §

27 La₁ të₂le₃ quió'₅ dsa₂ israelitas ně₃, ca₂juá'₂
 Isaías a₂dsen₅₄ dsí₅: “Ju_i₁'a₂ guě'₃ la₂ juin₅ lín₃ tsi₁jon₂
 dsa₂ juig₂ Israel téin₅ ju_i₁lia'₂ tí₅ ti₁tsag₁ cha₂ chei'₅₄
 jmi₁ŋí'₄, la₁ me'₂ co₂ŋí₂ bá₄ dsa₂ i₂juin₅ 'éi₂ tín'₄. 28 Ia₁
 qui₃dsi₅ bá₄ Diú₄ 'éi'₃ ne₄ gua'₅₄ 'uě₃, jme₃ti₃ ca₂le₃jě₃
 co₂ŋei'₅₄. ”* 29 Ju_i₁lia'₂ ca₂juá'₂ 'ŋiog₅ Isaías le₂jŋiá₅:
 Jua'₅₄ mei'₂ guě'₃ Te₁gui'₅₄ Ju_i₁g₅₄ 'Lióg₂
 tsá₃ ca₂dsiain₃ tsi₁jon₂ dsa₂ go₂ jniog₄,
 le₂jaun₂ bá₄ jme₁dsi₁ŋág₂ jniog₄
 ju_i₁lia'₂ ca₂i₃ŋí₂ dsa₂ juig₂ Sodoma quian'₅₄ Go-
 morra. †

Dsa₂ judíos quian'₅₄ jág₁ dse₃

30 ħ'_E₂ le₃jua'₅₄ jniog₄ jaun₂ ně₃? Ju_i₁lia'₂ dsi₂nau₂
 i₂tsá₃ jme₁'no'₂ ju_i₅ ja₁guei₃ Diú₄ ně₂jag₄ bá₄ a₂tsá₃
 'e₂ dso₄ riin₂, 'éi₂ bá₄ ma₂lí'₂ ju_i₅ jaun₂, caun₂ ju_i₅
 ja₁guéi'₂ Diú₄ ně₂jag₄ bá₄ a₂ca₂jme₃ti₃, të₂le₃ a₂jŋia'₅₄
 con'₂ a₂'éin₂ bá₄. 31 La₁ dsa₂ juig₂ Israel guë'₂ ně₃,
 i₂jme₁tion'₅₄ 'Éi'₃ ia₁jaun₂ jme₁guéi'₂ Diú₄ 'uig₅₄ ia₁
 a₂jme₂ti₃, lín₂, tsá₃ ca₂tió'₃ jme₃ti₃ 'Éi'₃ jaun₂. 32 ħ'_E₂
 lě₃? Ia₁ jme₁'no'₂ ju_i₅ ja₁guéi'₂ Diú₄ jaun₂, on₃jua'₅₄

† 9:25 Oseas 2:23. § 9:26 Oseas 1:10. * 9:28 Isaías 10:22-23.

† 9:29 Isaías 1:9.

të₂le₃ quian'₅₄ a₂'éin₂, të₂le₃ quian'₅₄ a₂jme₁jmo₂₃
 guioin'₅₄ bá₄. 'Uig₅₄ jaun₂ qui₂ca₂nió₁₃ bá₄ quian'₅₄
 “Ni₁cang₁ a₂nió₅ dsa₂.” ³³ Jui₁lia'₂ rë₂ton₅ ne₄ Si₂:
 Ní₂ de'₂ 'nia'₂, tsin₅₄ jniá'₂ jan₂ jë₄ juig₂ Sió₁n
 i₂lén₂ në₂jag₄ ni₁cang₁ a₂qui₂nió₅ dsa₂,
 ján₃ guë'₂ co₂'nió'₄ ni₁'lau₂
 a₂jmo₃ dsi₂gan'₅₄ dsa₂;
 jaun₂ jui₁lia'₂ i₂'én₂ le₃quió'₅ 'éi₂,
 tsá₃ dsi₁ñí₂ o₂guí'₃.†

10

¹ Rin'₅₄ jniog₄, a₂'ín₅ dsi₃ 'ñio₅ lin₃, a₂chileng'₅₄
 Diú₄ o₄quió'₄ dsa₂ israelitas, ia₁jaun₂ tíin'₄ bá₄.
² Ia₁ jáng'₅ bá₄ jniá'₂ jág₁ dsau₅ ja₁coin₂, a₂dsen₅₄
 dsí₅ le₃quió'₅ Diú₄, la₁ia₁ on₃jua'₅₄ jaun₂ ñí'₂ dsí₅.
³ 'Uig₅₄ ia₁ a₂tsá₃ ca₂tón'₃ jui₅ 'a₂ lia'₂ lë₅ jaun₂
 a₂guéi'₂ Diú₄, jaun₂ qui₂'no'₂ jui₅ quió'₅ guioin₅₄
 bá₄, tsá₃ ca₂jme₃gó'₃ jui₅ a₂ca₂cuë₃ Diú₄. ⁴ Ia₁
 ca₂jme₃'ñia₅ I₂rë₂'ín₁ quián₅ Diú₄ 'Éi'₃, ia₁jaun₂ guéi'₂
 Diú₄ chi₂jua'₂ 'ein₂ i₂'én₂, në₂jag₄ bá₄ a₂ma₂can₃
 caun₂ jui₅ co₂dsau₅.

⁵ Ia₁ jui₁lia'₂ a₂guéi'₂ Diú₄ quió'₅ dsa₂ ia₁
 a₂ca₂jme₃ti₃ 'Éi'₃, juá'₂ Moisés ne₄ Si₂: “Në₁jua'₂
 ca₂can₃ dsa₂ caun₂ jui₅ co₂dsau₅ lia'₂ con'₂ lë₅
 chi₂quióng₂ jmíg₄ Si₂ 'Éi'₃, të₂le₃ quian'₅₄ 'Éi'₃ jaun₂
 le₃chain₂.”* ⁶ La₁ jui₁lia'₂ jui₅ co₂dsau₅ a₂já₅ 'uig₅₄ ia₁
 a₂'én₂ dsa₂, juá'₂ Si₂ le₂la₂: “Tsá₃ jua'₅₄ 'ne₂ të₂le₃ jui₅
 'au'₂: ¿'Ein₂ bá₄ lé₂ le₃uig₂ guei'₅₄ i₂juíg₃?† —co₂'nió'₄
 le₃jua'₅₄, ia₁jaun₂ sióin₂ I₂rë₂'ín₁ quián₅ Diú₄ ja₁con₂

† 9:33 Isaías 8:14; 28:16.
 Deuteronomio 30:12.

* 10:5 Levítico 18:5. † 10:6

jniog₄—; ⁷ on₃ guë'₂ jua'₅₄ 'ne₂ ján₃: “¿'Ein₂ bá₄ lé₂ le₃sión₃ ca₂të₂ ja₁ca₂jein₃ chi₁dsio₅₄?”† —co₂'nió'₄ le₃jua'₅₄, ia₁jaun₂ chóin'₂ táng₃ I₂rë₂'ín₁ quián₅ Diú₄, jin₄ 'lag₄. ⁸ ¿La₁ 'e₂ bá₄ guë'₂ juá'₂ Si₂? Cong'₂ bá₄ 'nia'₂ 'ei₅ jág₁ la₂,

'i₄ mi₂'o'₅₄, quian'₅₄ jui₅ të₂'au'₂,§
co₂'nió'₄ le₃jua'₅₄, jág₁ nē₅ bá₄ lé₅ jág₁ a₂'én₂ dsa₂
a₂qui₂'ě₅ jnia'₅₄ dsa₂: ⁹ Chi₂jua'₂ jmo'₂ jág₁ quian'₅₄
mi₂'o'₅₄ a₂lín₅ Jesús Te₁gui'₅₄, ján₃ guë'₂ chi₂jua'₂
'éng'₂ jui₅ të₂'au'₂ a₂ca₂jme₃jein'₅₄ táng₃ Diú₄
a₂jme₁rë₂'lín₅₄, tíng'₄ bá₄. ¹⁰ Ia₁ të₂le₃ jui₅ të₂dsí₅
bá₄ dsa₂ rë₂'éin₂, ia₁jaun₂ guéi'₂ Diú₄ nē₂jag₄ bá₄
a₂ca₂jme₃ti₃; ján₃ guë'₂ le₂jaun₂ të₂le₃ quian'₅₄ 'o₄
dsa₂ jmo₂₃ jág₁ ia₁jaun₂ tín'₄ bá₄.

¹¹ Ne₄ Si₂ juá'₂: “Jui₁lia'₂ i₂'én₂ le₃quió'₅ 'éi₂, tsá₃
dsi₃ñí₂ o₂guí'₃.”* ¹² Tsá₃ jma₃quén₅ jág₂ Diú₄ jín₂
dsa₂ judíos quian'₅₄ guë'₂ dsa₂ griegos; ia₁ 'ñiog₅
bá₄ 'éi₂ lín₅ Te₁gui'₅₄ quián₅ ca₂le₃jín₃, ján₃ guë'₂
jme₂gu'₅₄ cuë₂₃ ca₂lia'₂ 'lióng₂ a₂dse₃ quió'₅, cuë'₅
ca₂le₃jín₃ i₂chi₂léi'₂. ¹³ Ia₁ juá'₂ le₂la₂: “Ca₂le₃jín₃
i₂chi₂lí'₂ ne₄ Te₁gui'₅₄, tín'₄ bá₄.”† ¹⁴ La₁, ¿'A₂ bá₄ lia'₂
lé₂ chi₃lí'₂ ne₄ jan₂ i₂tsá₃ ma₂ca₂rë₃'éin₂ le₃quió'₅?
Ján₃ guë'₂, ¿'a₂ bá₄ lia'₂ le₃'én₂ dsa₂ le₃quió'₅ nē₂jua'₂
tsá₃ ma₂nág₂ guë'₂ 'ag₅ dsa₂ 'iin₂₃ 'éi₂? ¿'A₂ guë'₂ lia'₂
lé₂ nag₃ dsa₂ nē₁jua'₂ tsá₃ 'ein₂ chan₂ i₂'ě₂ jág₁ dse₃?
¹⁵ ¿'A₂ bá₄ lia'₂ lé₂ dsi₁lén₂ i₂'ě₂ jág₁ dse₃ nē₂jua'₂ tsá₃
'ein₂ chei₅? Jui₁lia'₂ ma₂rë₂ton₅ ne₄ Si₂: “'i'E₂ guë'₄
jlá'₁ gu₂-tag₄ i₂quian₅ jág₁ dse₃!”†

† **10:7** Deuteronomio 30:13. § **10:8** Deuteronomio 30:14.

* **10:11** Isaías 28:16. † **10:13** Joel 2:32. ‡ **10:15** Isaías 52:7.

16 La₁ tsá₃ ca₂le₃jín₃ dsa₂ ca₂tón₁'₃ juí₅ jág₁ dse₃.
 Jui₁lia'₂ ca₂juá'₂ táng₃ Isaías: “¿Te₁gui'₅₄ 'ein₂ bá₄
 i₂ma₂ca₂rë₃'én₂ jág₁ a₂ca₂'ë₂ jniog₄?” § 17 Le₂në₅ bá₄
 jaun₂, jui₁lia'₂ a₂'én₂ dsa₂, lë₅ të₂le₃ quian'₅₄ a₂nag₅
 dsa₂; a₂nag₅ dsa₂ jaun₂, lë₅ të₂le₃ quian'₅₄ jág₁ quió'₅
 I₂rë₂'ín₁ quián₅ Diú₄.

18 La₁ ñag₄ jniá₂, ¿O₃ bá₄ tsá₃ ca₂nág₂ dsa₂ jág₁ dse₃?
 jMa₁ të₃dsón'₂ bá₄ ca₂nág₂! Ia₁ juá'₂ Si₂:
 Ta₁caun₂ gua'₅₄ 'uë₃ bá₄ ca₂dsia₃ dsa₂;
 ca₂le₂con₂ quióng₄ mi₂güig₃ bá₄

ma₂ca₂i'ág₃ jág₁ quió'₅.*

19 La₁ ñag₄ táng₃ jniá₂, ¿O₃ bá₄ a₂tsá₃ ma₂ca₂rë₃lí'₄
 'e₂ dsa₂ juig₂ Israel? Ia₁ jë₁le₂'uig₅₄, juá'₂ Moisés:
 Jmo₅₄ jniá₂ a₂lén'₂ 'nia'₂ dsa₂ i₂dsí'₅
 ja₁con₂ dsa₂ i₂tsá₃ juig₂ nación lín₅;
 ján₃ bá₄ jmo₅₄ jniá₂ le₃'ne'₂ 'nia'₂
 o₄quió'₄ caun₂ juig₂ i₂tsá₃ ñí'₂ dsí₅.†

20 Con'₂ siá'₂, tiá₂ dsí₅ Isaías a₂juá'₂, o₄quió'₄ Diú₄:
 Dsa₂ i₂tsá₃ jme₁'nau'₂ jniá₂,
 ca₂dsáu'₂ bá₄;
 ca₂jme₁jnia₅ jniá₂
 ja₁con₂ dsa₂ i₂tsá₃ jme₁ñag₅ jniá₂.‡

21 La₁ia₁ dsa₂ israelitas bá₄ jme₁tsí'₅ Isaías,
 jme₁ca₂juá'₂: “Të₁ne₁ jmig₄ bá₄ jme₁chén'₄ jniá₂
 chi₁jan₁₂ cu₃ ja₁con₂ juig₂ cang₄ mi₂dsi₄ i₂tsá₃ ne'₅₄.” §

11

Dsa₂ Israel i₂tín'₄

§ 10:16 Isaías 53:1. * 10:18 Salmo 19:4. † 10:19
 Deuteronomio 32:21. ‡ 10:20 Isaías 65:1. § 10:21 Isaías 65:2.

1 Jaun₂ ně₃ ηag₄ jniá₂, ¿O₃ bá₄ ma₂chen'₃ cau₅ Diú₄ dsa₂ juig₂ Israel quiáin₅? ¡On₃jua'₅₄ le₂jaun₂! Ia₁ 'ηi₃ bá₄ jniá₂ líng₅ jan₂ dsa₂ israelita, jan₂ chi'₂ dsio₄ Abraham, jan₂ tsi₁jon₂ Benjamín. ²Ca₂le₂jniá₅ ma₂líg'₂ lin₃ bá₄ ca₂qui₂ón'₂ Diú₄ dsa₂ juig₂ quiáin₅; jaun₂ rē₂ně₃ ně₃ tsá₃ jua'₅₄ ma₂ca₂téi₂. ¿Tsa₁ ηi'₅₄ 'nia'₂ 'a₂ lia'₂ juá'₂ ne₄ Si₂ ja₁'iin₂₃ Elías, 'a₂ lia'₂ ca₂chi₃lén'₂ Diú₄ a₂ca₂'ni₃ dsa₂ Israel? Ca₂juá'₂: ³“Te₁gui'₅₄, ma₂ca₂jme₃dsian₅ bá₄ dsa₂, dsa₂ i₂jme₁'ě₂ jág₁ quiáng'₂, ma₂qui₂ma₂'éin₂ ne₄chei₂ quiáng'₂ ně₃; jnia'₅₄ lia'₂ jan₂ jniá₂ bá₄ chang₂ guē₄, qui₂co₂'ein₅ dsa₂, ján₃ guē'₂ 'nio₃ jηag'₃.”*

⁴Jaun₂, ¿'E₂ jág₁ ca₂jéin'₃ Diú₄? “Ma₂ca₂tsón₃ jniá₂ guion₃ mei₅ dsa₂ tē₂le₃ quió₃ i₂tsá₃ ma₂qui₂ca₂jón'₂ mi₂jne₄ ne₄ Ba'al.”† ⁵Jaun₂ le₂ně₅ bá₄ ján₃ rē₂tsón₂ ca₂dsion₄ dsa₂ 'éi₂ rē₂ně₃, jaun₂ Diú₄ ně₃ tē₂le₃ ia₁ a₂'ua₁ dsí₅ ma₂qui₂óin'₂ 'éi₂. ⁶Chi₂jua'₂ tē₂le₃ ia₁ a₂'ua₁ dsí₅ Diú₄, on₃jua'₅₄ jaun₂ ia₁ a₂jmo₅ dsa₂ 'e₂ jmo₂₃. Ia₁ jua'₅₄ mei'₂ guē₃ le₂ně₅ ně₃, tsá₃ le₃jua'₅₄ jua'₅₄ a₂'ua₁ dsí₅ Diú₄. ⁷¿'E₂ jaun₂ ně₃? Tsá₃ ca₂tíó'₃ dsa₂ juig₂ Israel dsio'₂ a₂jme₁'no'₂, la₁ dsa₂ i₂ca₂qui₂ón'₂ Diú₄ 'ηiog₅ bá₄ ca₂dsáu'₂. I₂sián'₂ guē'₂ qui₂ca₂rē₃'uá'₃ dsí₅, ⁸ju₁lia'₂ juá'₂ ne₄ Si₂:

Ca₂jmo₃ Diú₄ a₂le₃tín₄ dsa₂ 'éi₂ le₃qui₂ó'₅ jme₂dsí₂;
 ca₂cuē₃ mi₂ne₅₄ a₂tsá₃ jniá₂,
 ca₂cuē₃ rē₂gua₅₄ a₂tsá₃ nag₅,
 le₂jni₄ jmig₄ ně₃.‡

⁹Ján₃ bá₄ ca₂juá'₂ David:
 Ca₂le₃jé₃ a₂i₂tsón₃ jme₁cha₂ quió'₅

* **11:3** 1 Reyes 19:10,14. † **11:4** 1 Reyes 19:18. ‡ **11:8** Deuteronomio 29:4; Isaías 19:10.

ju₁le₅₄ co₂'nió'₄ tsi₁liá₂ o₃ 'má₅ 'e₂,
ia₁jaun₂ qui₃nió₃, gue₃ 'liain'₅₄.

10 Ju₁le₅₄ tsá₃ jnió'₅ mi₂ne₅₄
ju₁guen'₅₄ mi₂ca'₅₄ co₂ŋei'₅₄.§

Dsi₂nau₂ i₂tín'₄

11 Ŋag₅ jniá₂ ně₃, ¿o₃ bá₄ co₂ŋei'₅₄ con'₂ ca₂sén'₂
jaun₂ bá₄ dsa₂ judíos jme₁ca₂nió₃? ¡o₃ŋ₃jua'₅₄
le₂jaun₂! Tě₂le₃ jen₅ bá₄, jme₁ca₂i₃lén₂ dsa₂ judíos
ca₂i₁juin₅₄, ca₂jmo₃ Diú₄ a₂ca₂dsó'₂ dsi₂nau₂ ju₁
ja₁tín'₄, ia₁jaun₂ le₃dsí'₅ 'éi₂.

12 La₁ chi₂jua'₂ a₂ca₂i₁juin₅₄ 'éi₂ jaun₂, ca₂dsióg₃
tě₂le₃ dse₃ bá₄ o₄quió'₄ dsa₂ mi₂güí₃, ján₃ bá₄
chi₂jua'₂ a₂ca₂i₃én₂ quió'₅ 'éi₂, ca₂dsióg₃ a₂tě₁dsi₅₄
quió'₅ dsi₂nau₂, ¡'e₂ gué₄ dse₃ lé₂, jě₁ma₂ca₂rě₃'ŋia₅
táng₃ 'éi₂!

13 La₁ a₂juá'₅ jniá₂ juí₂g' 'nia'₂ i₂lín'₅ dsi₂nau₂: Ia₁
dsón'₂ lín₅ jniá₂ jan₂ dsa₂ i₂chen₄ ja₁con₂ dsi₂nau₂,
jmo₅ jniá₂ dsi₃ 'ŋio₅ lín₃ dsen₅₄ ta₁ quió'₃, 14 con'₂ tsá₃
ŋó₅ ně₁jua'₂ ca₂rě₃dsí'₅ dsa₂ go₃ jniá₂ ja₁con'₂ 'nia'₂,
jaun₂ lé₂ líón₂ i₂lín₅₄ 'éi₂. 15 Chi₂jua'₂ jme₁ca₂téi₂
Diú₄ quió'₅ dsa₂ judíos, ca₂lí'₃ dsa₂ mi₂güí₃ a₂ca₂'ág₂
caun₂ jág₁ quian'₅₄ Diú₄, ¿'e₂ bá₄ lé₂ jaun₂ ně₃
jě₁ma₂tě₂ rě₁guéi'₂ Diú₄ quió'₅ dsa₂ 'éi₂? Lé₂ co₂'nió'₄
ca₂gue₃ táng₃ jme₂dsí₂ dsa₂ i₂jme₁ma₂rě₂'lín₄.

16 Chi₂jua'₂ lě₅ 'í₁ ju₁lia'₂ i₁ŋí'₄ a₂le₂'uig₅₄ a₂jén'₅
dsa₂ ne₄ Diú₄, ján₃ bá₄ le₂jaun₂ lě₅ 'í₁ ta₁jě₂ ti₁can₁;
ján₃ bá₄ chi₂jua'₂ lě₅ 'í₁ le₃quió'₅ Diú₄ ju₁lia'₂ jmú₄
caun₂ ni₁'ma₂, ján₃ bá₄ le₂jaun₂ lě₅ 'í₁ ni₁gu'₂ nei'₅₄
ni₁'ma₂ ján₃.

§ 11:10 Salmo 69:22-23.

17 Dsa₂ judíos i₂ca₂téi₂ Diú₄ 'éi₂ ně₃, lín₅ co₂'nió'₄ gu'₂-nei'₅₄ ni₁'ma₂ olivo a₂chein'₅₄, a₂ca₂uín'₂ a₂lin₅₄ ni₁gu'₂; ně₃ ně₃, chi₂jua'₂ lín'₅ 'ne₂ jan₂ dsí₂nau₂ i₂ma₂rě₂'lión₅, ně₂jag₄ bá₄ caun₂ ni₁gu'₂ olivo a₂cha₂ ja₁nau₂, ma₂qui₂ma₂guión'₃ jmi'₅₄ ni₁'ma₂ olivo a₂qui₂jme₂tan₅₄ ni₁gu'₂, 18 tsá₃ jmó'₂ táng'₅ ja₁con₂ ni₁gu'₂ siá'₂. Chi₂jua'₂ le₂jaun₂ jmó'₂, dsá₂ 'au'₂ jmo₄, on₃jua'₅₄ 'ne₂ jme₂tang'₅₄ jmú₄; jmú₄ bá₄ jmetau₅₄ 'ne₂.

19 Mei'₂ tsá₃ le₃ḡag'₅₄ 'ne₂, jaun₂ ně₃: “Ján₅, dsau₅ bá₄ ně₅. La₁ia₁ a₂ca₂uín'₂ ni₁gu'₂ jaun₂ ia₁jaun₂ lén₂ jniá₂ jan₂ i₂rě₂'lión₅ ja₁jme₁ca₂tín₂.” 20 Dse₃, la₁ ca₂uín'₂ ni₁gu'₂ jaun₂ 'uig₅₄ ia₁ a₂tsá₃ jme₁'éin₂, la₁ 'ne₂ guě'₂ ně₃ tē₂'ḡiág'₄ 'uig₅₄ ia₁ a₂'éng'₂. Le₂ně₅ bá₄ jaun₂, jui₁le₁gan'₃ 'nia'₂, tsá₃ lē₁jmo₂ róng'₂. 21 Ia₁ chi₂jua'₂ tsá₃ ca₂dsia₃ Diú₄ ḡéi₂ dsí₅ ja₁con₂ ni₁gu'₂ quió'₅ tē₃dsón'₂ ni₁'ma₂ jaun₂, ján₃ bá₄ le₂jaun₂ tsá₃ dsia₃ ḡéi₂ dsí₅ ja₁con₂ 'ne₂ ján₃.

22 Jag₄ jaun₂, 'e₂ guě₄ dsen₃ Diú₄, la₁ ján₃ bá₄ rě₂ qui₂dsí₂₃ 'éi'₃. Ia₁ ma₂qui₂dsí₂₃ 'éi'₃ ja₁con₂ i₂ma₂ca₂sén'₂, la₁ dsein₃ bá₄ quian'₅₄ 'ne₂, chi₂jua'₂ caun₂ náu'₁ tiá₂ jui₅ ja₁'ua₁ dsí₅ Diú₄. Ia₁ ně₁jua'₂ tsá₃ le₂jaun₂, ján₃ bá₄ quéin'₂ 'ne₂.

23 Jui₁lia'₂ 'éi₂ ně₃, ně₁jua'₂ ca₂rě₃'éin₂ táng₃, lé₂ bá₄ le₃'lióin₃. Ia₁ 'io₅ Diú₄ bí₂ chóng'₃ táng₃. 24 Ia₁ ně₁jua'₂ 'ne₂, jan₂ dsí₂nau₂, co₂'nió'₄ caun₂ ni₁gu'₂ nau₂, ca₂queng'₃ dse₃ quian'₅₄ ni₁'ma₂ olivo a₂chein'₅₄, o₁jḡia'₅₄ líng'₅ ni₁gu'₂ ni₁'ma₂ siá'₂, 'e₂ guě₄ tson₂ lé₂ le₃quen'₃ 'éi₂, i₂lín₅ co₂'nió'₄ ni₁gu'₂ a₂caun₂ ne₅₄ quian'₅₄ ni₁'ma₂ olivo jaun₂!

A₂tín'₄ dsa₂ jui₂ Israel

25 Rin'⁵⁴ jniog⁴, tsá³ 'nio³ jniá² jua'⁵⁴ tsá³ ŋi'⁵⁴ 'nia'² jág¹ a₂jme₁rē₂'ma⁴ la₂, con'² tsá³ ŋó⁵ nē₁jua'² ca₂jmo'⁵⁴ 'nia'² róng'² quian'⁵⁴ a₂ŋí'² 'au'² 'nia'² guiong'⁵⁴. Ju₁lia'² ma₂jmo₃ i₂lin⁵⁴ dsa₂ juig₂ Israel, ca₂rē₃'uá'³ dsí₅, ca₂lia'² ca₂rē₃'ŋia₅ dsi₂nau₂ i₂con'² ca₂tín₂ tón'³, 26 Jaun₂ guě₄ líón₂ ca₂le₃jín₃ dsa₂ juig₂ Israel, ia₁ juá'² ne₄ Si₂:

O₃'in₅ dsa₂ i₂lió₂ juig₂ Sión,*

co₂dsia₅ ŋiá'² a₂tsá₃ dse₃ jmo₅ tsi₁jon₂ Jacob.

27 Jaun₂ a₂la₂ bá₄ jág₁ quió₃ jmo₅₄ quiang'⁵⁴ dsa₂ 'éi₂: jē₁ma₂tě₂ rē₁'éng₄ dsáu₁.†

28 Ju₁lia'² tē₂le₃ quian'⁵⁴ jág₁ dse₃ a₂lión₂ dsa₂, líin₅ co₂'nió'⁴ dsa₂ i₂'ŋia₅₄ Diú₄, o₄quián'² 'nia'²; la₁ lia'² ma₂'nio₃ jaun₂ bá₄ Diú₄ quió'⁵ dsa₂ 'éi₂, ia₁ a₂ca₂quióin'² dsa₂ can'⁵⁴ quiáin₅ ma₂líg'². 29 Ia₁ tsá₃ dsi₂quén'⁵ dsí₅ Diú₄ ju₁lia'² a₂cuě₂₃, on₃ guě'² ju₁lia'² a₂tě₂. 30 Ju₁lia'² 'nia'² ně₃, i₂tsá₃ jme₁ne'⁵⁴ ja₁con₂ Diú₄ le₂ŋiá₅, ma₂ca₂tín'² 'nia'² a₂ŋéi₂ dsí₅ Diú₄ rē₂ně₃, 'uig₅₄ ia₁ a₂tsá₃ ne'⁵⁴ dsa₂ 'éi₂, 31 ján₃ bá₄ le₂ně₅ tsá₃ ne'⁵⁴ dsa₂ 'éi₂ rē₂ně₃, ia₁jaun₂ tē₂le₃ quian'⁵⁴ a₂ŋéi₂ dsí₅ Diú₄ a₂ca₂tín'² 'nia'², tīn₅₄ ján₃ a₂ŋéi₂ dsí₅ Diú₄. 32 Ia₁ Diú₄ ně₃ co₂rē₂ bá₄ 'i_{in}₃ dsa₂ a₂tsá₃ ne'⁵⁴ dsa₂ le₂jain₂ le₂jain₂, ia₁jaun₂ co₂dsia₅ bá₄ dsia₃ ŋéi₂ dsí₅ ja₁con₂ ca₂le₃jín₃.

33 i'E₂ guě₄ 'ŋio₅ 'ei₄ lě₅ ca₂le₃jě₃ a₂jlá'₁ cha₂ quió'⁵ Diú₄,

ca₂le₃jě₃ a₂ŋí'² dsí₅, a₂ŋi₅ ně₃!

Ca₂lia'² tsá₃ lé₂ le₃quiong₅₄ 'í₁ a₂niog₅ dsí₅,

* 11:26 Sión: co₂'nió'⁴ le₃jua'⁵⁴, juig₂ Jerusalén. † 11:27 Isaías 59:20-21; 27:9.

on₃ guè'₂ lé₂ le₃ ñág'₂ dsí₅ jui₅ quió'₅.

34 “¿'Ein₂ bá₄ cuí'₅ 'e₂ dsí₂ jiog₅ dsí₅ Te₁gui'₅₄,

o₃ 'ein₂ i₂ma₂tió'₃ cuë₃ jág₁ dse₃ cuë'₃ 'éi₂?” †

35 “¿'Ein₂ bá₄ ca₂cuë₃ 'e₂ ca₂cuë'₃ 'éi₂ le₂'uig₅₄

ia₁jaun₂ jéin'₃ qui₃ quió'₅?” §

36 Ia₁ ca₂le₃jě₃ a₂niog₅ cha₂, ca₂lě₃

ja₁con₂ 'éi₂, tē₂le₃ quian'₅₄ 'éi₂, o₄quió'₄ 'éi₂ ně₃.

¡jui₁jme₂juag'₂ bá₄ dsa₂ co₂tan₅₄! A₂méi₃.

12

A₂ lia'₂ i₂nio₄ dsa₂ i₂rě₂tson₄ quián₅ Diú₄

1 Le₂ně₅ bá₄ jaun₂ rin'₅₄ jniog₄, tē₂le₃ quian'₅₄

a₂ñéi₂ dsí₅ Diú₄, mi₅ jniá₂ ne'₅₄ 'nia'₂, co₂dsia₅ jin'₄

'nia'₂ ni₁ñi'₁ guiong'₅₄, co₂'nió'₄ a₂rě₂jeng'₅₄ le₁jén'₃

ne₄ Diú₄, a₂rě₂tsong'₅₄, a₂'ñio₂ dsí₅ Diú₄, a₂dsi₂ten₅₄

jme₁ti'₄ ne₅₄. 2 Tsá₃ i₁nio'₄ 'nia'₂ lia'₂ con'₂ lě₅ i₂nio₄

dsa₂ mi₂güí₃ la₂. Tē₂le₃ cuë₄ jmig₄ a₂jme₃tsín₃

Diú₄ 'a₂ lia'₂ qui₂dsi₂jñia₅ 'au'₂ 'nia'₂, ia₁jaun₂ bá₄

qui₃le₃'mag'₂ táng₃ 'au'₂, ia₁jaun₂ lé₂ le₃caun'₅₄ 'nia'₂

'í₁ 'a₂ lia'₂ lě₅ a₂'ñio₂ dsí₅ Diú₄, a₂dse₃, a₂tě₅ dsí₅,

a₂rě₂'ñia₅ ně₃.

3 Ia₁ o₄quió'₄ a₂'ua₁ dsí₅ Diú₄ a₂ma₂dsia₃ gu₃

jniá₂, juí₂ jniá₂ le₂jan'₂ le₂jan'₂ 'nia'₂: tsá₃

lě₁jui₁qui₂dsi₂jñia₅ 'au'₂ a₂lín₅ dseng'₅₄ ñag₅₄

guě₄ con'₂ ca₂tín'₂ 'nia'₂ dsí₃jñia₅ 'au'₂; tē₂le₃

jui₁qui₂dsi₃jiog₅ bá₄ 'au'₂ a₂'en₅₄ 'au'₂ 'nia'₂, 'a₂ con'₂

tí₅ ma₂ca₂rě₃'én'₂ 'nia'₂ a₂ma₂cuë₃ Diú₄. 4 Ia₁ le₂ně₅

jui₁lia'₂ lě₅ caun₂ ni₁ñi'₁ jniog₄ le₂jau₂ le₂jau₂, 'lióng₂

a₂chei₂ le₂caun₂ le₂caun₂ a₂tén₅ quió'₅, tsá₃ ca₂ne₅₄

† 11:34 Isaías 40:13. § 11:35 Job 41:11.

ta₁ jme₂ti₃, ⁵ le₂në₅ bá₄ jniog₄ ján₃, juí₁'a₂ guě₃ la₂
juag₅ jniog₄, caun₂ bá₄ ni₁ñi₁₂ jniog₄ lág₅ le₃quió'₅
Cristo, téi₅ jniog₄ le₂jau₂ le₂jau₂ quian'₅₄ rin'₅₄.

⁶ Jma₃quén₅ bá₄ qui₂'au₂ jniog₄ bí₂, lia'₂ con'₂ lě₅
ma₂cuě₃ Diú₄ a₂'ua₁ dsí₅. Jaun₂ ca₂tág₂ jniog₄ jmo'₄
ta₁ juí₅bí₂ a₂ma₂cuě₃. Juí₁lia'₂ dsa₂ i₂ma₂cuě₃ Diú₄
bí₂ a₂tñn₂ a₂'ě₂ jág₁ dse₃ a₂gue₂₃ quió'₅ Diú₄, juí₁'ě₅₄
bá₄ jág₁ 'a₂ con'₂ tí₅ a₂'éin₂; ⁷ juí₁lia'₂ i₂ma₂cuě₃ juí₅bí₂
jme₃'o₅₄, juí₁jme₂'o₅₄; juí₁lia'₂ i₂'io₅ bí₂ jme₃tag₂₃,
juí₁jme₂tñn₂₃ bá₄ dsa₂; ⁸ juí₁lia'₂ i₂tñn₂ jmo₃ lián'₂
dsí₅ i₂sián'₂, ca₂tñn₂ bá₄ jmo₃ le₂jaun₂; juí₁lia'₂ i₂jmo₅
dsióg₁, juí₁cuě₁₂ a₂'ua₁ dsí₅, on₃jua'₅₄ rě'₂ cha₂ a₂'ín₂
dsí₅ 'ñiog₅; juí₁lia'₂ i₂quian₅ ne₄ juí₅, juí₁jmo₁₂ bá₄
a₂dsen₅₄ dsí₅; juí₁lia'₂ i₂dsia₅ ñéi₂ dsí₅, juí₁jmo₁₂ bá₄
quian'₅₄ o₂'ñi₃ o₂ñia₃ dsí₅.

'A₂ lia'₂ ca₂tñn₂ le₃chan₂ dsa₂ quián₅ Cristo

⁹ Juí₁le₂chan'₂ 'nia'₂ tē₃dsón'₂ bá₄ a₂'nió'₃ 'nia'₂
rín_g'₂ le₂jang'₂ le₂jang'₂. Co₂dsia₅ jmo₄ 'nia'₂ 'ñiag'₅₄
co₂ñei'₅₄ a₂'lig'₅₄; chan'₂ bá₄ 'nia'₂ tiá₂ juí₁lia'₂ a₂dse₃.
¹⁰ Jme₁'nió'₄ 'nia'₂ rín_g'₂ a₂'ñio₂ 'au'₂; jmo₄ 'nia'₂
a₂dsen₅₄ guě₄ rín_g'₂ le₂jang'₂ le₂jang'₂.*

¹¹ Tsá₃ jmo₂ 'nia'₂ juín_g'₅, 'ag₃ caun₂-tñn₃ 'au'₂,
tē₂le₃ jme₁ti₁ ne₄ Te₁gui'₅₄ ca₂lia'₂ dsen₅₄ jme₂dsí₂
quián_g'₂.

¹² Juí₁chan'₂ 'nia'₂ o₂ñia₃ 'au'₂, ia₁ ma₂lě₅ bá₄
co₂ñia₅₄ a₂'ín₂ 'au'₂ 'nia'₂. Jmo₄ 'nia'₂ juín'₂ 'au'₂ jmig₄
jme₁chan'₂ 'nia'₂ o₂i₁ dsí₅. O₁nió'₄ bá₄ 'nia'₂ co₂tan₅₄
a₂chi₂leng'₅₄ Diú₄.

* **12:10** O₃, “jme₁li₅₄ tē₃ñiá₅ a₂jme₂gan'₃ 'nia'₂ rín_g'₂ le₂jang'₂
le₂jang'₂.”

13 Jme₁'on₁ 'nia'₂ dsa₂ 'én₂ ríng'₂ chi₂jua'₂ 'e₂ niog₅ cha₂ a₂'nió'₅ quió'₅. Dse₃ guen₅₄ 'nia'₂ jui₁lia'₂ 'ein₂ niog₅ qui₂dsi₂jag₅₄ 'nia'₂.

14 Jme₁gu'₅₄ bá₄ 'nia'₂ jui₁lia'₂ i₂jmóg'₂. Jua'₅₄ bá₄ 'nia'₂ jág₁ dse₃ on₃jua'₅₄ jág₁ uig₅.

15 Jmo₄ 'nia'₂ 'io'₂ quian'₅₄ jui₁lia'₂ i₂jmo₅ 'io'₂; ján₃ guë'₂ qui'₂-o₄ 'nia'₂ quian'₅₄ i₂'o₅.

16 Jui₁le₂chan'₂ bá₄ 'nia'₂ a₂jeng'₂ le₂jang'₂ le₂jang'₂. Tsá₃ jmo₂ 'nia'₂ róng'₂, co₂rín'₂ bá₄ 'nia'₂ jmo₄ quiang'₅₄ dsa₂ te₂ñé₂. Tsá₃ lë₁jmo₂ 'nia'₂ jua'₅₄ a₂ñí₄ lë₃ cuing'₂.

17 Tsá₃ jein'₅₄ 'nia'₂ 'lig'₅₄ quian'₅₄ a₂'lig'₅₄. Quen'₂ 'nia'₂ bí₂ jmó'₂ con'₂ dsi₂ten₅₄ ja₁të₃ ne₄ ca₂le₃jín₃.

18 Jmo₄ 'nia'₂ bí₂, 'a₂ con'₂ ca₂tíng'₂, 'a₂ con'₂ ja₁qui'₅₄ 'nia'₂ jmíg₄, 'nau'₅₄ 'nia'₂ jui₅ ja₁'ag₃ tei₄

quian'₅₄ ca₂le₃jín₃. 19 Rín'₅₄ jniog₄, tsá₃ lë₁jen'₅₄ 'nia'₂ guiong'₅₄ jui₁lia'₂ quió'₅ i₂jmóg'₂, të₂le₃ dsia₄ 'nia'₂

o₄gú₃ Diú₄ a₂jaun₂. Ia₁ ma₂rë₂ton₅ ne₄ Si₂: “Jniá₂ bá₄ ca₂tíng'₂ jein'₅₄ uig₅; jniá₂ bá₄ qui₄, juá'₂ Te₁gui'₅₄.”†

20 La₁: “Chi₂jua'₂ i₁cón'₅ jui₁lia'₂ dsa₂ i₂'iog₅₄, cuë'₅₄ bá₄ 'nia'₂ a₂guë'₃. Chi₂jua'₂ ñi₂₃ rë₂quein₂ dsí₅, cuë'₅₄

a₂'ín'₂. Ia₁ jë₁ma₂ca₂jmo'₅₄ le₂në₅, jmai'₅₄ tsáu₃ dséi₂ dsi₂ne₅₄, ‡ jéin'₄ o₂guí'₃.”§ 21 Tsá₃ cuín₅ jmíg₄ jua'₅₄

a₂jō₃ a₂'lig'₅₄; të₂le₃ quen'₂ bí₂, tión₃ 'uë₃ a₂'lig'₅₄ të₂le₃ quian'₅₄ a₂dse₃.

13

1 Ca₂le₃jín₃ bá₄ ca₂tín₂ tón'₃ 'éi'₃ quió'₅ dsi₂tan₅₄ i₂gon₂. Ia₁ 'i₁jan₂ dsi₂tan₅₄ i₂chan₂, jua'₅₄ tsá₃

† 12:19 Deuteronomio 32:35. ‡ 12:20 lit. “jmó'₂ nio₃ ni₁ta'₂ le₁guí'₂ si₂ ne₄ mi₂dsi₅₄.” § 12:20 Proverbios 25:21-22.

ca₂chei' ₃ Diú₄. Jaun₂ ca₂le₃jín₃ dsi₂tan₅₄ i₂chan₂ ně₃,
i₂dsián₁ quián₅ Diú₄ bá₄ 'éi₂. ² Jaun₂ le₂ně₅, jui₁lia'₂
i₂nau₂ quen₅ ja₁con₂ dsi₂tan₅₄, nau₂ quein₂₃ ja₁con₂
i₂dsián₁ quián₅ Diú₄ bá₄. Jaun₂ gue₃ uig₅ jui₁lia'₂
i₂jmo₅ le₂jaun₂. ³ Ia₁ tsá₃ ta₁ jaun₂ dsián₄ dsi₂tan₅₄
a₂jmo₃ gó'₅ jui₁lia'₂ i₂jmo₅ a₂dse₃; a₂jmo₃ gó'₅ dsa₂
i₂jmo₅-dsáu₅ a₂'lig'₅₄ bá₄. ¿'Niog'₂ 'ne₂ le₃chang'₂
a₂tsá₃ gang'₃ dsi₂tan₅₄? Jmo₄ bá₄ a₂dse₃, jaun₂ con₂
'í₁ dsi₂tan₅₄ ja₁cong'₂, a₂líng'₅ dsa₂ dsen₃. ⁴ Ia₁ ta₁
jaun₂ tián'₅ jme₂ti₃ ne₄ Diú₄ bá₄, a₂dse₃ quiáng'₂.
La₁ ně₁jua'₂ ca₂jmo'₅₄ a₂'lig'₅₄ ně₃, ca₂tíng'₂ le₃gang'₃,
ia₁ on₃jua'₅₄ a₂lě₁lě₄ 'io₅ dsi₂tan₅₄ 'éi'₃ a₂chain₂ bí₂
cuē₃ uig₅. Jan₂ i₂jme₂ti₃ ne₄ Diú₄ bá₄ 'éi₂, a₂ě₂ uig₅
ja₁con₂ dsa₂ i₂jmo₅ a₂'lig'₅₄. ⁵ Jaun₂ lě₃, tion₅₄ bá₄
'nió'₅ tón'₃ dsa₂ 'éi'₃ quió'₅ dsi₂tan₅₄, on₃jua'₅₄ rě'₂
a₂jñia'₅₄ ia₁jaun₂ tsá₃ gue₃ uig₅; tě₂le₃ ia₁ a₂lě₅ dsí₅
le₂jaun₂ jmo₂₃ a₂dse₃. ⁶ 'Uig₅₄ ně₅ bá₄ qui'₂ 'nia'₂ 'lia'₅₄
a₂ca₂tín₂ dsi₂tan₅₄, ia₁ ca₂ne₅₄ jme₂ti₃ dsi₂tan₅₄ ta₁
a₂lín₅ ne₄ Diú₄.

⁷ Cuē'₅₄ bá₄ 'nia'₂ dsa₂ 'e₂ niog₅ qui₂ca₂tín₂.
Chi₂jua'₂ ca₂tín₂ dsi₂tan₅₄ 'lia'₅₄, qui₄ 'lia'₅₄; chi₂jua'₂
ca₂tín₂ mi₃ cu₄ te₁'éng'₂, cuē'₅₄ cu₄ jaun₂; chi₂jua'₂
'ein₂ ca₂tín₂ jme₃go₃ dsa₂, jme₁gan₃ bá₄ 'éi₂; chi₂jua'₂
'ein₂ ca₂tín₂ jme₃juag'₂ dsa₂, jme₁juin'₂ bá₄.
⁸ Ja₁con₂ 'i₁jan₂ tsá₃ jui₁le₅₄ jua'₅₄ cha₂ a₂quile₂rín'₂
'nia'₂ uě₂, jñia'₅₄ lia'₂ a₂quile₂ring'₂ a₂'nióg'₃ ríng'₂
le₂jang'₂ le₂jang'₂ bá₄; ia₁ jui₁lia'₂ i₂'nio₃ dsa₂
mi₂güí₃ rín'₅₄, ma₂ca₂jme₃ti₃ 'Éi'₃ quió'₅ Diú₄. ⁹ Juá'₂
'Éi'₃ quió'₅ Diú₄: “Tsá₃ nióg'₄ jág₁ quian'₅₄ i₂tsá₃ lín₅
dsi₂i₂gog'₂; tsá₃ jñíg'₄ dsa₂ mi₂güí₃ ríng'₂; tsá₃ 'áng'₁;

tsá₃ jmó'₂ jág₁ tëjág₁; tsá₃ jmó'₂ 'ín₅ 'au'₂ a₂quió'₅ i₂sián'₂."* 'Éi'₃ në₅ quian'₅₄ guë'₄ ca₂le₃jě₃ 'éi'₃ siá'₂ në₃, qui₂rë₂tan₅₄ quian'₅₄ jág₁ la₂: "Jme₁'nió'₄ dsa₂ mi₂güí₃ ríng'₂ juí₁lia'₂ 'nióg'₃ 'ñiag'₂."†

¹⁰ Juí₁lia'₂ dsa₂ i₂'nio₃ dsa₂ mi₂güí₃ rin'₅₄, tsá₃ 'e₂ 'lig'₅₄ jmo₂₃ ja₁coin₂. Le₂në₅ bá₄ jaun₂ ja₁'nio₃ dsa₂ riin'₅₄, co₂'nió'₄ ca₂rë₃ti₃ bá₄ 'Éi'₃ qui'₅ Si₂.

¹¹ Jë₄ ca₂le₃jě₃ a₂në₅ në₃, jmo₄ a₂ñí'₂ 'au'₂ juí₁lia'₂ jmí₄ chong₂ rë₂në₃, a₂ma₂ca₂tě₂ hora a₂ñéi'₂ jniog₄ jë₄ le₁guág₃. Ia₁ jë₁lió₂ jniog₄ caun₂ ma₂ja₂quián₃ co₂ñí'₂ bá₄ rë₂në₃ lia'₂ con'₂ guë'₄ jme₁ca₂rë₃'éin₂ jniog₄ le₂'uig₅₄.

¹² Juí₁lia'₂ jë₄ 'uë₂ la₂ caun₂ qui₂dsi₂juin₅₄ bá₄; caun₂ ma₂ja₂quián₃ jnia₅₄ bá₄. 'Uig₅₄ jaun₂ bá₄ ca₂tág₂ jniog₄ tí₄ a₂tsá₃ ma₃jmó'₁ juí₁lia'₂ a₂lě₂ jë₄ qui₁né'₃, a₂quián₁ qui'₅₄ ca₂le₃jě₃ a₂'nió'₅ quián₂, a₂jmo₅ 'í₁, a₂i₁nió₁ juí₁lia'₂ 'lióg₂ i₂i₂nió₄ jë₄ jniá₂ si₂. ¹³ Juí₁i₁nió₁ jniog₄ lia'₂ con'₂ dsi₂ten₅₄, juí₁lia'₂ i₂nió₄ dsa₂ a₂jmi₂. Tsá₃ ma₃'nió'₅ le₃chong₂ i₁nió₁ le₁'ein₅, on₃ guë'₂ o₂'ñió₃ o₂jñia₃ dsi₅, on₃ guë'₂ nió'₄ jniog₄ jág₁ quian'₅₄ i₂tsá₃ lín₅ dsi₂i₂gu₂ jniog₄, on₃ guë'₂ jmó'₁ a₂tsá₃ dsi₂ten₅₄, on₃ guë'₂ dsiá₁ mi'₅₄, on₃ guë'₂ qui₁jñi₁ uin₅ dsi₅ rin'₅₄ në₃. ¹⁴ Të₂le₃ qui'₂ 'nia'₂ co₂'nió'₄ a₂qui₂rë₂lión'₃ 'nia'₂ lě₅ 'í₁ të₂le₃ quian'₅₄ 'ñiog₅ Te₁gui'₅₄ Jesucristo, tsá₃ ma₃juí₁dsi₂jio₅ guë'₄ 'au'₂ 'a₂ lia'₂ mag'₂ dsi₅ a₂mi₅ ni₁ñí'₁ 'nia'₂.

14

Tsá₃ chi₂'ing'₄ uig₅ ríng'₂

* **13:9** Éxodo 20:13-15,17; Deuteronomio 5:17-19,21. † **13:9** Levítico 19:18.

1 Chi₂jua'₂ chan₂ dsa₂ 'uan₅₄ tē₂le₃ quian'₅₄ a₂'éin₂, qui₁guein₅₄ 'nia'₂, la₁ on₃jua'₅₄ ia₁jaun₂ qui₁tsín'₂ 'nia'₂ 'a₂ lia'₂ lē₅ ŋí'₂. 2 Chan₂ i₂lín₅₄ i₂'én₂ a₂lé₂ le₃guě'₃ ca₂le₃jě₃ jui₁'e₂ guě₃, ton'₂ chan₂ guě'₂ táng₃ i₂lín₅₄ i₂'uan₅₄ dsí₅ 'a₂ lia'₂ 'éin₂, i₂guě'₅ jmá'₃ lia'₂ ca₂ne₅₄ mi₂ján'₅. 3 Jaun₂ lē₃ i₂guě'₅ lia'₂ 'ei₅ ne₄ ně₃, tsá₃ ca₂tín₂ jmo₃ jua'₅₄ tsá₃ jein₅₄ i₂tín₂ dsí₅ guě'₅ jmá'₃ lia'₂ a₂lín₅₄ má₃; ton'₂ ján₃ guě'₂ le₂jaun₂ jui₁lia'₂ i₂tsá₃ guě'₅ le₃jě₃, tsá₃ lē₃o₁quion₂ 'í₁ ja₁con₂ dsa₂ i₂guě'₅ le₃jě₃. Ia₁ ján₃ bá₄ ca₂guéi'₂ Diú₄ quió'₅ dsa₂ 'éi₂.

4 'Ne₂ guě'₂, ħ'ein₂ bá₄ líng'₅ jua'₅₄ a₂caun'₅₄ 'í₁ ja₁con₂ dsa₂ i₂jme₂ti₃ ne₄ i₂sián'₂? Ia₁ juig₅₄ bá₄ 'éi₂ i₂nio₅ ne₄ con₂ 'í₁ chi₂jua'₂ chén'₅ 'éi₂ rē₂, o₃ tē₁tsiin'₅₄ 'lig'₅₄ 'e₂. Jaun₂ tē₃tsiin'₅₄ bá₄ rē₂, ia₁ i₂qui'₅₄ jmig₄ Te₁gui'₅₄ jmo₃ a₂tē₃tsin'₅₄ dsa₂ 'éi₂.

5 Chan₂ guě'₂ i₂lín₅₄ táng₃ i₂jmo₅ dsí₅, 'ŋio₅ guě₄ quen₅ a₂lín₅₄ jmig₄ lia'₂ con'₂ guě₄ jmig₄ siá'₂; chan₂ guě'₂ i₂lín₅₄ i₂'én₂ jmo₂₃ dsí₅ a₂co₂rē₂ bá₄ ca₂le₃jě₃ jmig₄. Le₂jan₂ le₂jan₂ 'nió'₅ jmo₃ 'ei₅ caun₂ dsí₅ lia'₂ con'₂ lē₅ dsí₂ŋia₅ dsí₅ 'ŋiog₅. 6 Jui₁lia'₂ dsa₂ i₂jme₂gó'₃ caun₂ jmig₄, le₃quió'₅ Te₁gui'₅₄ bá₄ jme₂gó'₃ jmig₄ jaun₂. Le₂nē₅ bá₄ jui₁lia'₂ dsa₂ i₂guě'₅ lia'₂ 'ei₅ ne₄ má₃, guě'₅ le₃quió'₅ Te₁gui'₅₄, ia₁ cuě'₅ ti₁'mag'₄ Diú₄. Ján₃ bá₄ le₂nē₅ quian'₅₄ jui₁lia'₂ i₂tsá₃ guě'₅ lia'₂ 'ei₅ ne₄ má₃, le₃quió'₅ Te₁gui'₅₄ bá₄ tsá₃ guě'₅; ján₃ bá₄ cuě'₅ ti₁'mag'₄ Diú₄.

7 Ia₁ 'i₁jan₂ jniog₄ tsá₃ lé₂ le₃chong₂ le₃quián₂ guio₅₄, on₃ guě'₂ lé₂ le₃dsió₃ le₃quián₂ guio₅₄ ně₃. 8 Ia₁ tē₁lia'₂ chong₂ jniog₄, chong₂ le₃quió'₅ Te₁gui'₅₄ bá₄, ně₁jua'₂ ca₂dsau₃ guě'₂ ně₃, dsió₃ le₃quió'₅

Te₁gui'₅₄ bá₄ ján₃. Le₂ně₅ bá₄, tē₁lia'₂ chong₂ o₃
jē₁ma₂dsau₃ 'e₂, lág₅ i₂quián₅ Te₁gui'₅₄ bá₄. ⁹ 'Uig₅₄
jaun₂ ca₂jon₃ Cristo, ton'₂ ca₂jein'₅₄ táng₃: ia₁jaun₂
léin₂ Te₁gui'₅₄ quián₅ dsa₂ i₂ma₂dsan₃, lia'₂ dsa₂
i₂chan₂ ně₃.

¹⁰ La₁ 'ne₂ ně₃, ċ'e₂ 'uig₅₄ cáun'₂ 'í₁ ja₁con₂ ríng'₂?
ċO₃ 'e₂ lē₃ jing'₅₄ sion₅ ríng'₂? Ia₁ ca₂le₃jág₃ bá₄ jniog₄
dsi₁no₃ dsi₂jme₁nia₅ ne₄ Diú₄ ia₁jaun₂ con₂ 'éi₂ 'í₁
quián₂. ¹¹ Ia₁ ne₄ Si₂juá'₂:

Jui₁lia'₂ a₂dsón'₂ dsau₅ bá₄ a₂chan₂ jniá₂,

juá'₂ Te₁gui'₅₄,

le₂ně₅ bá₄ dsau₅ dsón'₂,

ca₂le₃jín₃ bá₄ qui₃jóin'₂ jne₅₄ ne₃ jniá₂,

jaun₂ ca₂le₃jín₃ bá₄ jmo₃ jág₁ quian'₅₄ mi₂'o₅₄

le₃ne₄ Diú₄.*

¹² Le₂ně₅ bá₄ jaun₂, le₂jau₂ le₂jau₂ bá₄ jniog₄
dsi₁jang'₅₄ jág₁ dsau₅ quián₂ ne₄ Diú₄.

Tsá₃ jmó'₂ jua'₅₄ qui₂nió₃ ríng'₂

¹³ Jaun₂ lē₃, tsá₃ ma₃jua'₅₄ qui₁quiong₅₄ jniog₄ 'í₁
le₂jau₂ le₂jau₂ ja₁con₂ rin'₅₄. Tē₂le₃ jmo₄ 'nia'₂ 'í₁,
jmo₄ co₂ŋei'₅₄ tsá₃ 'e₂ jmó'₂ 'i₁caun₂ jua'₅₄ a₂qui₂nió₃
ríng'₂. ¹⁴ Guion₄ bá₄ jniá₂, 'ei₅ caun₂ dsí₃ le₃quió'₅

Te₁gui'₅₄, 'i₁caun₂ tsá₃ cha₂ jua'₅₄ tsá₃ le₃jě₃ con'₂
lě₅ 'ŋiog₅. La₁ nē₁jua'₂ chan₂ jan₂ jmo₂₃ dsí₅, cha₂
caun₂ a₂tsá₃ le₃jě₃, le₃quió'₅ 'ŋiog₅ bá₄, tsá₃ le₃jě₃.

¹⁵ Nē₁jua'₂ ca₂jén'₃ qui'₂ dsí₅ ríng'₂ o₄quió'₄ a₂quě'₂
'ne₂, tsá₃ ma₃jmo'₂ a₂'nióg'₃ ríng'₂. Tsá₃ jmo₂ jua'₅₄
cuě'₁ ju₁₅ o₄quió'₄ a₂quě'₂, a₂dsi₂'én₂ jan₂ ríng'₂, ia₁
ca₂jon₃ Cristo o₄quió'₄ 'éi₂ján₃. ¹⁶ Tsá₃ cuě₂ 'nia'₂ ju₁₅
jua'₅₄ a₂qui₃dsia₃ dsa₂ 'li_g'₅₄ 'ě₃ jui₁lia'₂ a₂jmo'₂ 'au'₂

* **14:11** Isaías 49:18; 45:23.

a₂dse₃. ¹⁷ Ia₁ jui₁lia'₂ ja₁gon₂ Diú₄, tsá₃ lin₄ quen₅ jui₁lia'₂ a₂gué'₅ dsa₂, a₂qui₂'ín'₂ dsa₂ ně₃; a₂jaun₂ bá₄ a₂quen₅ gué'₄ lin₃: a₂guéi'₂ Diú₄ jniog₄ ně₂jag₄ bá₄ a₂tsá'₃ e₂ dso₄ rag₂, a₂Chong₂ jniog₄ tei₄ o₂'ñi₃ o₂ñia₃ dsi₅ të₂le₃ quian'₅₄ Jme₂dsí₂ Jnió₅. ¹⁸ Ia₁ jui₁lia'₂ i₂jme₂ti₃ ta₁ ne₄ Cristo le₂ně₅, jmo₂₃ a₂'ñio₂ dsí₅ Diú₄, ton'₂ dse₃ 'ag₅ táng₃ dsa₂ mi₂güí₃.

¹⁹ Le₂ně₅ bá₄ jaun₂, caun₂ jui₁'niog'₅₄ jniog₄ jmá'₃ lia'₂ a₂cuē₅ jui₅ ja₁'ag₃ tei₄, a₂jme₂'o₅₄ dsi₃cau₅₄ jniog₄ të₂le₃ jui₅ jme₂dsí₂. ²⁰ Tsá₃ lē₁'én₅ 'ne₂ ta₁ quió'₅ Diú₄ o₄quió'₄ má₃, Dsón'₂ bá₄ jaun₂, a₂le₁jě₃ ca₂le₃jě₃ a₂niog₅ gué'₅ dsa₂. La₁ tsá₃ dse₃ ně₁jua'₂ o₄quió'₄ a₂quē'₂ 'ne₂, tián'₂ dso₄ ríng'₂. ²¹ Ja₂lin₃ gué'₄ dse₃ a₂tsá₃ qui₂'g'₂ ñí₅, on₃ gué'₂ 'ag'₅₄ vino, on₃ gué'₂ jmó'₂ jui₁'e₂ gué'₃ a₂lé₂ le₃qui₃nió₃ ríng'₂. ²² Jui₁lia'₂ a₂'én'₂ 'ne₂, a₂'én'₂ 'ne₂ 'ñiag'₂ bá₄ jaun₂ të₂le₃ ne₄ Diú₄. ¡'E₂ gué'₄ dsen₃ jui₁lia'₂ dsa₂ i₂con₂ 'í₁ ja₁con₂ 'ñiog₅, i₂tsá₃ qui₂dsi₂ñi₅ dsí₅ o₄quió'₄ a₂cuē₂₃ jmi₂g'₄ 'ñiog₅! ²³ La₁ jui₁lia'₂ dsa₂ i₂gué'₅, i₂'ei₅ caun₂-tin₃ dsí₅, ma₂gue₃ uig₅, ia₁ tsá₃ ca₂gué'₃ të₂le₃ quian'₅₄ a₂'éin₂. Ia₁ ca₂le₃jě₃ a₂jmo₅ dsa₂ a₂tsá₃ lě₅ të₂le₃ quian'₅₄ a₂'éin₂, dso₄ bá₄ jaun₂.

15

Jmo₄ a₂'ñio₂ dsí₅ dsa₂ mi₂güí₃ ríng'₂, on₃jua'₅₄ rē'₂ jmá'₃ a₂tě₅ 'au'₂ 'ñiag'₂

¹ Jniog₄ i₂tióng₂ tiá₂ a₂'éin₂, ca₂tág₂ guéi₁ co₂'nió'₄ caun₂ lio₅₄ quián₂, 'a₂ lia'₂ qui₂ñí'₂ dsí₅ dsa₂ i₂'uan₅₄ 'a₂ lia'₂ 'éin₂, jaun₂ tsá₃ 'nió'₅ jmó₁ con'₂ a₂tě₅ dsi₅ guio₅₄. ² Le₂jau₂ le₂jau₂ bá₄ jniog₄ ca₂tág₂ jmó₁ a₂tě₅ dsí₅ dsa₂ mi₂güí₃ rín'₅₄, a₂jmó₁ a₂lě₅ a₂dse₃ ja₁coin₂,

ju₁lia'₂ ju₅ ja₁lé₂ qui₂dsi₃cóin₃ le₃quió'₅ jme₂dsi₂.
³ Ia₁ ca₂lia'₂ njia'₅₄ 'njog₅ Cristo tsá₃ ca₂jmo₃ a₂të₅ dsí'₅
 'njog₅. Të₂le₃ ca₂i₃ñi₂ ju₁lia'₂ juá'₂ ne₄ Si₂:

Ca₂le₃jě₃ jág₁ uig₅ a₂jme₁tsí'₅ dsa₂ 'nia'₂,

ne₃jniá₂ bá₄ ca₂të₁tsí'₅₄.*

⁴ Ia₁ ca₂le₃jě₃ con'₂ lě₅ jág₁ a₂ca₂i₃to'₅₄ ne₄ Si₂,
 a₂ca₂i₃to'₅₄ ia₁jaun₂ jme₁tag₅ jniog₄ rě₂ně₃, ia₁jaun₂
 caun₂ chong₂ jniog₄ 'ín₂ dsi₅ le₃quió'₅ Diú₄, të₂le₃
 quian'₅₄ a₂juin'₂ dsi₅, a₂lě₂ lián'₂ dsi₅ a₂cuë₅ jág₁
 a₂já₅ ne₄ Si₂ jaun₂. ⁵ Ju₁jme₂'o₅₄ bá₄ Diú₄, i₂jmo₅
 a₂juin'₂ dsí'₅ dsa₂, i₂cuë₅ lián'₂ ně₃, ju₁jme₂'oin₅₄
 'nia'₂ a₂tiáng'₄ a₂jen'₂ 'nia'₂ le₂jang'₂ le₂jang'₂ con'₂
 lě₅ i₂nio'₅₄ 'nia'₂ ju₅ quió'₅ Cristo Jesús,† ⁶ ia₁jaun₂
 ca₂le₃jín'₃ 'nia'₂ co₂dsia₅, caun₂ bá₄ jág₁, jme₁juin'₂
 'nia'₂ Diú₄ Jmei₂ Te₁gui₅₄ Jesucristo quián₂.

Dsi'₂ag₅ jág₁ dse₃ja₁con₂ dsi₂nau₂

⁷ Le₂ně₅ jaun₂, qui₂guen₅₄ 'nia'₂ ríng'₂ le₂jang'₂
 le₂jang'₂ ju₁lia'₂ ca₂guéi'₂ Cristo guio₅₄ jniog₄,
 ia₁jaun₂ le₃juin'₂ Diú₄. ⁸ Ia₁ a₂juá'₅ jniá₂ juíg'₂ 'nia'₂,
 ca₂guan₃ I₂rě₂'ín₁ quián₅ Diú₄, ca₂jme₃ti₃ ja₁con₂
 jnia'₅₄ con'₂ lág₅ dsa₂ judíos,‡ ia₁jaun₂ le₃ti₃ jág₁ ron₅
 a₂ca₂ñi₂ dsa₂ can'₅₄ quián₂ jnia'₅₄ ma₂líg'₂. Jaun₂
 le₂ně₅ bá₄ ca₂rě₃jniá₂ ně₃ i₂rě₂ti'₅₄ bá₄ Diú₄ jág₁
 a₂cuë₂₃. ⁹ Guain₃ ján₃ ia₁jaun₂ jme₃juag'₂ dsi₂nau₂
 jme₃juin'₂ Diú₄ i₂ñéi₂ dsí'₅, ju₁lia'₂ rě₂ton₅ ne₄ Si₂:

'Uig₅₄ jaun₂ jme₁juin'₂ jniá₂ 'ne₂ jin₄ dsi₂nau₂;

'ë₅₄ jniá₂ ne'₅₄ 'ne₂ a₂jme₁juag'₂.§

* **15:3** Salmo 69:9. † **15:5** 'Nio'₂ja₁ton₅ Filipenses 2:5. ‡ **15:8**
 lit. “dsa₂i₂rě₂u₂ing₄ quió'₅.” § **15:9** 2 Samuel 22:50; Salmo 18:49.

10 Con'₂ siá'₂ juá'₂ táng₃:
 Jmo₄ 'io'₂, 'nia'₂ dsi₂nau₂,
 quian'₅₄ dsa₂ juig₂ quiáin₅.*

11 Ja₁ siá'₂ táng₃ juá'₂:
 Jme₁juin'₂ 'nia'₂ Te₁gui'₅₄,
 'nia'₂ ca₂le₃jín₃ dsi₂nau₂,
 jui₁jme₂juag'₂ bá₄ ca₂le₃jě₃ juig₂.†

12 Ján₃ bá₄ juá'₂ Isaías:
 'Njio₂ tsin₅ cho'₅₄ Isaí,
 jaun₂ ná₃jan₂ i₂qui₃dsi₅ 'éi'₃ ja₁con₂ dsi₂nau₂;
 le₃quió'₅ 'éi₂ bá₄ qui₃le₃'ín₂ dsí₅
 le₂caun₂ le₂caun₂ juig₂.‡

13 Jaun₂ Diú₄, i₂jmo₅ 'ei₅ caun₂ dsi₅ a₂'ín₂ dsi₅
 jniog₄, jui₁jme₂cain'₂ bá₄ 'au'₂ 'nia'₂, a₂chang'₂ jmó'₂
 'nia'₂ 'io'₂, 'ag₃ tei₄ a₂'éng'₂ le₃quió'₅, ia₁jaun₂ rě₂tsón₂
 a₂le₁'ág₄ caun₂ 'au'₂ a₂'ín₂ 'au'₂ 'nia'₂ quian'₅₄ jui₅bí₂
 quió'₅ Jme₂dsi₂ Jñiό₅.

14 Caun₂ bá₄ 'ei₅ dsi₃ jniá₂, rin'₅₄ jniog₄,
 ma₂qui₂le₁rin₅ 'au'₂ 'nia'₂ a₂ñéi₂ 'au'₂ ríng'₂, ton'₂
 qui₂le₁rin₅ 'au'₂ 'nia'₂ a₂tin'₂ 'nia'₂, jaun₂ qui'₅₄ 'nia'₂
 jmig₄ tóng'₄ jág₁ ríng'₂ le₂jang'₂ le₂jang'₂. 15 A₂tiá₂
 dsi₃ jniá₂ ma₂ně₂juá'₃ ja₁lín₅₄, ma₂ně₂tó'₃ jniá₂ jág₁
 ne₄ si₂ la₂ ne'₅₄ 'nia'₂, ia₁jaun₂ tsá₃ dsi₃'éñ₂ 'au'₂ 'nia'₂.
 A₂'ua₁ dsí₅ bá₄ Diú₄ ma₂dsia₃ gu₃ ta₁ la₂, 16 a₂jme₂tí₁
 ne₄ Jesucristo jě₄ quió'₅ dsi₂nau₂, a₂qui₂jen'₄ jniá₂
 ne'₅₄ 'nia'₂ jág₁ dse₃ a₂lión₂ dsa₂, ia₁jaun₂ lé₂ qui₁jen'₄
 'nia'₂ i₂lín'₅ dsi₂nau₂, le₃ne₄ Diú₄, ně₂jag₄ bá₄ caun₂
 a₂rě₂jen'₅₄ a₂guéi'₃, co₂'nió'₄ dsa₂ i₂ma₂rě₂tson₄,
 ca₂jmo₃ Jme₂dsi₂ Jñiό₅.

* 15:10 Deuteronomio 32:43. † 15:11 Salmo 117:1. ‡ 15:12
 Isaías 11:10.

17 Jaun₂ lě₃, jmo₅ jniá₂ táng'₅ le₃ quió'₅ Cristo Jesús, quian'₅₄ ta₁ a₂jmo₅ jniá₂ ne₄ Diú₄; 18 on₃jua'₅₄ rě'₂ a₂tiá₂ dsi₃ jniá₂ le₃juá'₄ lě₅ guě₄ lia'₂ con'₂ guě₄ ju₁lia'₂ a₂ma₂qui₂ma₂jmo₃ Cristo tē₂le₃ quian'₅₄ jniá₂, a₂tsin'₅₄ jniá₂ dsi₂nau₂ ne₄ ju₁, quian'₅₄ jág₁ quió'₃, quian'₅₄ ta₁ quió'₃ ně₃, a₂le₃ne'₅₄ 'éi₂ ne₄ Diú₄. 19 A₂lě₅ ta₁ ně₅ tē₂le₃ quian'₅₄ ju₁bí₂ a₂'io₅ léi₄ juě'₂ a₂dsi₂gó'₃ dsi₅ dsa₂, tē₂le₃ quian'₅₄ ju₁bí₂ quió'₅ Jme₂dsi₂ Jnió₅ ně₃. Le₂ně₅ bá₄ ma₂ca₂jme₁ŋiag₂₃ ta₁ ma₂qui₂ma₂'ě₃ jág₁ dse₃ quió'₅ Cristo, ca₂jme₁lióg₄ jniá₂ juig₂ Jerusalén, jaun₂ guě₄ ŋeg₅₄ ta₁caun₂ ju₁ le₃lág'₃, ca₂lia'₂ ca₂dsióg₃ tē₂ 'uě₃ Ilírico. 20 Le₂ně₅ bá₄ ma₂ca₂jmo₃ dsen₅₄ dsi₃ ma₂qui₂ma₂'ě₃ jág₁ le₂tan₅₄ juig₂ ja₁'i₁cón'₂ tsá₃ jme₁ma₂nág₂ dsa₂ a₂'in₅ dsa₂ Cristo, ia₁jaun₂ tsá₃ cho₅₄ jniá₂ ta₁ ne₄ 'uig₅₄ 'ia'₂ a₂ma₂ca₂jme₃lióg₃ i₂sián'₂. 21 La₁ ju₁lia'₂ juá'₂ ne₄ Si₂:

Jág₃ dsa₂ j₁in₃ 'éi₂
 i₂tsá₃ jme₁ma₂gú'₃ jág₁ quió'₅;
 jaun₂ le₃ŋí'₂ dsi₅
 ju₁lia'₂ i₂tsá₃ jme₁ma₂nág₂ a₂'in₅ 'éi₂.§

Dsi₂jio₃ dsi₅ Pa₄ dsó₃ ju₁ Roma

22 'Uig₅₄ ně₅ ca₂jní₃ jniá₂ ju₁ líong₂ ráun₂ lia'₂ con'₂ jme₁'nio₃ jme₁i₁jing₁₂ 'nia'₂. 23 La₁ ně₃ guě'₂ lia'₂ tsá₃ ma₃cha₂ ja₁jmo₅₄ ta₁ le₂tan₅₄ juig₂ te₁'i₁ le₃la₂, jaun₂ ma₂ne₁ŋó₄ bá₄ 'líong₂ ŋi₂ jme₁'ín₅ dsi₃ jme₁nei₅₄ i₁jing₁₂ 'nia'₂, 24 'ín₂ dsi₃ jniá₂ ŋig₅₄ ju₁ ja₁tion'₅₄ 'nia'₂ jē₁ma₂tě₂ rē₁nei₅₄ ju₁ España, ia₁jaun₂ lé₂ le₃tsag'₅₄ ne₄ ju₁ jaun₂, cang₂ jē₁ma₂ca₂mag'₂ dsi₃ jing₅₄ 'nia'₂. 25 La₁ rē₂ně₃ ně₃, 'eng₅₄ ju₁ nei₅₄ ju₁

§ 15:21 Isaías 52:15.

Jerusalén, a₂jme₁ti₁ jniá₂ ta₁ ja₁con₂ dsa₂ quián₅
 Diú₄ ja₁jaun₂. ²⁶ Ia₁ i₂chan₂ Macedonia quian'₅₄
 i₂chan₂ Acaya ně₃, ca₂jmo₃ dsí₅ ca₂cág'₃ cu₄ a₂chein₃
 ne₄ rin'₅₄ jniog₄ i₂tě₂ņé₂ i₂chan₂ juig₂ Jerusalén.
²⁷ A₂'ņio₂ dsí₅ ca₂jmo₃ le₂jaun₂, ia₁ dsau₅ bá₄ jaun₂
 riin₂ le₃quió'₅ 'éi₂. Ia₁ chi₂jua'₂ ma₂qui₂ma₂quen'₅₄
 dsí₂nau₂ a₂gu₂dsí₂ a₂ca₂cuē₃ dsa₂ judíos, ján₃ bá₄
 le₂jaun₂ ca₂tii₂ jme'₃o₅₄ quian'₅₄ a₂'nió'₅ le₃quió'₅
 ni₁ņí₅. ²⁸ Jaun₂ le₂ně₅, jě₁ma₂ca₂dsan₃ jáng'₅ jniá₂
 ne₅₄ a₂ma₂ca₂cág'₃ dsa₂ jaun₂, jaun₂ guě₄ 'ú₄ juí₅
 a₂nei₅₄ juí₅ España, a₂i₁jing₁₂ 'nia'₂ lia'₂ ma'₂eng₅₄
 juí₅. ²⁹ Jaun₂ caun₂ bá₄ 'ei₅ dsí₃, a₂jme₃gu'₅₄ bá₄
 Cristo lia'₂ rě₂'ņia₅ jě₁ma₂tě₂ rě₁dsió₄ jniá₂ a₂i₁jing₁₂
 'nia'₂.

³⁰ Rin'₅₄ jniog₄, mi₅ jniá₂ ja₁con'₂ 'nia'₂ lia'₂ con'₂
 lě₅ 'éi'₃ quió'₅ Te₁gui'₅₄ Jesucristo quián₂ jniog₄,
 ton'₂ ia₁ a₂cuē₅ Jme₂dsí₂ bí₂, a₂jme₁'nió₄ jniog₄ rin'₅₄:
 a₂jme₁quiong'₅₄ 'nia'₂ jniá₂, ne₄ 'nei₂ a₂chéng'₅,
 a₂chi₁len'₄ 'nia'₂ Diú₄ o₄quió₃. ³¹ Mi₄ 'nia'₂ ne₄
 Diú₄ juí₁lio₅₄ jniá₂ o₄gú₃ dsa₂ i₂tsá₃ 'én₂ i₂chan₂
 Judea, le₂jaun₂ guě'₂ ján₃ juí₁gue₅₄ bá₄ rin'₅₄ jniog₄
 juig₂ Jerusalén caun₂ dse₃ a₂i₁can₁₂ a₂jme₁'oin₁₂,
³² ia₁jaun₂ chi₂jua'₂ 'nio₃ Diú₄ a₂dsió₄ jniá₂, i₁jing₁₂
 'nia'₂ a₂'io'₂ jmo₂₃, a₂tág'₄ jme₂dsí₂ quió₃ co₂dsia₅
 quian'₅₄ 'nia'₂.

³³ Juí₁quiong'₅₄ bá₄ Diú₄ i₂jmo₅ 'ei₅ tei₄, ca₂le₃jín'₃
 'nia'₂. A₂méi₃.

16

Cui₂₃ Diú₄ le₂jan₂ le₂jan₂

¹ Jme₂jnia₄ jniá₂ 'io₅₄ rin'₅₄ jniog₄ Febe, i₂ma₂já₅
 jme₂ti₃ ja₁con₂ guá'₅ chan₂ Cencrea. ² Guein₅₄ bá₄

dse₃ o₄quió'₄ Te₁gui'₅₄, jmo₄ bá₄ con'₂ dsi₂ten₅₄ jmo₃
 dsa₂ ja₁con₂ riin'₅₄ i₂'én₂,* ján₃ guë'₂ jme'₁oin₁₂
 quian'₅₄ jui₁'e₂ guë'₃ a₂ca₂rë'₃nió'₃ quió'₅, ia₁
 ma₂ca₂jme'₃o₅₄ bá₄'éi₂'ñiog₅ ma₂ca₂jme'₃oin₅₄ juin₅,
 ján₃ guë'₂ le₂jaun₂ ma₂ca₂jme'₃o₅₄ jniá₂.

³ Cuin₅₄ Diú₄ Priscila† quian'₅₄ Aquila, i₂lín₅
 i₂quian'₅₄ jniá₂ jë₄ ta₁ a₂niog₅ quió'₅ Cristo Jesús.
⁴ 'Éi₂ bá₄ ca₂jmo₃ tén'₂ dsí₅ o₄quió'₃ jniá₂, o₁jñia'₅₄
 ca₂quí'₃ dsa₂ dsi₂lag₅₄. Jaun₂ cuë'₅ jniá₂ ti₁'mag'₄ 'éi₂.
 On₃ jua'₅₄ jmá'₃ jniá₂; ca₂le₃jín₃ dsi₂nau₂ i₂'én₂ cuë'₂₃
 ti₁'mag'₄ ján₃.

⁵ Në₅ i₂cuíng'₅ Diú₄ ján₃ dsa₂ rin'₅₄ jniog₄ i₂ñi'₂
 dsi₂néi₂ quió'₅ Priscila quian'₅₄ Aquila në₃. Cuin₅₄
 Diú₄ Epeneto a₂mei₅₄ quiáng₃, dsa₂ i₂le₂'uig₅₄
 i₂ca₂rë'₃'én₂ le₃quió'₅ Cristo 'uë₃ Acaya.‡

⁶ Cuin₅₄ co₂nio₄ Diú₄ María, ia₁ 'ñio₅ lín₃ ma₂jmo₃
 ta₁ o₄quián'₂ 'nia'₂.

⁷ Cuin₅₄ co₂nio₄ Diú₄ Andrónico quian'₅₄ Ju-
 nias, dsa₂ go₃ jniá₂ i₂quiang'₅₄ ca₂'ú₃ né'₃ 'má₃;
 co₂'nió'₄ dsa₂ i₂lén₄ i₂cuig₅ guë'₄ dsa₂ i₂chen₄ quián₅
 Te₁gui'₅₄, co₂'nió'₄ dsa₂ i₂jme'₁ma₂tion'₅₄ le₃quió'₅
 Cristo le₂jñiá₅ guë'₄ con'₂ guë'₄ jniá₂.

⁸ Cuin₅₄ Diú₄ Amplias, jan₂ i₂'nió₃ jniá₂ le₃quió'₅
 Te₁gui'₅₄.

⁹ Cuin₅₄ co₂nio₄ Diú₄ ján₃ Urbano, dsa₂ i₂quian'₅₄
 jniog₄ jmo₂ ta₁ quió'₅ Cristo Jesús, quian'₅₄ Estaquis
 në₃ i₂lín₅ a₂mei₅₄ quiáng₃ i₂'nióg₃ guë'₄ lín₃.

¹⁰ Cuin₅₄ Diú₄ Apeles, i₂ma₂já₅ cuë'₂₃ léi₄ a₂ñi₂₃
 le₃quió'₅ Cristo, le₂jaun₂ bá₄ jmo₄ co₂nio₄ quian'₅₄
 ca₂le₃jín₃ i₂chan₂ dsi₂néi₂ quió'₅ Aristóbulo ján₃.

* **16:2** lit. “dsa₂ jñió₅.” † **16:3** griego: Prisca. ‡ **16:5** griego:
 Asia.

11 Cuin₅₄ Diú₄ Herodión, dsa₂ go₃ jniá₂, quian'₅₄ guë'₂ dsa₂ familia quián₅ Narciso i₂'én₂ le₃quió'₅ Te₁gui'₅₄.

12 Cuin₅₄ bá₄ co₂nio₄ Diú₄ Trifena quian'₅₄ Trifosa ně₃, on₃ dsa₂ mí₂ i₂jmo₅ ta₁ quió'₅ Te₁gui'₅₄, quian'₅₄ guë'₂ 'io₅₄ rin'₅₄ jniog₄ Pérsida i₂'nió₄ guě₄ lin₃, i₂ŋ₄ ma₂jmo₃ ta₁ quió'₅ Te₁gui'₅₄ ján₃.

13 Cuin₅₄ bá₄ Diú₄ Rufo i₂lín₅ dsa₂ i₂ma₂quion'₅₄ quián₅ Te₁gui'₅₄, quian'₅₄ chog₅₄, i₂jing₅₄ ně₂jag₄ bá₄ cha₃ ján₃.

14 Cuin₅₄ Diú₄ Asíncrito, Flegonte, quian'₅₄ guë'₂ Hermas, Patrobas, Hermes ně₃, quian'₅₄ guë'₂ dsa₂ rin'₅₄ jniog₄ i₂quain'₅₄ ně₃.

15 Cuin₅₄ 'nia'₂ Diú₄ ján₃ i₂chen₂ Filólogo quian'₅₄ Julia, Nereo ně₃, quian'₅₄ 'io₅₄ rin'₅₄; cuin₅₄ 'nia'₂ Diú₄ Olimpas quian'₅₄ guë'₂ ca₂le₃jín₃ rin'₅₄ jniog₄ i₂'én₂ Š i₂tion'₅₄ quain'₅₄.

16 Cuin₅₄ 'nia'₂ Diú₄ ríng'₂ le₂jang'₂ le₂jang'₂ a₂qui₁chén'₁* 'nia'₂ quió'₅ ríng'₂, a₂lě₅ léi₄ a₂ma₂'ei₅ caun₂ jág₁ a₂le₁jě₃ 'au'₂ quian'₅₄ ríng'₂. Ca₂le₃jín₃ bá₄ guá'₅ quián₅ Cristo dsiáin'₂ jág₁ a₂cuin₂₃ Diú₄ 'nia'₂.

17 Rin'₅₄ jniog₄, mi₅ jniá₂ ne'₅₄ 'nia'₂, rě₂ de'₂ quion₂ 'nia'₂ 'í₁, 'ein₂ dsia₅ mi₅₄ jmo₅ le₁dson'₅₄ guá'₅, 'ein₂ chí'₅ juí₅ a₂qui₂nió₃ dsa₂, a₂tsá₃ dsi₂ten₅₄ lia'₂ con'₂ lě₅ jág₁ a₂ma₂ca₂rě₃tín'₃ 'nia'₂. Jaun₂ co₂dsia₅ chén'₂ 'nia'₂ cau₅ i₂jmo₅ le₂jaun₂. 18 Ia₁ on₃jua'₅₄ dsa₂ i₂jme₂tí₃ ne₄ Te₁gui'₅₄ Jesucristo i₂le₂'éi₂; con'₂ jnia'₅₄ jme₂tí₃ ne₄ a₂mi₅ ni₁ŋ₁ guoin₅₄ bá₄, qui₂jme₂gain₂₃

Š 16:15 lit. “dsa₂jnió₅.” * 16:16 Caun₂ tag₄ a₂jme₁chí'₄ lia'₂ con'₂ ca₂jmo₃ Pa₄ si₂ la₂.

dsí₅ jui₁lia'₂ dsa₂ i₂tsá₃ lin₄ ŋí'₂ dsí₅, quian'₅₄ jág₁ 'ua₁, jág₁ rau₂ ně₃.

19 Ca₂le₃jín₃ bá₄ dsa₂ le₁ŋi₅ 'a₂ lia'₂ ma₂ja₂nó'₅ 'nia'₂ a₂neg'₅₄, jaun₂ 'io'₂ jmo₅ jniá₂ o₄quián'₂ 'nia'₂. La₁ia₁ 'nio₃ jniá₂ a₂lén'₂ 'nia'₂ 'ŋiog'₅₄ le₃quió'₅ a₂dse₃, ján₃ bá₄ le₂ně₅ a₂léng'₂ dsa₂ i₂tsá₃ 'e₂ dsi₂jnia₅ dsí₅ ne₄ a₂'lig'₅₄. 20 Jaun₂ Diú₄ i₂jmo₅ 'ei₅ tei₄, ŋi'₅₄ ta₁ jlein'₃ i₂sě₃dse₃ o₄tag'₄ 'nia'₂. Jui₁'ei₅ bá₄ a₂dse₃ dsí₅ Te₁gui'₅₄ Jesús quián'₂ jniog₄ ja₁con'₂ 'nia'₂.

21 Timoteo, i₂quian'₄ jniá₂ jmo₂₃ ta₁, dsiáin'₂ jág₁ a₂cuin₂₃ Diú₄ 'nia'₂; le₂jaun₂ bá₄ ján₃ Lucio quian'₅₄ Jasón, Sosípater, i₂lín₅ dsa₂ go₃ jniá₂.

22 Jniá₂ Tercio i₂tó'₃ jág₁ la₂ ne₄ si₂, ján₃ bá₄ cuín₅ jniá₂ Diú₄ 'nia'₂ o₄quió'₄ Te₁gui'₅₄.

23 Gayo ně₃ dsiáin'₂ jág₁ a₂cuin₂₃ Diú₄ 'nia'₂. Dsi₂néi₂ quió'₅ 'éi₂ bá₄ 'eng'₅₄. Já₃ bá₄ cuě₂₃ dsi₂néi₂ quió'₅ cuě'₅ ca₂le₃jín₃ dsa₂ quián₅ guá'₅. Erasto dsa₂ i₂niog₅ gu₂ cu₄ quió'₅ dsa₂ juig₂ ně₃, dsiáin'₂ jág₁ a₂cuin₂₃ Diú₄ 'nia'₂ ján₃; i₂chen₂ Cuarto rin'₅₄ jniog₄ ně₃.

24 Ju₁jme₂gu'₅₄ bá₄ Te₁gui'₅₄ Jesucristo 'nia'₂ ca₂le₃jíng'₃, A₂méi₃.†

'Ág'₃ jág₁ Pa₄ a₂jme₂juin'₂ Diú₄

25 Ně₃ ně₃, ju₁jme₂juin'₂ jniog₄ Diú₄. 'Éi₂ bá₄ lé₂ le₃jmo₃ a₂náu'₁ 'nia'₂ tiá₂ lia'₂ con'₂ lě₅ jág₁ dse₃ quió'₅ Cristo a₂'ě₅ jniá₂, lia'₂ con'₂ lě₅ ca₂jme₃jnia₅ Diú₄ jág₁ quió'₅ a₂jme₁rě₂'ma₄ ca₃ma₂líg'₂ lin₃. 26 Diú₄ i₂chan₂ co₂tan₅₄ 'éi₂ bá₄ ca₂jmo₃ 'éi'₃ a₂jmo₃ jág₁ dsa₂ i₂chen₄ quiáin₅ ma₂líg'₂, jág₁ a₂ca₂tó'₂ 'éi₂ ne₄

† 16:24 Chog₅₄ si₂ a₂dse, guě₄ tsá₃ chi₁ton₅

Si₂, ia₁jaun₂ le₃ŋi₅ dsa₂ chan₂ ca₂le₃jě₃ juig₂ nación,
ia₁jaun₂ le₃'éin₂ jág₁ jaun₂, le₃nei'₅₄ ně₃.

²⁷ ¡Diú₄ i₂jan₂ tan₅₄, i₂tin₂, i₂ŋi₅, ju₁le₂juin'₂ bá₄
tě₂le₃ quian'₅₄ Jesucristo ca₂lia'₂ co₂tan₅₄! A₂méi₃.
Co₂ně₅.

Jag₁ 'mí₂ a₂ma₂li'₅₄ quian'₅₄ Diu₄
New Testament in Chinantec, Tepetotutla
(MX:cnt:Chinantec, Tepetotutla)

copyright © 1994 Wycliffe Bible Translators, Inc.

Language: Chinantec, Tepetotutla

Translation by: Wycliffe Bible Translators, Inc.

Chinanteco, Tepetotutla [cnt], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Tepetotutla

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 30 Dec 2021

5c52af9e-3086-5d57-9b7e-2e495fea8899